

JESUCRISTO PIA PEXEINYA DIWESI JUME TATSI MARCOS PETINAE DIWESI

Meje yabara poxona Juan pon Pebautisabin jiwi cuiduba ira xuepana
susato tsurucuae nacuatha

(Mt 3.1-12; Lc 3.1-9, 15-17; Jn 1.19-28)

1 ¹Baraxue tamropata pitaban xua Jesucristo pia pexeinya jume
diwesi tatsi. Bapon Jesucristo, Nacom Pexanto tatsi.

²Bayatha Nacom pia peitorobi jume pepaebin, pon pewæn Isafás, bapon
tina petinae diwesitha. Isafás tina Nacom nexa, Nacom barapo diwesitha
jeye Pexantotha:

“Itorobin copiya pon tana najume caitorobin
xua catsiwanaya itorobinchi.

Bapon cana exanaena jiwitha xua jiwi yabara
aura tsane abe pia peexanae cuiru coyenein
tatsi, xua poxona nepatopae wunaeya tsane.

³ Pon itorobin bapon jume tan pon xua wawai
ira xuepana susato tsurucuae nacuatha.

Bapon wawaya jeye: ‘Patsinajuntu cui
coyene wunaere, pon jiwi pia pepa
Pecanamataxeinaeinchi nexa pia pepatopae
wunaeya tsane’, jei pon xua wawai”,
jei Isafás petinae diwesitha.

⁴Nexata Juan pon Isafás peyabara paebixae bapon ira xuepana susato
tsurucuae nacuatha patopa. Bapon Juan bautisaba ducuaenaebiya, xua
jiwi bautisabatsi merantha. Matautano bapon tsipaeba jiwitha Nacom pia
pexeinya jume diwesi tatsi. Bapon Juan jeye jiwitha: “Icha juntu coyene
paxeinare painya neauraxae xua abe paexaname. Bapoxona Nacom
paca yabara junteinaena abe painya neexanae cuiru coyenein”, jei

Juan. ⁵Daxita Judea nacuamonae, irurũ Jerusalén tomarapiwi, daxita barapomonae pona ichaxota beya Juan bautisaba jiwi ira xuepana susato tsurucuae nacuatha. Poxonae barapomonae nayopita Nacomtha xua bepa pinae Nacom tsita auratsi xua abe peexanaexae bapoxonae barapomonae Juan bautisaba Jordán mentha.

⁶Juan jumaina duwein nabocoto, po duwein pewũn camello. Coreinya bocoto maraina. Xane pocotsiwa yapupuna pocotsiwan be sure poxi. Mataũtano bana daeba. ⁷Barapon pomonaetha pebautisabixae tsipaeba, jeye: “Pon nepuna patopaena, apara bapon Mesías. Bapon bichocono peayapusũ itorobi coyenewa xeina beyacaincha xan. Bapon pon jiwi pia Pecanamataxeinaeinchi. Xan bichocono tapawin daxota bapon bichocono tsita pin ura xeinan xua tataxu mũ isanaxubiwa tsane pia penataxu xatatsiwa tatsi. Tsipei xan bichocono tapawin, beyacaincha pomonae amanaya petanacuichiwi pia pentacaponaeawi poxonae barũ cui itura jina pia pentacaponaewichi. ⁸Paca bautisabatsi meratha, ichitha nama barapon Mesías paca bautisabina Nacom pia Pejumope tũnaxũta tatsi poxonae Nacom paca najumope catsibina”, jei Juan jiwitha xua Jesús yabara.

Meje yabara poxonae Jesús bautisabatsi

(Mt 3.13-17; Lc 3.21-22)

⁹Barapo dapaetha Jesús Nazaret tomara weya pona, po tomara eca Galilea nacuatha. Bapon Jordán mentha patopa, ichaxota Juan bautisaba. Baraxota Jesús bautisabatsi. ¹⁰Poxonae mene wejuina barapoxonae caena nainya Jesús itaboco necoicha xua peitaboco nayausanaxuba. Jesús tane xua Nacom pia Pejumope tũnaxũ tatsi patopa bapontha xua be topiboto yaruneica. ¹¹Barapoxonae Jesús jume tane pocotsiwa peitaboco wetsipaebicatsi, jeichichi: “Xam apara Taxantom, pom bichocono caantobetsi, pom caitapetatsi. Nejuũtũ coyene weiweina exaname”, jei Nacom.

Meje yabara poxonae Jesús juũtũ coyene juũtũtatsi caurimonae pia pentacaponaein tatsi xua Jesús abe coyeneya petaexanaenexa tsane

(Mt 4.1-11; Lc 4.1-13)

¹²Poxonae Jesús nanacui wetatsi xua bautisabatsi bapoxonae Nacom pia Pejumope tũnaxũ tatsi Jesús nainya itorobatsi ira xuepana susato tsurucuae nacua beya. ¹³Jesús ira xuepana susato tsurucuae nacuatha popona cuarenta po matabibibe. Baraxota pichiwan xua camatsawan jinompa ichaxota Jesús popona pocotsiwan bichocono atsaca. Caurimonae pia pentacaponaein tatsi pon Satanás Jesús piraichi juũtũ coyene juũtũtatsi xua Jesús abe coyeneya petaexanaenexa tsane. Pirapae matatsunpiwimonae po matatsunpiwimonae Nacom itoroba,

barapomonaē pata Jesustha xua Jesús pecui matateicaenexa tsainchi, matautano xua peapatsinexatsi tsainchi.

**Meje yabara poxonaē Jesús tamropata pitaba pia
penacuichiwa xua Galilea nacuatha**

(Mt 4.12-17; Lc 4.14-15)

¹⁴Nexata poxonaē ichamonaē Juan maxu waetabatsi xua peetsinexatsi jiwi pecabi botha, bapoxonaē Jesús Galilea nacuatha patopa. Jesús paeba ducuaeta jiwitha Nacom pia pexeinya jume diwesi tatsi. ¹⁵Jesús namchi jeye: “Nacom bayatha yabara necana cui weta exana po coyeneya xua poxonaē tapatopaewa. Daxota jiwi itacupatsi xua naexana Nacom piamonaē, pomonaē Nacom itorobiya peewatsixae. Daxota icha juntu coyene paxinare Nacomtha xua painya neauraxae xua abe paexaname, Nacom piamonaē painya nenaexanaenexa tsane. Pajume cowunde Nacom pia pexeinya jume diwesi tatsi”, jei Jesús.

**Meje yabara poxonaē Jesús waba cuatro poyobe pebiwi,
pomonaē duwei peyamonaewi**

(Mt 4.18-22; Lc 5.1-11)

¹⁶Poxonaē Jesús pona Galilea pucua itapatha, bapoxonaē tane ponbe peyaxunubinbe duwei. Ichun pewun Simón, ichun pewun Andrés. Baponbe bara cae peweichobe. Baponbe peweichobe duwei yamonauyabe pucuatha. ¹⁷Jesús waba, baraponbe wabatsibe. Jesús jeye:

—Anetha, pana nepuna pondebe. Paca cuidubinchibe. Anoxuae nama xan paca exanaeinchibe xua pinmonaē payawenaenamebe xua barapomonaē pejume cowuntsiwa tsane Nacom icha bayatha paichimbe poxonaē payamonamebe duwei nawita, jei Jesús.

¹⁸Bara caena baraponbe botabe barapo peyamonaewa. Bapoxonaē napuna ponabe Jesustha.

¹⁹Jesús equeicha pona. Bapoxonaē equeicha ichunbe tainchibe. Baraponbe ichun pewun Santiago, iru ichun pewun Juan. Baponbe Zebedeo pexantobe tatsi. Jeratha mataquerabauyabe peyamonaewa xua ucupouna. ²⁰Jesús nainya waba, baponbe wabatsibe: Jesús baraibe: “Anetha, pana nepuna pondebe”, jei Jesús. Baponbe paxa cuenta ponabe jera weya, pon pewun Zebedeo. Matautano cuenta ponabe pomonaē Zebedeo pia peyawenaē jiwichi tatsi xua yamona duwei. Baponbe Jesustha napuna ponabe.

Meje yabara poxonaē pebin pon cauri xeina

(Lc 4.31-37)

²¹Bapoxonaē Jesús pijimonaē baru pona Capernaum tomara beya. Bapoxonaeru judiomonaē barompaya pia pentaquei seicaē matabi tatsi

tsuxubi. Barapo matabitha Jesús pijimonae baru joniya judiomonae pia penacatutsi botha tatsi. ²²Barapo jiwi yabara najuntu coyene cabenaeca, tsipei pocotsiwa Jesús barapomonae cuidubatsi be pon peyaputaein pia peyapusu itorobi jume coyeneya tatsi paeba. Jesús jopa cuidubiyo be judiomonae pia pecuidubiwi pia coyeneya tatsi. ²³Pebin pon cauri xeina barapon eca barapo judiomonae pia penacatutsi botha tatsi.

²⁴Bapon wawaya jeye:

—iJesús Nazaret tomarapim, pana wepu warapare! ¿Eta xua metha patopame pata xantha xua jinya apara abe pata neexanaetsim? ¿Apara patopame jinya pana nejutebichim? Paca yaputainchi yawa paca yaitainchi xam apara pon Nacom caitoroba, pon pepa Nentacuiruyapuxanepanaem, jei pebin pon cauri xeina.

²⁵Jesús taitaweta, pebin taitawetatsi cauri. Jesús cauritha jeye:

—iMoyande! iBarapon wepu ponde! jei Jesús cauritha.

²⁶Barapoxonae cauri pebin naichababa exanatsi. Poxonae cauri barapo pebin bichocono wawai exanatsi, bapoxonae barapo cauri pebin wepu poinchi. ²⁷Daxita barapomonae yabara najuntu coyene cabenaeca. Daxota nayainyaba, jeye:

—¿Eta pocotsiwa jane? ¿Jamaisa baxua mexeya pena pecuidubi coyenewa? Maisa barapo pebin Jesús bichocono peyapusu itorobi coyenewa pexeinaein. Matautano caurimonae jume cowanta poxonae pocotsiwa bapon itoroba, najei barapomonae.

²⁸Bapoxonae caena nainya daxita pomonae jinompa Galilea nacuatha jume taerucupa pocotsiwa juinya Jesús exana.

Meje yabara poxonae Jesús axaibi exana Simón Pedro pamiyo tatsi
(Mt 8.14-15; Lc 4.38-39)

²⁹Jesús caena nainya pona judiomonae pia penacatutsi bo tatsi weya. Bapoxonae Jesús joniya Simón pia botha tatsi po bo xua iru Andrés pia bo tatsi. Barapo botha Santiago iru Juan Jesús baru joniya. ³⁰Simón pamiyo tatsi domae xainchi. Barapowa camatha boca. Poxonae Jesús patopa barapomonae caena nainya Jesús tsipaebatsi, jeye: “Simón pamiyo tatsi domae xainchi”, jei. ³¹Jesús caquita pona Simón pamiyo tatsi. Bapoxonae bapowa cobe pitatsi. Barapowa asiya cuaranotatsi. Bapoxonae barapowa caena nainya taaichurucuaetsi domae. Nexata barapowa pexaewa apata barapomonaetha.

Meje yabara poxonae Jesús axaibi exana pin bicheitomonae
(Mt 8.16-17; Lc 4.40-41)

³²Poxonae tabopiya tsanaicha xua quirei tsanaicha, bapoxonae jiwi Jesús tacapoinchi pomonae peatenemonaewi, iru pomonae caurimonae xeina. ³³Daxita barapo tomarapiwi nacaetuta bomuxu boupatha.

³⁴Jesús axaibi exana pinmonae pomonae xeina daxita coyenexi xua xoxi peatenewa. Matautano Jesús taitaweta pomonae cauri xeina. Jesús jopa copatsiyo xua pecueicueijejewa caurimonae, tsipei caurimonae Jesús cui yaputainchi.

**Meje yabara poxonae Jesús cueicueijej Nacom Pejume
Diwesi judiomonae pia penacaetutsi bontha tatsi
(Lc 4.42-44)**

³⁵Baya poxonae caemumbotha poxonae cataunxuae quiriquirica Jesús nacosataxuba. Bapoxonae tomara weya pona xua ichaxota jiwaibi bara beya pona. Baraxotiya Jesús tsipaebauya, Nacom tsipaebatsi. ³⁶Nexata Simón iru pomonae Jesús pepuna jinompae jiwichi, barapomonae Jesús pu barainatsi. ³⁷Poxonae barapomonae Jesús caxibatsi, bapoxonae Jesús tsipaebatsi, jeye:

—Daxita jiwi cawenawenei, jei.

³⁸Jesús jume nota jeye:

—Barabu ponaeinchi icha tomaran beya, barapo tomarantha iru tacueicueijeinexa tsane Nacom pia pexeinya jume diwesi tatsi. Daxota apara baxua tsipatopeican, jei Jesús.

³⁹Bapoxonae Jesús siwa pona ducuaeta daxita tomaran Galilea nacuatha. Judiomonae pia penacaetutsi bontha tatsi Nacom pia pexeinya jume diwesi Jesús tsipaeba barapo judiomaeta. Matautano Jesús taitaweta caurimonae.

**Meje yabara poxonae Jesús axaibi exana pon peperu sawinchi
(Mt 8.1-4; Lc 5.12-16)**

⁴⁰Bapoxonaeru pebin, pon peperu sawinchi, Jesús caquita poinchi. Bapoxonae bapon pentabocototha uncua Jesús peitabaratha tatsi xua Jesús pebaru cui itura jinaexaetsi. Bapon matowa Jesús wucatsi, jeye:

—Icha bara ichichipame bara caitacupa xua axaibi tana neexanaewam, tsipei jinya neayapusu itorobi coyenewa nexeiinaem, jei bapon.

⁴¹Jesús yabara najuntu coyene xeina bapon, xua peyawenaenexa. Jesús nacobe yota, bapoxonae bapon mata jayabatsi, jeye:

—Bara ichichipan. ¡Bara axaibinde! ¡Bara caaperuxaibi exanatsi! jei Jesús.

⁴²Bapoxonae bapon nainya taaichurucuaetsi xua peperu sawiwatsi. Matautano axaibi tsanayano. ⁴³⁻⁴⁴Bapoxonae Jesús jume daunweya itorobiya jeye:

—Jopa yabara tsipaebinde ichamonaetha xua neaxaibiwam. Saya jame meisa ponde sacerdotepintha xua nenaitutsinexa xua bapon necataenexa xua bayatha nejumewa. Care bapontha pocotsiwa xua pecatsiwa Nacomtha, pocotsiwa bayatha Moisés cui itoroba xua equeicha jopa jinya

nenataxobinexa jinya pepontha. Bapoxonae daxita jiwi cayaputaena xua tsita itapeinya xeinatsi xua xam bara jumem yawa xua peru wunaem, jei Jesús.

⁴⁵Daichitha poxonae bapon pona jopa moya yawun xeinaeyo. Bapon yabara tsipaebapona ichamonaetha pocotsiwa xua bayatha peaxaibiwa. Daxota Jesús jopa itacupaetsi xua naitutsiya pata ducunaebiya tomarantha. Daxota Jesús tomaran cuariya popona xua aisowantha. Jiwi pomonae daxita ichawan werena pona, barapomonae Jesús pia xantha tatsi tapatatsi.

Meje yabara poxonae Jesús axaibi exana pon pecuenobinchi

(Mt 9.1-8; Lc 5.17-26)

2 ¹Poxonae be caentacabiyobe yapucaewa, bapoxonae Jesús equeicha caibeya pona Capernaum tomara beya. Jiwi yopita xua pinae Jesús botha eca. ²Pin bicheito nacaetuta ichaxota po botha Jesús patopa, beya poxonae matauta bo coibo quecona. Barapomonaetha Jesús tsipaeba Nacom pia pexeinya jume diwesi tatsi. ³Bapoxonae pebiwi pata cuatro poyobe. Barapo pebiwi yapaparuwa capata pon pecuenobinchi. ⁴Tsipei pin bicheito, daxota barapo pebiwi jopa itacupaetsi xua Jesús imoxoyo pecaquita ponaewatsi. Daxota barapo pebiwi bomuxutha pentatupa wereca atsa caxinaxoreca ichaxoya Jesús uncuareca. Barapo mutha deca pon pecuenobinchi yapaparuwa yorecatsi. ⁵Poxonae Jesús yaputane xua barapomonae yabara cui jume cowanta xua bara Jesús peitacupaewatsi xua axaibi peexanaewatsi pon pecuenobinchi, bapoxonae pecuenobinchitha Jesús tsipaebiya jeye:

—Tajitom cacui yabara juntemainaya juntu puxana exanatsiba abe jinya neexanae cuiru coyenein, jei Jesús.

⁶Ichitha baraxota iru naena pomonae jiwi pecuidubiwi Moisés pia peitorobi coyene tatsi. Barapomonae nanta xeinaeya najei: ⁷“Maisa bapon bichocono abe tsipei pocotsiwa bapon paeba bichocono Nacom tsita ajumbetsi. Jiton dapocotsin aibi pon xua jiwi cacui yabara juntemainaya juntu puxana exanatsi abe pia peexanae cuiru coyenein tatsi. Jame meisa apara caein Nacom yaputane xua jiwi cacui yabara juntemainaya juntu puxana exanatsi abe pia peexanae cuiru coyenein tatsi”, najei. ⁸Barapoxonae caena nainya Jesús yaputane pejuntu coyenewatha pocotsiwa barapomonae pia coutha nayainyaba. Jesús jeye barapomonaetha:

—¿Eta pocotsiwa metha baraxua pana natsipaebame? ⁹¿Eta po jumetha baran tsane pecuenobinchi? ¿Metha jan tsane: ‘Jinya abe neexanae cuiru coyenein cata juntemainatsi’, jan tsane? Ichacuitha ¿metha jan tsane: ‘Nontaponde, bara pire jinya nemaituncuaewa, yawa bara ponare’, jan tsane? ¹⁰Daxota anoxuae paca tsita itapeinya xeinaeinchi, xua xan

ponxaein Nacom Tananeitapetsin, xua xeinan taayapusu itorobi coyenewa xua bara tana neitacupaewa xua jiwi tayabara cacui jantemainaya juntu puxana exanaewa abe pia peexanae cuiru coyenein tatsi pomonae jinompa barapo cae pin nacuathe, jei Jesús.

Bapoxonae Jesús tsipaeba pontha pon pecuenobinchi. Jesús jeye:

¹¹—Catsipaebatsi, nontaponde. Jinya nemaituncuaewa pire. Jinya bo be-iyandeno, jei Jesús.

¹²Bapoxonae bapon caena nainya nontapona barapomonae peitutha tatsi, yawa pita xua pemaituncuaewa. Bapoxonae bapon bo tutu weya pona barapo pin bicheito peitutha tatsi. Daxita barapomonae yabara najuntu coyene cabenaeca, yawa Nacom wɔnae jointatsi, jeye:

—Maisa waxainchi bapana bayatha jopa taetsi pocotsiwa wɔnae pocotsiwe icha be iche, jei barapomonae.

Meje yabara poxonae Leví wabatsi, Jesús waba

(Mt 9.9-13; Lc 5.27-32)

¹³Barapoxonae Jesús pona Galilea pucua itapatha. Bapoxonae baxotiya pin bicheito pata Jesús pia xantha tatsi. Barapomonaetha Jesús cuiduba.

¹⁴Poxonae Jesús cataunxuae ecapona Galilea pucua itapatha, bapoxonae Leví tainchi. Bapon Leví Alfeo pexanto tatsi. Bapon Leví eca ichaxota bapon paratixi matoma noteibeca po paratixi jiwi bewa catsibina pon romanomonae itorobiya pia pepa peewatsinchi. Jesús Leví tsipaebatsi, Jesús jeye:

—Nepuna ponde, jei Jesús.

Bapoxonae Leví nontapona, yawa Jesús puna poinchino.

¹⁵Pirapaeyo Jesús Leví baru eca pexaethopeibiwatha, xua Leví pia botha tatsi xua Jesús pebaru xaenexatsi. Barichi Jesús baru eca pinmonae barapo pexaethopeibiwatha pomonae paratixi pentoma noteibiwi po paratixi jiwi bewa catsibina pon romanomonae itorobiya pia pepa peewatsinchi nexa. Iruru Jesús baru eca ichamonae pomonae abe peexanae cuiru coyenein peexanae jiwi. Matautano Jesús pijimonae baru eca barapo pexaethopaewatha. Pinmonae Jesús baru eca tsipei pinmonae Jesús puna poinchi. ¹⁶Ichitha pomonae jiwi pecuidubiwi Moisés pia peitorobi coyenewa tatsi iruru fariseomonae, daxita barapomonae Jesús tainchi poxonae Jesús baru xayeca pomonae paratixi pentoma noteibiwi, iru pomonae abe peexanae cuiru coyenein peexanae jiwi. Pomonae Jesús tainchi daxita barapomonae Jesús pijimonae tatsi jeichichi:

—Maisa Jesús pon painya nepaca cacuidubin abe exana poxoru baru xayeca pomonae paratixi penoteibiwi, matautano, baru xayeca pomonae peajuntucoyenebe jiwi, jei barapomonae.

¹⁷Poxonae Jesús jume tane baraxua, bapoxonae Jesús jume nota, jeye:

—Pomonae ba xua xaniwaicha jinompa xua jopa ateneyo barapomonae ba jopa canantawenonaeyo pon jiwi peyawubin. Saya jame meisa

pomonae ba atene barapomonae jame canantawenona pon jiwi peyawubin. Barichi xan patopan apara tha jopa tawabinexa tsane pomonae pejuntũ coyene xanepanae jiwi. Saya apara tawabinexa pomonae abe peexanae cuiru coyene peexanaewi tayawenaenexa tsane barapomonae, jei Jesús.

**Meje yabara poxonae Jesús yabara yainyabatsi po
coyene xua Nacom peyabara nainbotsiwatsi
(Mt 9.14-17; Lc 5.33-39)**

¹⁸Caentaqueitha Juan pia pepuna jinompaewichi, irũrũ fariseomonae, nainbota Nacomtha xua saya pewũcaenexa Nacomtha. Poxonae barapomonae nainbota, bapoxonae ichamonae Jesús siwa poinchi. Barapomonae Jesús yabara yainyabatsi barapo penainbotsi coyene. Barapomonae jeje Jesustha:

—Juan pia pepuna jinompaewichi, irũ fariseomonae jopa juniya Nacom peyabara nainbotsiwatsi poxonae Nacom wũqueibatsi. Ichitha jinyamonae jopa daichiyo, jopa nainbotsiyo Nacomtha xua saya pewũcaenexa Nacomtha, jei barapomonae Jesustha.

¹⁹Jesús jume nota barapomonae, jeje:

—Jiwi ba jopa bewa wecoyeya yabara nainbotsi poxonae ichamonae pexaewa tsinacaetuta penabanaenexa xua poxonae pebin pecotsiwa pita. Poxonae cataunxuae awiya bapon eca pexaewa penabanaewatha bapoxonae jiwi ba pebũrũya nabane. Jopa bewa yabara nainbotsi tsane.

²⁰Ichitha icha pon aena piowa pita, caena nainya waetabatsi, ichamonae waetaba xua tajũ bapon pecaponaenexatsi, bapoxonae jame jiwi ba bewa wecoyeya yabara nainbotsi, xua equeicha bapon caewa pepatopaewa tsane.

²¹“Jiwi ba jopa exanaeyo xua pena dorouto tsiwiyo jiwana caxinaxubeta xua peru dorouto pewan botsinexa. Icha baxua exanaetsipa xua pena paparuwatha wan bota peru doroutotha, bapoxonae barapo dorouto abe tsanaya tsipae. Tsipei poxonae barapo dorouto matanaxuba barapo pena paparuwa natsaquetabiya. Poxonae barapo pena paparuwa natsaquetabiya equeicha wan tsitsipanarena barapo dorouto. Bapoxonae equeicha nama bichocono pin wan tsanaya beyacaincha xua poxonae copiya. ²²Mataũtano jiwi ba pena vino mera jopa eparecaeyo peru bocototha, tsipei icha baxua exanaetsipa, barapo pena vino mera abe exanaetsipa barapo bocoto. Tsipei barapo bocoto jopa nayeyetaponaeyo poxonae barapo vino mera atsaxa. Barapo pena vino mera naxuba xuano barapo bocoto naxuba poxonae barapo bocoto tsitsica. Daxota bewa jame pena vino mera eparecae pena bocototha. Bapoxonae pena vino mera jopa naxubiyo. Yawa pena bocoto jopa naxubiyo poxoru boco yeyena yawa poxoru pena bocoto”, jei Jesús.

Meje yabara poxonae Jesús pijimonae tatsi yaboto nota trigo xu judiomonae barompaya pia pentaquei seicae mataqueitha tatsi
(Mt 12.1-8; Lc 6.1-5)

²³Caentacabi poxonae judiomonae barompaya pia pentaquei seicae matabi tatsi, barapo matabitha Jesús, iru pijimonae tatsino pabi iyiya. Jesús pijimonae tatsi jainpa. Barapomonae tamropata notarucupa xua yaboto xunumenapona trigo xu. Bapoxonae pecobetha xu mata pepeta. ²⁴Poxonae fariseomonae cui tane xua Jesús pijimonae tatsi exana, bapoxonae fariseomonae Jesús tsipaebatsi, jeye:

—Jamaisa jinya jiwimonae nacuita barapo matabithe, poxonae yaboto nota trigo xu. Apara jiwi jopa yabara cui copatsiyo xua ichamonae penacuichiwa barapo matabithe xua judiomonae barompaya pia pentaquei seicae matabi tatsi, jei fariseomonae.

²⁵Jesús jume nota, jeye:

—Barapomonae tajiwimonae jopa apara abe exanaeyo. ¿Jopa payabara yorobim pocotsiwa bayatha David exana poxonae jainpa, poxonae iru pijimonae tajainpatsiru? Bapon David, pon caena bayatha israelmonae itorobiya pia pepa peewatsinchi. ²⁶Bapon David, iru pijimonae tatsi, barapomonae jojoniya Nacom pin pia botha tatsi poxonae pon pewun Abiatar tanacuita Nacom. Bapon Abiatar sacerdotemonae pia pepa pentacaponaein tatsi. David xane pan, po pan ichamonae cana exana xua Nacom pecatsiwatsi. Iru barapo pan David pijimonae cata xua pexaenexaru. Barapomonae xane bequein bara Nacom pia peitorobi coyenewatha copata xua saya meisa sacerdotemonae itacupatsi xua pexaewa tsane barapo pan, jei Jesús.

²⁷Equeicha Jesús namchi, jeye:

—Nacom, jiwi pewunaeya taexanatsi pentaquei seicae matabi. Barapo pentaquei seicae matabi Nacom tsiexana jiwi, xua barapo matabitha jiwi penafinacaewatsinexa. Nacom jopa ainya cui cana exanaeyo pentaquei seicae matabi xua beyacaincha jiwi. ²⁸Daxota xan ponxaein Nacom tana neitapetsixae xeinan taitorobi coyenewa xua jiwi tacoya taitorobiwa pentaquei seicae matabitha, jei Jesús fariseomonaetha.

Meje yabara poxonae Jesús cobe wuna exana pon pecobe mubinchi
(Mt 12.9-14; Lc 6.6-11)

3 ¹Jesús equeicha joniya judiomonae pia penacuetsti botha tatsi. Baraxota pon pecobe mubinchi eca. ²Barichi pomonae jiwi pecuidubiwi Moisés pia peitorobi coyene tatsi, iru fariseomonae baxota ena. Daxita barapomonae Jesús necotenatsi pecui taenexatsi icha bara metha Jesús cobe wuna exanaena pentaquei seicae mataqueitha pon pecobe mubinchi. Icha Jesús pon pecobe mubinchi axaibi exanatsi,

bapoxonae barapomonae xeinaena po coyenewa xua Jesús abe peyabara paebiwatsi tsainchi. ³Bapoxonae Jesús barai pontha pon pecobe mubinchi, jeye:

—Nontaponare. Uncuare xote, jei Jesús.

⁴Pomonae Jesús tainchi Jesús barai barapomonae, jeye:

—Paca yainyabinchi, ¿eta xua copata pentaquei seicae matacabitha? ¿Wunae jampa? ¿Abe jampa? ¿Eta xua metha tsipae? ¿Xua pebin capanepatsi jampa? ¿Xua pebin bexotsi jampa? ¿Eta xua jane? jei Jesús.

Ichitha barapomonae jopa jume notsiyo, saya moya umena. ⁵Nexata Jesús necota barapomonae. Anaya Jesús caseba barapomonae. Matautano juntu coyene wecoyei, tsipei barapomonae jopa beyaputaeyo pocotsiwa bapon exana. Jesús barai pon pecobe mubinchi:

—Nacobe doire, jei Jesús.

Bapon nacobe doita. Bapoxonae bapon nainya cobe wunae tsanaya. ⁶Bapoxonae fariseomonae Jesús weya ponarucupa. Bapoxonae barapomonae nacaetuta Herodes pijimonaetha tatsi xua pecui yabara paebinxatsi xua po cui coyenewatha Jesús pebexubiwa tsainchi.

Meje yabara poxonae pin bicheito nacaetuta Galilea pucua itapatha

⁷Jesús pijimona baru pona Galilea pucua itapa beya. Iruru pin bicheitomonae Jesús puna poinchi pomonae Galilea nacua weya pona.

⁸Iruru pomonae Judea nacua werena pona iruru pomonae Jerusalén tomara werena pona, daxita barapomonae Jesús puna poinchi. Iruru Idumea nacuapiwi Jesús puna poinchi. Iruru ichamonae Jesús puna poinchi pomonae icha muxunenetha jinompa xua Jordán mentha. Iruru Tiro tomarapiwi Jesús puna poinchi. Iruru Sidón tomarapiwi Jesús puna poinchi. Daxita barapo bicheito Jesús itata patatsi poxonae jume tane daxita xua juinya pocotsiwan Jesús exana. ⁹Tsipei pin bicheito, daxota Jesús pijimonae itoroba xua jera petaxawenaewa tsainchi xua petsaquibabiyainwatsi barapo pin bicheito. ¹⁰Yaitama Jesús axaibi exaneiba pin bicheito pomonae atenemonae, daxota iru ichamonae Jesús imoxoyo caquita poinchi. Barapomonae ichichipa xua Jesús pejayabiwatsi xua barapomonae iru axaibi peexanaenexatsiru.

¹¹Pomonae caurimonae pexeinaewi, poxonae barapomonae Jesús tainchi, barapomonae pentabocototha umena Jesús peitabaratha tatsi. Barapomonae wawaya jeye xua caurimonae wawai peexanaejaetsi:

—iMaisa bara xam Nacom Pexantom! jei barapomonae xua wawaya exanatsi caurimonae.

¹²Jesús jume daunweya itoroba barapomonae, jeye:

—Jopa pana neyabara paebinde ichamonaetha xua xan Nacom Pexanton, jei Jesús.

**Meje yabara poxonae Jesús itapetsiya waba pia
peitorobi jiji tatsi pomonae xua doce poyobe
(Mt 10.1-4; Lc 6.12-16)**

¹³Bapoxonae Jesús demxuwatha pona. Barapo demxuwatha Jesús waba pomonaetha xua peichichipaexae xua itapetsiya waba. Barapoxonae barapomonae Jesús pia xantha tatsi tapatatsi. ¹⁴Jesús itapetsiya waba doce poyobe xua pomonae pebaru jinompaenexatsi. Matautano barapomonae Jesús itoroba xua daxita jiwitha petacueicueijeinexatsi Nacom Pejume Diwesi. ¹⁵Barapomonaetha Jesús cata pia peayapusu itorobi coyenewa tatsi, xua cauri ichamonae petaitawetsinexatsi pomonae xua cauri pepuna jinompaewichi. ¹⁶Meje barapomonae pewunxi tatsi pomonae Jesús waba: Simón pon icha wun wun dutatsi “Pedro”, baraichi. ¹⁷Ichun pewun Santiago. Ichun pewun Juan pon Santiago peweicho tatsi. Baraponbe Zebedeo pexantobe tatsi. Baraponbetha Jesús icha wun wun dutabe “Boanerges” jei (xua po wantha xua jei: “Yamuxu pexantobe tatsi”, jei). Barapo wun wun duta tsipei peajuntucoyenesunbe. ¹⁸Ichun pewun Andrés. Iru ichun pewun Felipe. Iru ichun pewun Bartolomé. Iru ichun pewun Mateo. Iru ichun pewun Tomás. Iru ichun pewun Santiago pon Alfeo pexanto tatsi. Iru ichun pewun Tadeo. Iru ichun pewun Simón pon celotemonaepin. ¹⁹Iru ichun pewun Judas Iscariote. Barapon Judas pon Jesús caenaetaxubatsi ichamonaetha pebexubinexatsi.

**Meje yabara poxonae Jesús baraichi xua pinae xeina
Beelzebú pia peayapusu itorobi coyenewa tatsi
(Mt 12.22-32; Lc 11.14-23; 12.10)**

²⁰Bapoxonae Jesús, iru pomonae pia peitapetsiwi tatsi botha jojoniya. Bapoxonae equeicha pin bicheito nacaetuta Jesús pia xantha tatsi. Daxota Jesús iru pijimonae tatsi jopa itacupaetsi xua penabanaewa tsane. ²¹Jesús piamonae matabuxuyo tatsi jume tane xua jiji paeba xua pinae juinya Jesús matayaibatsi. Daxota barapomonae pata, xua Jesús pewaetabinexatsi, xua pia bo beya pecaponaenexatsi.

²²Matautano pomonae jiji pecuidubiwi Moisés pia peitorobi coyene tatsi, pomonae Jerusalén werena pona, barapomonae jiwitha jeye Jesús yabara: “Bapon caurimonae itawetatsi, apara pexeinaexae Beelzebú pia peayapusu itorobi coyene tatsi, pon caurimonae pia pentacaponaein tatsi”, jei barapomonae pomonae jiji pecuidubiwi Moisés pia peitorobi coyenewa tatsi.

²³Bapoxonae Jesús waba barapomonae pia xainya berena. Yawano Jesús pecayabara juta pepaebi diwesiyo tsipaeba, jeye: “Caurimonae pia pentacaponaein tatsi jopa itacupaetsi xua peitawetsiwa icha caurimonaetha, xua pecae caurimonaexae. ²⁴Icha cae nacuapiwi nawepu tsatabe xua matauta

nababe, bapoxonae jopa xaexaenaecaeyo. ²⁵Matauta iruru icha cae bo matabuxuyomonaebe nababe yawa nawepu tsatajopabe, bapoxonae jopa xaexaenaecaeyo. ²⁶Barichi icha Satanás, pijimonae tatsi nawepu tsatajopabe matautano xua nababe, bapoxonae jopa xaexaenaecaeyo. Satanás jopa itacupaetsi xua itoroba pijimonae, tsipei amsiya exana.

²⁷“Dapon ajibi, pon itacupaetsi xua botha joniya po botha pon bichocono maxu daunwei pia bo tatsi xua daxita notsina pocotsiwa bapon xeina pon maxu daunwei icha jopa copiya matha maxu cutanotsiyo.

²⁸“Bara xaniyeya paca tsipaebatsi. Pocotsiwa jiwi abe peexanae cuiru coyenein exana, matautano pocotsiwa xua jiwi abe paeba, barapo coyenein Nacom itacupaetsi xua yabara juntemainaena xua barapo jiwi abe exana. ²⁹Pon abe yabara paeba Nacom pia Pejumo pe tñaxu tatsi, Nacom bapana jopa yabara juntemainae tsane xua bapon paeba. Bara bapon ataya atene tsane ichaxota jopa itacounayiyo isoto xua bapon abe peexanaexae”, jei Jesús.

³⁰Jesús baraxua paeba, tsipei pomonae jiwi pecuidubiwi Moisés pia peitorobi coyene tatsi barapomonae bayatha naerabiya paeba xua pinae Jesús cauri xeina. Ichitha pon Jesús xeina apara Nacom pia Pejumo pe tñaxu tatsi. Daxota barapomonae Nacom pia Pejumo pe tñaxu tatsi tsita natsicuentatsi, tsipei Nacom pia Pejumo pe tñaxu tatsi abe yabara paebatsi.

Meje yabara Jesús pena tatsi, iruru peyapin jiwi tatsino

(Mt 12.46-50; Lc 8.19-21)

³¹Pirapae Jesús pena tatsi, iru peyapin jiwi tatsi pata Jesustha. Ichitha barapomonae pesato beumeinya. Bapoxonae najume caruta ichamonaetha xua petawabinexa tsainchi Jesús. ³²Po bicheito Jesús matawacaicha enatsi, barapomonae Jesús tsipaebatsi, jeye:

—Ena, iruru neyapin jiwino, pesato beya umena. Bepara bequein cataei. Bepara bequein catsipaebai, jei.

³³Ichitha Jesús jume barai barapomonae, jeye:

—¿Jintam powa be taena natsicotanera? ¿Jintam pomonae be tayapin jiwi natsicotanera? jei Jesús.

³⁴Bapoxonae Jesús necota pomonae pematawacaicha enaewichi. Jesús jeye:

—Barapomonae pomonae xote umene apara be taena tsicotan, matautano be tayapin jiwi tsicotan. ³⁵Pomonae exana pocotsiwa Nacom itoroba, pon peitabocotha peecaeinxae, barapomonae be tayapin jiwi tsicotan, matautano iru be tayapixi tsicotanno, matautano iru be taena tsicotanno, jei Jesús.

Meje yabara poxonae Jesús cuiduba jiwi pecayabara

juta pepaebi diwesiyo xua pon peubin yabara

(Mt 13.1-9; Lc 8.4-8)

4 ¹Equeicha Jesús tamropata pitaba xua cuiduba Galilea pucua itapatha. Bapoxonae pin bicheito nacaetuta ichaxota Jesús

cuidubuncua. Tsipei pin bicheito daxota Jesús jeratha nontabiya xua peecaenexa, po nae mentha ducuiya. Barapo pin bicheitomonaē taetabo itapatha umena. ²Jesús barapomonaētha cuiduba pecayabara jūta pepaēbi diwesintha.

Poxonae Jesús cuiduba barapomonaē, jeye: ³“Pana nejume naitaeware barapo diwesiyo: Pebin pon peūbin ponataba pia ũbichi pabitha. ⁴Poxonae pon peūbin ũbauya, icha xu namtotha othopeica. Pepupunaewi yapata. Bapoxonae barapo xu xu xane. ⁵Icha xu, xu othopeica ibowantha ichaxota xua ira itafafana. Barapoxonae barapo xu caena nainya xu xuwa, tsipei jopa tajū xu xuwarecaeyo. ⁶Ichitha poxonae xometo atsa tsina, bapoxonae yaboto tsaquiwa yawa tūpa tsipei jopa tajū tabū opina xuwarecaeyo. ⁷Icha xu, xu othopeica ichaxota pesoīwan xuwinaena. Barapo xu yaboto nanta capanaba poxoru yawa muxuna xuwina pesoīwan. Daxota barapo xu jopa xu nacoichiyo. ⁸Icha xu, xu othopeica ichaxota ira wūnae. Poxonae barapo xu, xu xuwa, xu nawūnaeta. Icha xun, xu nanacoitapona treinta po xu matabūxūyobe tsiniya. Icha xun, xu nanacoitapona sesenta po xu matabūxūyobe tsiniya. Icha xun, xu nanacoitapona cien po xu matabūxūyobe tsiniya”, jei Jesús barapo pin bicheitomonaētha.

⁹Equeicha Jesús jeye: “Icha pamuxu dubename, moya pana nejume naitaeware pocotsiwa tapaca tsipaēbiwatsi”, jei Jesús poxonae pijimonaē muxuconaquiya tsipaēba.

**Meje yabara poxonae Jesús namchi xua exua
metha pecayabara jūta pepaēbi diwesin
(Mt 13.10-17; Lc 8.9-10)**

¹⁰Nexata poxonae Jesús pipatōtha eca, bapoxonae barū eca pomonaē pia pepuna ponaewichi, irūno pijimonaē tatsi pomonaē doce poyobe. Barapomonaē Jesús yainyabatsi jeye: “¿Eta pocotsiwa yabara caunutame poxonae barapo pecayabara jūta pepaēbi diwesiyo cuidubame?” jei barapomonaē. ¹¹Jesús jume nota barapomonaē, jeye: “Meisa paxam yatsicaewa Nacom yabara paca yaputane exana po pecuidubiwa xua moya peyawūn xeinaewa. Barapo moya peyawūn xeinaewa apara xua Nacom paca cana exana xua painya nepaca itacūpaewa xua painya nenaexanaewa Nacom piamonaē tatsi pam, pomonaē pamxaem Nacom itorobiya paca ewata. Ichitha meisa jame ichamonaē pomonaē jopa nejume cowūntsiyo jopa daichichi. Nacom jopa copatsiyo xua barapomonaē peyabara yaputaewa baxua. Daxota barapomonaē cuiduban pecayabara jūta pepaēbi diwesintha, xua Nacom peyabara yaputaenexatsi. ¹²Baxua paēban xua bequein pia tana necui taibenaewatha tsane ichitha jopa pia tana necui yaputaibenaewatha tsane. Yawa xua bequein pia tana nejume taibenaewatha tsane ichitha

jopa pia tana nejume copi taibenaewatha tsane. Poxoru bapomonaē jopa icha jũntũ coyene xeinaeyo Nacomtha, daxota barapomonaē Nacom tsita natsicuentatsi abe petsita exanaexaetsi xuano Nacom jopa yabara jũntemainaeyo abe pia peexanaē coyenein tatsi”, jei Jesús.

Meje yabara poxonaē Jesús pijimonaē muxu yaputane exana po diwesi xua pecayabara jũta pepaebi diwesiyo, pon peũbin yabara
(Mt 13.18-23; Lc 8.11-15)

¹³Equeicha Jesús barapomonaetha muxu tsipaeba, jeye: “Tsipei jopa payaputaem po pecayabara jũta pepaebi diwesiyo xua peũbin yabara paeban daxota jopa payaputaemtsipae bequein ainya pecayabara jũta pepaebi diwesiyo paca tsipaebichipatsi. ¹⁴Paca tsipaebatsi pecayabara jũta pepaebi diwesiyo xua iche: Pon peũbin jũpa, icha be ichi pon Nacom Pejume Diwesi pepaebi ducuaēbiyaēin. ¹⁵Po xuton xua namto beothopiya, aichurubenaē. Barapo xuton yabara caunuta xua jiwi bara jũntũ weichichi caurimonaē pia pentacaponaein tatsi, pon Satanás. Jiwi jũntũ coyene weajumetsurubenaē exanatsi Nacom Pejume Diwesi xua bayatha po jume jume tane, xua bapoxonaē jopa petajume cowũntsinexa tsainchi Nacom, yawa xua jopa petanacapanenebiyaēnexa tsainchi Nacom beya, xua Nacom exanaena. ¹⁶⁻¹⁷Po xuton xua xu othopa ibowantha, barapo xuton yabara caunuta po jiwi xanepanaya jume tane Nacom Pejume Diwesi, xuano jũntũ coyene weiweinaya Nacom jume cowũntatsi. Ichitha bara caeto jume cowũnta, poxoru barapomonaē ajũntũfaetabiya jume jeba Nacom Pejume Diwesi pejũntũ coyeneintha. Poxonaē yaitama barapomonaē bichocono peatenexae, mataũtano poxonaē barapomonaē yaitama abe petaexanaexaetsi ichamonaē xua pejume cowũntsixae Nacom, bapoxonaē caurimonaē abe exana barapomonaetha, xua barapomonaē jũntũ coyene wejũntemaina exanatsi xua Nacom pecayabara jũntemainaewatsi. ¹⁸⁻¹⁹Po xuton xua xu othopeica pesoiwantha, barapo xuton caunuta xua pomonaē Nacom Pejume Diwesi jume tane, ichitha saya barompaya pia jũntũ coyeneyatha jinompa, yawa saya Ʃ copei cayabara nanta xeina, yawa saya exana pocotsiwa jũntũ coyene weiweina cana exainchi. Po coyene pebiwi exana baxuan bara jũtiya ichiya exana xua po xuton be pesoiwantha othopiya. Barapo xuton jopa thei dubenaeyo. Barapocotsi jũta coyeneya ichi, barapo jiwi. Jopa xanepanaya jinompaeyo Nacom nexa. ²⁰Po xuton xua xu othopeica peira wũnaewatha, bara nacoita. Barapo xuton yabara caunuta pomonaē jume tane Nacom Pejume Diwesi, mataũtano jume cowũntano poxoru jũntũ coyene xanepanaya jume tane. Mataũtano beta exana dubenanaēbiya beya matapainya jiwi cui tane xua barapomonaē jũntũ coyene xanepana Nacom peitabaratha tatsi. Bapoxonaē ichamonaē barapomonaē jiwana beta yawena ichamonaetha icha barapo xuto ichi xua treinta po xu

matabuxyobe tsiniya tsoponae. Matautano ichamonaе barapomonaе jiwana beta yawena ichamonaetha icha barapo xuto ichi xua sesenta po xu matabuxyobe tsiniya tsoponae. Matautano ichamonaе barapomonaе jiwana beta yawena ichamonaetha icha barapo xuto ichi xua cien po xu matabuxyobe tsiniya tsoponae”, jei Jesús.

**Meje yabara poxonaе Jesús pijimonaе tsipaeba
pecayabara juta pepaebi diwesiyo xua pecoicha yabara
(Lc 8.16-18)**

²¹Equeicha Jesús barapomonaetha tsipaeba, jeye: “Poxonaе jiton pecoicha, coicha exana, bapoxonaе jopa coicha matacatsiyo cajatha. Yawa jopa coicha exanaeyo cama peupana deca. Jame asiya coicha exanatsi, xua pecoicha taenexa pomonaе jojoneibarena. ²²Daxita pocotsiwa xua moya peyawun xeinaewa bexa tsane jiwi yabara yaputaena. Barichi po diwesin xua pecayabara juta pepaebi diwesin xua paebapona jiwi barapo diwesin jiwi itacupaeinchi xua peyabara yaputaewa tsane. ²³Icha pamuxu dubename, moya pana nejume naitaeware pocotsiwa tapaca tsipaebiwatsi”, jei Jesús poxonaе pijimonaе muxuconaquiya tsipaeba.

²⁴Equeicha Jesús barapomonaе barai, jeye: “Pana nejume naitaeware painya neexanaenexa pocotsiwa paca tsipaebatsi. Icha ichamonaе daunweya payabara paebiname penatsicuenta siwa xua abe peexanaexae Nacom barichi daunweya paca yabara paebina painya nenatsicuenta siwa xua abe painya neexanaexae. Matautano equeicha ichawano mataropeicha paca catsina. ²⁵Pon ba be conotha Nacom yabara yaputainchi Nacom bapontha cana exanaena xua ichawa peyabara yaputaewa tsane beya poxonaе bapon equeicha bichocono Nacom pejume cowuntsiwa tsainchi. Pon ba jopa ichipaeyo xua Nacom peyabara yaputaewatsi Nacom wepichina po coyene bapon yaputane xua beya daxota Nacom jopa pejume cowuntsiwa tsainchi”, jei Jesús.

**Meje yabara poxonaе Jesús pecayabara juta pepaebi
diwesiyo paeba xua peubi xuto yabara**

²⁶Nexata equeicha Jesús namchi, jeye: “Yabara paca cuidubatsi po coyene xua Nacom itorobiya ewata piamonaе. Barapo coyene bara juta coyeneya ichi, icha pebin ichi poxonaе peubi xu xu bebeya. ²⁷Poxonaе nacobe weta xua uba, bapoxonaе pabi weya pona. Bara bequein bapon jopa yawenaeyo xua barapo xuton xuxuwapona mataqueitha, merawithano poxonaе pebin maitequeiba, daichitha awiya barapo xu xuxuwapona. ²⁸Daxota barapo xu xuxuwapona tsipei ira yawena xua barapo xu xuxuwapona. Copiya pepaboto xuwina, bapoxonaе pepato naexana. Bapoxonaе pepa xu xu dubena xua bichocono axucucu. ²⁹Poxonaе pepa xu xu naweta barapo matababitha pebin pona xua penotsinexa pocotsiwa naweta”, jei Jesús.

**Meje yabara poxonae Jesús cuiduba pecayabara j̄ta
pepaebi diwesiyo po peubi xutiyo pew̄n mostaza xutiyo
(Mt 13.31-32; Lc 13.18-19)**

³⁰Jesús barapomonaē tsipaeba, jeye: “Poxonae Nacom waba jiwi xua petanaexanaenexatsi piamonaē tatsi pomonaē itorobiya peewatsixae, ¿eta po coyene nacoyene j̄pabe? ¿Eta xua paca cuidubinchi xua baxua yabara? ³¹⁻³²Nacom pijimonaē tatsi mataropeicha bichocono pinmonaē tsoponaē xua pomonaē jume cow̄ntapona Nacom. Baraxua icha be mostaza xutiyo ichi po xutiyo bichocono tsica xutiyo beyacaincha xua icha pethei xutiyo. Barapo mostaza xutiyo pebin ũba pia pabitha. Xuwa beya pin nae tsoponaē. Pepinnaexae daxota siri coton exana remax̄ranantha. Icha mostaza xutiyo ichi xua beya pin nae tsoponaē, bara j̄ta ichi Nacom pejume cow̄ntsiwichi, pomonaē bapon itorobiya peewatsixae. Bequein anoxuae tsica bicheitiyo, bexa tsane beya pin bicheito tsoponaē tsane”, jei Jesús.

**Meje yabara poxonae Jesús cuiduba jiwi pecayabara j̄ta pepaebi diwesixitha
(Mt 13.34-35)**

³³Jesús jiwitha ainya pecayabara j̄ta pepaebi diwesixi tsipaeba poxonae cuiduba Nacom Pejume Diwesi, icha barapocotsi diwesixi ichi xuaunxuae po diwesixi paeba. Awiya cuidudubapona beya poxonae barapomonaē xainwaicha yaputane. ³⁴Saya meisa barapomonaetha Jesús cuidubeiba pecayabara j̄ta pepaebi diwesixi coyenexitha. Poxonae Jesús meisa pijimonaē bar̄ eca, bapoxonae Jesús pijimonaē yabara muxu yaputane exana pecayabara j̄ta pepaebi diwesixi coyenexi.

**Meje yabara poxonae Jesús xainya ducuanaya exana joibo,
yawa maratsacano xainya mene ducuanaya exanano
(Mt 8.23-27; Lc 8.22-25)**

³⁵Barapo mataqueitha poxonae quirei tsanaicha Jesús pijimonaē tsipaeba, jeye:

—Antha poinchi icha muxunene beya, pucua beicha, jei Jesús.

³⁶Bapoxonae Jesús pijimonaē bar̄ wepu pona barapo pin bicheito. Bapoxonae Jesús pijimonaē bar̄ poinchi jeratha, po jeratha Jesús cuidubeca barapo pin bicheito. Barichi icha jeranno naponano.

³⁷Bapoxonae mentha jemeicha naetaba pin joibo. Maratsacan jeratha mene othopa, muxu jera pebunarecae. ³⁸Ichitha Jesús jera tafetha maituncua, nantasipa ȳȳtuncua paparuwatha xua xota nacuenacuena. Jesús pijimonaē yābatsi, jeichichi:

—Pon pata Necuidubin, ¿jopa catsita ainya cuiyo xua waxainchi bunathopaeinchi? jei barapomonaē.

³⁹Bapoxonae Jesús asiya uncuá, yawa joibo itawetaxuba. Jesús jeye maratsacantha:

—iBarande, bara xainya mene ducuanayama! jei Jesús.

Bapoxonae joibo caewanaya, yawa mene xainya ducuanaya. ⁴⁰Nexata Jesús barai pijimonae, jeye:

—¿Eta pocotsiwa metha bichocono pajunuwame? ¿Cataunxuae jopa pana nejume cui yabara jume cowuntsim xua bara tana neitacupaewa xua tapaca yawenaewatsi? jei Jesús.

⁴¹Barapomonae bichocono najuntũ coyene cabenaeca, yawa caemonae natsipaeba najei:

—¿Metha jintamda baponda? ¡Jamaisa bapon itawetaxuba joibo yawa maratsacan xua daxita xainya dubenanaya! najei barapomonae.

Meje yabara xua pebin pon caurimonae xeina pon Gerasa nacuapin
(Mt 8.28-34; Lc 8.26-39)

5 ¹Jesús, irũ pijimonae tatsi pata icha muxunene beya xua barapo pucuathiya. Po iratha Jesusbarũ pata barapo ira pewun Gerasa nacua. ²Poxonae Jesús jera wenontouna bapoxonae patopa pebin pon caurimonae xeina. Bapon ibo wou weya patopa Jestustha. ³Barapo pebin poponeiba ibo wountha. Dapon aibi pon itacupatsi xua bapon pecutswatsi, matautano metha bequein penaintotha tsipae. ⁴Bapon matowa penaintotha taxu cubeibatsi, yawa maxũ cubeibatsi xua bapon peyapucaeineibinexa tsainchi. Daichitha bapon barapo nain nain epa xuneiba. Dapon aibi xua bapon pecui amanayabiwatsi. ⁵Barapon mataqueitha poponeiba, yawa merawitha poponeiba. Matautano atororotha yawa ibo wountha wawai tsopoponeibi. Matautano ibotixitha pia coutha nathabeiba. ⁶Poxonae barapo pebin Jesús tajũ taebatsi, bapoxonae cuinaepona Jesús beya. Bapon pentabocototha uncuá Jesús peitabaratha tatsi xua Jesús pebarũ cui itura jinaexaetsi peainya cuinxae. ⁷Bapon wawaya jeye Jestustha:

—Jesús pon Nacom Pexantom, pon peitabocotha eca, ¿eta pocotsiwa metha taxantha patopame? Jume daunweya cabaraichi jopa neperaxa exanaeinde, jei.

⁸Bapon baxua paeba tsipei Jesús copiya namchi, jeye:

—iCaurimonae pam, bapon pawepu ponare! jei Jesús.

⁹Jesús yainyaba bapontha:

—¿Eta po wum? jei.

Bapon jume nota jeye:

—Tawun Ayei, tsipei paxan caurimonae pan ayei jiwi pan, jei bapon xua paeba exanatsi caurimonae.

¹⁰Barapo caurimonae Jesús muxu fayacotatsi xua bepa pinae barapomonae jopa bewa itawetichi icha nacua beya. ¹¹Ichaxota imoxoyo

peitapatororotha baxota jinompa pin marranomonaē. Barapo marrano duweimonaē xayompa peitapa tororotha. ¹²Caurimonaē Jesús wūcatsi, jeye:

—Icha pana itawetame, moya pana nepu copabare marrano duweimonaētha, jei caurimonaē.

¹³Bapoxonaē Jesús copata xua bara caurimonaē ponaena marrano duweimonaētha pebin weya. Barapo marranomonaē dūcupa. Pin pitapatororo othopareca. Pucuatha bunothopa. Yawa caurimonaē cabunathopatsi. Barapo marranomonaē dos mil po duweimonaēbe.

¹⁴Bapoxonaē pomonaē peyapu eenaewi marranomonaē, barapomonaē bichocono junuwiya cuinaepona tomara beya, jiwi petsipaēbinexatsi baxua yabara, yawa jiwi petsipaēbinexatsi tomara cuariya beya. Bapoxonaē jiwi pata petaenexa pocotsiwa Jesús cana exana pebintha. ¹⁵Poxonaē barapomonaē pata Jesustha, bapoxonaē barapomonaē tane pebin pon bayatha cauri xeina. Barapo pebin moya eca, paparuwa nama xatatano, matautano jūntema eca. Bapoxonaē barapomonaē bichocono junuwa.

¹⁶Pomonaē bayatha tane xua pocotsiwa Jesús bayatha cana exana pebintha, pontha pon cauri xeina, baxua yabara paēba ichamonaētha pomonaē pata. Matautano yabara paēba pocotsiwa Jesús cana exana marrano duweimonaētha. ¹⁷Bapoxonaē barapomonaē tamropata notarūcupa xua Jesús itawetatsi, jeye: “Maisa bewa warapaenama Gerasa nacua weya, po nacua pata nacua weya”, jei barapomonaē.

¹⁸Poxonaē Jesús jeratha nontabiya, bapo pebin pon bayatha caurimonaē xeina, bapon Jesús wūcatsi xua bepa pinaē Jesús puna ponaetsi. ¹⁹Ichitha Jesús jopa copatsiyo xua pepuna ponaenexa tsainchi bapon. Saya jame Jesús bapontha jeye:

—Maisa jinya bo beya ponare ichaxota jinyamonaē matabūxūyo beya. Barapomonaētha tsipaēbare daxita pocotsiwa Nacom cacana exana. Matautano barapomonaētha tsipaēbare xua Nacom bara cayabara najūntu coyene xeina pia necayawenaenexa, jei Jesús.

²⁰Bapoxonaē barapo pebin ponataba. Matautano tamropata pitaba xua cueicueijeī daxita pocotsiwa bayatha Jesús cana exana bapontha. Barapon baxua tsipaēba Decápolis tomarantha, po tomaran xua diez po tomaranbe xua imoxoyo nacacuita ena. Daxita jiwi barapo tomaran najūntu coyene cabenaēca poxonaē jume tane xua barapon paēba.

**Meje yabara xua poxonaē Jairo pexantiyo taaxaibi exanatsi;
yawa yabara xua bapoxonaē irū icha yabūyo axaibi
exanatsi poxonaē Jesús pia paparuwa tajayabatsirū
(Mt 9.18-26; Lc 8.40-56)**

²¹Poxonaē Jesús caibeya pona jeratha icha muxunene beya pucua iya, bapoxonaē pin bicheito Jesús pia xantha tapatatsi pitapatha.

²²Bapoxonae caein patopa pon judiomonae pia penacaetutsi bo tatsi pecanamataxeinaewi jiwanamonaepin. Bapon pewun Jairo. Poxonae bapon Jesús tainchi, Jesús peitabaratha tatsi pentabocototha tauncuatsi.

²³Bapon Jairo bichocono Jesús wucatsi. Jairo jeye:

—Taxantiyo muxu imoxoyo petupae. Anetha, inta taxantiyo necobetha mata jayabare, axaibi jinya neexanaenexa tsane. Bapoxonae inta asu pepoponaenexa tsane, jei Jairo.

²⁴Bapoxonae nexata Jairo Jesús puna pona. Pin bicheito Jesús puna poinchi, yawa barapo bicheito tsaquibabatsi. ²⁵Barapo pin bicheitotha iru napona yabuyo powa atene. Barapowa caena bayatha beya yadoce po weiyobe jopa xua pentabu janatha boca xua be nantawane. ²⁶Barapowa bichocono atene tsaibi bequein siwa poneiba pomonaetha pomonae peyawubiwi jiwi. Barapomonae bapowa daxita cobe matapaeteibatsi paratixi xua bapowa peyawubixaetsi, daichitha bapowa jopa yawenaetsi baxua. Saya equeicha bichocono abe tsoponae bapowa.

²⁷Poxonae bapowa jume tane xua pinae juinya Jesús axaibi exana jiwi, bapoxonae bapowa imoxoyo caquita uncuataba Jesús peputha tatsi xua pin bicheitotha. Barapowa Jesús pia paparuwa tatsi tajayabatsi xua peopirawa. ²⁸Barapowa pia coutha natsipaeba, najei: “Icha saya Jesús pia paparuwa tajayabin, bapoxonae axaibin tsane”, najei. ²⁹Poxonae barapowa tajayaba Jesús pia paparuwa tatsi, bapoxonae caena nainya bapowa ajaneibi tsanareca. Bapowa pia coutha nayaputane xua bayatha axaibi. ³⁰Jesús pia coutha nayaputane xua ichun axaibi peexanaewatsi, tsipei pia pepon weya taajiwansurucuaetsi pia peayapusu itorobi coyenewa tatsi. Bapoxonae Jesús napatomeicha necota jiwitha, jeye:

—¿Jintam inta paparuwa jayabara? jei Jesús.

³¹Nexata Jesús pijimonae jume notatsi, jeye:

—Apara xam bayatha taneme xua pin bicheito catsaquibaba. ¿Eta xua metha pana yainyabame: ‘¿Jintam metha inta paparuwa jayabara?’ jam? jei pijimonae tatsi.

³²Ichitha Jesús daxita jupaya tane peyaputaenexa pon pejayabiwatsi.

³³Barapowa bichocono junuwa, tsipei yaputane xua barapowa Jesús jayabatsi poxonae axaibi exanatsi. Barapowa jijiyeya patopa Jesththa, yawa pentabocototha uncua Jesús peitabaratha tatsi xua Jesús pebaru cui itura jinaeatsi peainya cuinxae. Barapowa bara xainyeya paeba daxita pocotsiwa xua exana. ³⁴Jesús jeye barapowatha:

—Yabuyo, caaxaibi exanatsi tana neyabara jume cowuntsixaem xua bara tana neitacupaewa xua tacaaxaibi exanaewatsi. Saya junte miya poponde. Bara axaibim tsaibim tsane xua bara nepu tsitecae tsane, jei Jesús.

³⁵Poxonae Jesús cataunxuae cueicueijejei tsuncuae barapowatha, bapoxonae pata pomonae Jairo pia botha petanacuichi jiwichi. Bapon

Jairo pecanamataxeinaein judiomonae pia penacaetutsi bo tatsi.

Barapomonae jeye Jairotha pon pexantiyo taatenetsi:

—Nexantiyo bayatha cata tupa. ¿Eta xua metha came fayacotame pon jiji Pecuidubin? jei barapomonae.

³⁶Bequein bara baxua Jesús jume tane, ichitha baxua Jesús jopa jume naitawatsiyo. Jesús jeye Jairotha:

—Jopa junuwinde, saya maisa nejume cowunde, jei Jesús.

³⁷Bapoxonae Jesús jopa copatsiyo xua pepuna ponaewatsi tsainchi ichamonae. Saya meisa Jesús copata, xua pepuna ponaenexa tsainchi Pedro, iru Santiago iru Juan pon Santiago peweicho tatsi. ³⁸Poxonae Jesusbaru pata Jairo pia botha tatsi, bapoxonae Jesusbaru tane pin bicheito xua ajumeyaexa. Barapomonae bichocono wecoyei, yawa wawai xua Jairo pexantiyo petatupaexaetsi. ³⁹Bapoxonae Jesús joniya botha, yawa tsipaeba barapomonaetha, jeye:

—¿Eta pocotsiwa metha paajumeyaexam, xua yawa pawecoyam? Barapo pexuyo apara jopa tupaeyo, apara maituncua, jei Jesús.

⁴⁰Ichitha barapomonae Jesús jume cui caponatsi. Nexata barapo pin bicheito Jesús pesato beitaweya. Meisa saya Jesús baru joniya coxiyun, coxiwano ichaxota Jairo pexantiyo tatsi petupaeyo tabocatsi. Matautano Jesús pijimonae baru joniya poyobe acoibi poyobe. ⁴¹Barapowayo Jesús cobe pita, yawa jeye:

—Talita, cum, jeichichi (xua apara jeichi: “Yabuyo, asiya uncuare, catsipaebatsi”, jei Jesús.)

⁴²Barapoxonae barapowa caena nainya nontapona, powa xua doce po weibe xeina powayo Jairo pexantiyoaxae tatsi. Barapowa asiya uncuwa, yawa itacupatsi xua peponaewa. Barapoxonae barapo pin bicheito poxonae baxua Jesús cui tainchi najuntu coyene cabenaeca. ⁴³Bapoxonae Jesús jume daunweya itoroba jiwitha xua baxua jopa peyabara paebinxatsi ichamonaetha pocotsiwa Jesús cana exana barapowayotha. Bapoxonae Jesús itoroba xua barapo pexuyo bara peapatsiwa tsainchi pexaewa.

Meje yabara poxonae Jesús Nazaret tomaratha popona

(Mt 13.53-58; Lc 4.16-30)

6 ¹Nexata Jesús Capernaum tomara weya warapa, equeicha caibeya pia tomara beya warapa xua Nazaret tomara beya. Iruru Jesús pijimonae puna poinchi. ²Poxonae judiomonae barompaya pia pentaquei seicae matabi tatsi tsuxubi, barapo matabitha Jesús tamropata pitaba xua cuiduba judiomonaetha judiomonae pia penacaetutsi botha tatsi. Pinmonae pomonae Jesús jume tayenatsi, barapomonae najuntu coyene cabenaeca, jeye:

—¿Eta xota metha bapon nacuiduba daxita baxua jane? ¿Jintam metha cata bapontha barapo peyaputae coyene jane, xua daxota bapon pexeinya

petsita itutsi coyenewa exana? ³Apara bapon pon naepan pematobin. Bapon apara María pexanto tatsi, apara iru Santiago pentapin tatsi, iru José pentapin tatsi, iru apara Judas pentapin tatsi, iru Simón pentapin tatsi. Apara bara iru pamchowaxi tatsi watomaratha jinompa, jei barapomonae.

Daxota barapomonae jopa xapain Jesús yabara jume cowantsichi. ⁴Ichitha Jesús jeye barapo jiwitha:

—Daxita jiwí ba baru cui itura jina pontha pon Nacom peayapusu itorobi jume pepaebin. Nama pia tomarapiwi tatsi, iru piamonae tatsi iru pia bomonae matabuxuyomonaepiwi tatsi, barapomonae ba jopa bapon baru cui itura jinaetsi, jei Jesús.

⁵Daxota Jesús jopa itacpaetsi xua pexeinya petsita itutsi coyenewan peexanaewa barapo Nazaret tomaratha po tomara pia tomaraxae tatsi. Saya meisa Jesús axaibi exana tsicamonaeyo pomonae peatenewi. ⁶Jesús najuntu coyene cabenaeca, tsipei barapomonae jopa yatsicaewa jume cowantsichi.

**Meje yabara poxonae Jesús pijimonae itoroba xua barapomonae
peyabara cueicueijeinexa jiwitha po coyene xua Nacom
waba jiwí xua petanaexanaenexatsi pijimonae tatsi
(Mt 10.5-15; Lc 9.1-6)**

Daxota Jesús cuidubapona tsiqui tomaraxitha po tomaraxi ena Nazaret tomara pecuariya. ⁷Jesús waba pijimonae pomonae doce poyobe tatsi. Jesús tamropata pitaba xua tsana itoroba tsiniya tomarantha be dos poyobe tsiniya. Jesús pijimonae cata pia peayapusu itorobi coyenewa, xua pijimonae tatsi peitawetsinexa caurimonae. ⁸Jesús pijimonae itoroba, xua pijimonae tatsi jopa pecaponaenexa pocotsiwan xua poxonae namtontha peponaenexa. Itoroba xua saya meisa pecaponaenexa naeton po naeton penacobena bababi naeton. Jopa bewa barapomonae pecaponaenexa cotein, yawa jopa bewa pecaponaenexa pexaewan, yawa jopa bewa pecaponaenexa paratixi. ⁹Yawa Jesús pijimonae itoroba xua bara nataxu xatabina sapaton, po sapaton pebuxumubiwan. Matautano barapomonae bewa nama xatabina saya be cae camisan. Jopa bewa caponae icha camisan. ¹⁰Jesús pijimonae barai, jeye:

—Poxonae papatame tomaratha moya bara paenare po botha papatame, xua beya abu poxonae pawarapaename barapo tomara weya. ¹¹Icha, icha tomarapiwi jopa paca matenta weyataeya wabiyo, matautano icha jopa paca jume naitawatsiyo pocotsiwa papaebame, nexata bapoxonae barapo tomara weya pawarapare. Po tsorobon painya taxutha dubena panataxu wenunbabare barapo tomaratha. Baxua paexande xua barapomonae peyaputaenexa xua apara barapomonae abe exana paxamtha, jei Jesús.

¹²Bapoxonae Jesús pijimonae tatsi ponarucupa Jesús pia xainya weya tatsi. Barapomonae cueicueijeji jiwitha xua bewa pinae jiwi icha juntu coyene xeinae Nacomtha xua peuraxae xua abe peexanae cuiru coyene exana Nacomtha. ¹³Barichino barapomonae taitaweta cauri pomonae cauri xeina. Matautano barapomonae caxueba penasiwatha pomonaetha pomonae peatenewi. Bapoxonae barapomonae axaibi exana pinmonae pomonae peatenewi.

Meje yabara poxonae Juan bexotsi pon Pebautisabin jiwi
(Mt 14.1-12; Lc 9.7-9)

¹⁴Herodes pon Galilea nacuapiwi itorobiya pia pepa peewatsinchi bapon jume tane xua juinya jiwi daxita jume tane pocotsiwa Jesús exana. Daxota bapon jeye:

—Juan pon jiwi Pebautisabin pon bequein bayatha tupa, equeicha asu juina. Daxota barapon Jesús xeina barapo peayapusu itorobi coyenewa xua exana pexeinya petsita itubi coyenewan, jei Herodes.

¹⁵Ichamonae Jesús yabara jeichichi:

—Bapon apara Elías xua equeicha asu, pon bayatha tupa, jei.

Iruru ichamonae jeye:

—Bapon apara pon Nacom peitorobi jume pepaebin icha pomonae ichi pomonae Nacom peitorobi jume pepaebiwi pomonae caena bayatha jinompa, jei xua ichamonae paeba.

¹⁶Poxonae Herodes baxua jume tane, jeye:

—Apara bapon Juan, pon yabara xua bayatha najume carutan xua bapon pewisi ucuibiwatsi. Anoxuae bapon equeicha asu petupae cuiru coyene weya, jei Herodes.

¹⁷Herodes baxua paeba, tsipei caena bayatha Herodes cui itoroba xua Juan pewaetabinexatsi, matautano xua pemaxu cubinexatsino matautano xua jiwi pecubi botha peetsinexatsi. Herodes baxua exana tsipei piowa tatsi powa pewun Herodías pia coutha baxua peichichipaexae. Barapowa copiya Felipe xeina pon Herodes peweicho tatsi. Herodes peweicho yacaiba yabuyo. ¹⁸Daxota Juan jiwi pecubi botha etatsi, tsipei Juan Herodes tsipaebatsi, jeichichi: “Nacom pia peitorobi coyenewa jopa copatsiyo xua xeiname bapowa tsipei bapowa eweicho piowa tatsi”, jei Juan.

¹⁹Daxota bapowa Herodías Juan bichocono casebatsi. Bequein bapowa ichichipa xua Juan pecaenaetaxubiwatsi xua ichamonae pebexubiwatsi tsainchi, ichitha jopa itacupaetsi bapowa. ²⁰Herodías jopa itacupaetsi xua peexanaewa baxua, tsipei Herodes Juan cunuwatsi. Bapon yaputane xua Juan bara xaniwaicha peexanaein, xuano matautano bara juntu coyene xanepana Nacomtha. Daxota jopa copatsiyo xua Juan bara abe pecana exanaenexa tsainchi. Bequein Herodes yabara unthuthu deideijeji

pocotsiwa Juan pepaebixae, daichitha awiya ichichipa pocotsiwa Juan pepaebiwa. ²¹Ichitha matacabi jopa, po matacabitha Herodías itacupatsi xua Juan abe pecana exanaewatsi. Herodes yantacabi jopa, po matacabitha caena bayatha Herodes naexana poxonae pexuyo. Barapo matacabitha Herodes exana pin penabanaewa. Bapon waba pomonae iru pentacaponae, pomonaetha itoroba xua iru tacanamataxeinatsi icha tomarantha. Iruno wabano pomonae soldadomonaepia pia pepa pentacaponae tatsi. Iruno wabano pomonae ainya cui penaexanae jiwi Galilea nacuatha. ²²Herodías pexantiyo tatsi patopa po tututha ichaxota nabanathopa. Barapowa tsita yaweibuncua xua barapomonaepia tane. Baxua Herodes ichichi xeica xua bapowa yaweibuncua. Iruru pomonae baxota naxayena, ichichi xeica baxua. Bapoxonaepia Herodes jeye bapowatha.

—Newucare pocotsiwa xua neichichipaewa, bapoxonaepia cacatsinchi jinya beta neyaweibixae, jei Herodes.

²³Bapon Herodes yabara tsiwunaepia muxu dutsiya jeye:

—Bara cacatsinchi pocotsiwa xua newucame. Metha bequein newucaetsipame xua tanacua epa toyatsipan baraxua bara cacatsinchi, jei.

²⁴Barapowa pona xua peyainyabinexa pena, jeye:

—Ena, ¿eta pocotsiwa metha wucacuaein? jei.

Barapowayo pena jume notatsi, jeye:

—Wucare Juan pentasipa tatsi, pon jiwi Pebautisabin matasipa, jei Herodías.

²⁵Barapowayo bapoxonaepia caena nainya pona ichaxota eca Herodes. Jeye bapontha:

—Ichichipan xua nainya anoxuae tanecatsiwam tsane paratontha Juan pentasipa tatsi, pon jiwi Pebautisabin matasipa, jei.

²⁶Bapoxonaepia Herodes bichocono unthuthu wecoyei. Ichitha tsipei bayatha yabara petsiwunaepia muxu dutsixae xua bepa pinae catsina pocotsiwa wucaeinchi, matautano tsipei pejume taexaetsi pomonae bayatha waba, daxota Herodes jopa bejume totabiyo pocotsiwa wucatsi. ²⁷Bapoxonaepia caena nainya Herodes itoroba soldadomonaepin xua pecarenaenexa tsane paratontha Juan pentasipa tatsi. Bapon pona jiwi pecubi bo beya. Baraxotiya Juan wisi ucuibatsi. ²⁸Barapo soldadomonaepin matasipa carena paratontha. Bapon cata yabuyotha. Barapowayo xuya pena cata.

²⁹Pomonae Juan pia pepuna jinompaewichi jume tane xua pinae Juan bexotsi. Bapoxonaepia barapomonaepia pona jiwi pecubi bo beya xua Juan pepichinexa tsainchi petupaepin, yawano xua peboyaenexa tsainchi ibo wou muthu iya.

Meje yabara poxonaepia Jesús apata pexaewa cinco mil pebiwi
(Mt 14.13-21; Lc 9.10-17; Jn 6.1-14)

³⁰Bapoxonaepia pirapae Jesús pia peitorobiwi tatsi, Jesús baru nacaetutatsi. Barapomonaepia Jesús tsipaebatsi xua daxita pocotsiwan

barapomonae peexanaexae, yawano pocotsiwa xua bayatha barapomonae cuiduba. ³¹Jesús pijimonae tsipaeba, jeye:

—Anetha poinchi, xua wanaffina ewatsinexa tsainchi saya caeto ichaxota jiwaibi beya, jei Jesús.

Daxota Jesús baxua paeba, tsipei pinmonae Jesús itata pateibatsi, xua poxonae naepanaya poneiba. Daxota Jesús iru pijimonae tatsi jopa itacupaetsi xua pexaewa tsane. ³²Barapoxonae Jesús, iru pijimonae tatsi compa ponarucupa jeratha ichawatha beya xua ichaxota jiwaibi beya. ³³Ichitha pin bicheitomonae tane poxonae Jesús iru pijimonae tatsi jeratha pona. Barapo pin bicheitomonae Jesusbaru yaitainchi. Barapo pin bicheitomonae daxita tomaran wecuinaeyiya. Bapoxonae pata ichaxota jiwaibi beya. Barapomonae tsiwanaya patatsi Jesús. ³⁴Poxonae Jesús jera wenontouna bapoxonae Jesús tane pin bicheito. Jesús yabara najuntu coyene xeina xua barapomonae peyawenaenexatsi. Barapomonae jopa xeinaeyo pon peyawenaen barapomonaetha icha be oveja ichi poxonae jopa xeinaeyo pon peyapu eenaen. Daxota Jesús barapomonaetha cuiduba ainya coyenein. ³⁵Poxonae tabopiya tsanaichaba Jesús pijimonae itata patatsi, jeye Jesustha:

—Bayatha tabopiya tsanaicha. Xote apara bon ajibi xua ichaxota jiwi jinompa. ³⁶Barapomonae itorobare ichaxota po bon pipatotha umena yawa ichaxota xua tomaranxitha xua imoxoyo wacuariya xua barapomonae pecomocaewa pexaewa. Tsipei xote pexaewa ajibi, jei pijimonae tatsi.

³⁷Ichitha Jesús pijimonae barai, jeye:

—Paxam jame moya paapare pexaewa, jei.

Barapomonae jeye:

—¿Xam ichichipame xua pata upain comocaewa tsane barapo bicheitomonae ainya panmonaein xua pata comocaenexa doscientos po paratiximonaebetha pocotsi paratiximonaebe xeineiba pomonae nacuiteiba doscientos matabibetha? jei barapomonae.

³⁸Jesús barai pijimonae, jeye:

—Pan zeta xoyobe paxeiname? Incane matha pataema, jei.

Poxonae barapomonae yaputane jeye Jesustha:

—Cinco po panyobe, yawa dos poyobe duweiyobe, jei barapomonae.

³⁹Jesús pijimonae najume caruta xua bepa daxita barapo bicheito iratha taenaetsei naepanaewatha xua pepa bicheiton tsana naexana tsiniya.

⁴⁰Barapo pin bicheito pepa bicheito naexana tsiniya. Icha bicheito cien poyobe tsiniya. Icha bicheito cincuenta poyobe tsiniya. ⁴¹Barapoxonae Jesús pecobetha pita pan cinco po panyobe. Yawa pita duweiyobe xua dos poyobe. Bapoxonae Jesús peitaboco benecoicha, Nacomtha tsipaeba jeye: “Axa maisa juntu coyene weiweinan, xua pexaewa pata tanecatsiwaxaem”, jei Jesús. Barapoxonae Jesús epa janaxuba pan. Jesús

pijimonae cata barapo pan, xua pijimonae tatsi xuya pecatsibaponaenexa barapo pin bicheitotha. Barichi Jesús duweiyobe epa janaxubabe. Bapoxonae apata barapo pin bicheitotha. ⁴²Barapo pin bicheito bara daxita nabane. Bara jain cowıntarucupatsi. ⁴³Barapoxonae Jesús pijimonae tatsi doce po cotebe wumba xua nacopaba xua bayatha barapo jiwi jopa xaeyo petonsanaexae. ⁴⁴Pomonae xua barapo pan pexaexae barapomonae cinco mil pebiwimonae.

Meje yabara poxonae Jesús mene matatsun jumatha pona

(Mt 14.22-27; Jn 6.16-21)

⁴⁵Pirapae Jesús pijimonae itoroba xua peponaenexa jeratha, xua icha muxunene beya. Barapomonae Jesús tsiwana payatsi Betsaida tomara beya. Barapoxonae Jesús napeyaba barapo pin bicheito. ⁴⁶Poxonae Jesús napeyaba barapo pin bicheito, bapoxonae Jesús pona demxuwatheicha xua petsipaebinexa Nacomtha. ⁴⁷Poxonae bayatha quirei tsanaicha, bapoxonae Jesús pijimonae tatsi iru jeratha tuwatha yanapona. Jesús iru compa pecaetha popona. ⁴⁸Jesús tane xua barapomonae bichocono daunweya nowaeta tsipei dawerena bichocono joibo daunwei. Poxonae mataqueiwunaeyo tsoponae, Jesús pijimonae imoxoyo caquita pona. Bapon mene matatsun jumatha pona. Jesús juntucuru xenta iya barapomonae. ⁴⁹Poxonae Jesús pijimonae tainchi xua mene matatsun jumatha pona, barapomonae itaraerowiya nanta xeina, xua Jesús itara mexeya dowatsiwejei. Yawa barapomonae wawai. ⁵⁰Daxota barapomonae bichocono wawai, tsipei daxita barapomonae tane, yawa bichocono cuitaya junuwa. Ichitha Jesús barai barapomonae, jeje:

—iApara xan! iJopa pajunuwinde! iMaisa pajuntu coyene weiweinare! jei Jesús.

⁵¹Bapoxonae Jesús jeratha nontabiya barapomonae pia xantha tatsi. Barapoxonae joibo caewanaya exana. Barapomonae bichocono najuntu coyene cabenaeca. ⁵²Barapomonae baxua exana, tsipei barapomonae cataunxuae jopa yaputaeyo xua apara Jesús pon Nacom itoroba. Bequein bapon pexeinya petsita itutsi coyenewa exana poxonae apata pan pin bicheitomonaetha, barapomonae jopa beyaputaeyo pia juntu coyenewantha.

Meje yabara poxonae Jesús axaibi exana pomonae peatenewi,

pomonae Genesaret nacuapiwi

(Mt 14.34-36)

⁵³Jesús, iru pijimonae tatsi bara pitapa berubenathopiya xua pucua weya. Genesaret nacuatha pata. Baxota jera quetanota pitapatha. ⁵⁴Poxonae Jesús jera wenontouna, bapoxonae caena nainya pinmonae Jesús yaitaerucupatsi. ⁵⁵Bapoxonae barapo jiwi bara wecuinaeyiya

daxita barapo ira weya. Matautano carendena pocotsiwa pemaichiwatha pomonae atenemonae, Jesús pia xainya betacayiyatsi. ⁵⁶Daxitantha ichaxota Jesús ponaena, ichaxota bequein tsica tomaraxi, ichaxotano bequein pin tomaran, ichaxotano bequein tomaran cuariya, daxita barapomonae capona peatenewimonae. Barapo peatenewimonae jebatsi namtontha. Barapomonae Jesús wucatsi xua Jesús petajayabinexatsi pia paparuwa peopirato tatsi. Daxita pomonae Jesús pia paparuwa tajayabatsi daxita barapomonae axaibi tsurucpeibi.

**Meje yabara poxonae Jesús yabara paeba xua pebin
abe peexanae cuiru coyene juntu webocatsi
(Mt 15.1-20)**

7 ¹Nexata fariseomonae, iru pomonae jiwi pecuidubiwi Moisés pia peitorobi coyene tatsi xua pomonae Jerusalén tomara werendena, daxita barapomonae Jesús imoxoyo caquita poinchi. ²Barapomonae tane xua Jesús pijimonae tatsi jiwana najuntu coyene taxoba xuano xua daxota Nacom tsita natsicuentatsi abe peexanaexae poxoru jopa matha nacobe quiatsiyo poxonae xane. Daxota barapomonae nanta xeina xua Jesús pijimonae tatsi pomonae peantucuiruyapube jiwi. ³(Barapomonae aichaxaibi xua Jesús pijimonae tatsi jopa matha nacobe quiatsiyo poxonae xane, tsipei fariseomonae iru daxita judiomonae jopa daichiyo. Barapomonae pia cui xeina xua jopa xaibiyo poxonae jopa matha tsiwanaya daunweya nacobe quiateibiyo. Barapomonae barapo cui coyene exana xua po cui coyene pia pamo susato jiwi tatsi copiya cananta forota. ⁴Poxonae barapomonae caibe nawibeibarena ichaxota po bon xua pexaewa pecaenaetsiwan weya, bapoxonae copiya tsiwanaya merantha naperu tsicababeiba xua poxonae xane. Barichi barapomonae icha coyeneinno exanapona xua peitorobi coyenewantha itoroba xua poxonae corotixi itapa quiata, yawano corotonno xua caseta itapa quiata yawano paraton po paraton pecaxae paraton itapa quiata yawa caman.) ⁵Bapoxonae fariseomonae, iru pomonae jiwi pecuidubiwi Moisés pia peitorobi coyene tatsi, jeye Jesustha:

—¿Eta xua metha jinya jiwimonae jopa exanaeyo xua pocotsiwa wamo susato jiwi pia peitorobi cui coyenewatha itoroba xua penajuntu coyene taxobiyainwa? Jinyamonae barapo cui jopa exanaeyo xua jopa matha tsiwanaya nacobe quiateibiyo poxonae beya xaiba. Daxota jinyamonae pomonae peantucuiruyapube jiwi xua penajuntu coyene taxobixae, jei barapomonae.

⁶Jesús jume nota barapomonae, jeye:

—Bara Isaías pon Nacom peitorobi jume pepaebin beta xaniwaicha paca yabara paeba xua paxam pomonae itara mexeya xanepanaeya pepaebi jiwi pam, daichitha apara abeya peexanae jiwi pam. Bapon paca yabara tinaeya jeye, xua Nacom paeba:

‘Barapomonaē neyabara barū cui itura jina
poxonaē cueicueijeī tsaibi, ichitha pejūntū
coyenewantha jopa neantobeyo.

⁷Pocotsiwa poxonaē barapomonaē wūnaē
nejainta saya pejume pawī.

Po peucidubiwa xua barapomonaē cuiduba jiwitha
saya apara jiwi pia peitorobi coyenewa tatsī,
jei Nacom xua Isaías tatina Nacom, jei Jesús.

⁸Equeicha Jesús jeye barapo fariseomonaetha irū pomonaetha pomonaē
peucidubiwi Moisés pia peitorobi coyene tatsī:

—Saya paxam panaitematame pocotsiwa Nacom pia peitorobi
coyenewa tatsī painya exanaenexa po peitorobi coyenewa painya amo
susato jiwi copiya canamata forota. Paxam baxua paexaname poxonaē
jiwi paitorobame xua jiwi matha penacobe quiateibinexa poxonaē xaiba
penajūntū coyene taxobiyainwa, jei Jesús.

⁹Equeicha Jesús barapomonaetha jeye:

—Itapetsiya painya neexanaenexa pocotsiwa painya amo susato jiwi pia
peitorobi coyenewatha itoroba, daxota bichoina pajume itawetame Nacom pia
peitorobi coyenewa tatsī. ¹⁰Bayatha Moisés pia peitorobi coyenewatha itoroba,
jeye: ‘Axa barū cui itura jinare, irū ena barū cui itura jinare’, jei. Equeicha
bapon Moisés jeye: ‘Pon abe yabara paeba paxa, xua jopa peyawenaewa
paxa ichacuiitha tsipae xua penatha, bara bapon bewa tūpaena’, jei Moisés.

¹¹Ichitha paxam papaebame, xua pinae pebin bara itacūpatsī xua paxatha
tsipaeba, ichacuiitha xua penatha xua jeye: ‘Jopa neitacūpaeyo xua tapaca
cayawenaewatsī, tsipei daxita pocotsiwa xeinan xua bequein pocotsiwatha
tapaca cayawenaewatsī tsainchi baxuan daxita Nacomtha catan’, xua jei
pebin. ¹²Poxonaē peburūya payabara nanta xeiname xua bapon baxua paeba,
bapoxonaē bara pacopatame xua barapo pebin jopa penantawenonaewa
xua peyawenaewa paxatha, irurū xua penatha. ¹³Poxonaē paexanaponaē
pocotsiwa painya amo susato jiwi pia peitorobi coyenewatha itoroba, xuano
xua ichamonaē pacana exaname xua baxua irū exana bapoxonaē paxam
Nacom pia peitorobi jume pecui pawī jume pacana exaname. Barichi
ichawanno xua be jūpa xua peabe coyenein paexanameno, jei Jesús.

¹⁴Equeicha Jesús waba barapo bicheito pia xainya berena, jeye:

—Daxita paxam pana nejume taema yawa pana nejume copi yaputaema
pocotsiwa paca tsipaebinchi. ¹⁵Pocotsiwa ba pebin pecoiboto deca
tsijain jojonecatsī pexaewan, barapo coyene apara ba jopa bapana pebin
antūcuiyapube exanaetsī xua poxonaē pocotsiwa peexanaexae. Jame
pocotsiwa ba pebin nanta xaina xua pecoibototha caunuta xua peabe
jume, barapo jume coyenewatha jame pebin antūcuiyapube exanatsī
xua poxonaē pecueicueijeixae baxua. ¹⁶Icha pamuxu dubename, moya
pana nejume naitaware pocotsiwa tapaca tsipaebiwatsī, jei Jesús.

¹⁷Poxonae Jesús jiwi cuenta pona yawa bo bejoniya, bapoxonae Jesús pijimonae yabara yainyabatsi barapo pecayabara juta pepaebi diwesiyo. ¹⁸⁻¹⁹Jesús jume nota pijimonae jeye:

—iPaxam bara paichim icha fariseomonae ichi! Jopa payabara yaputaem barapo pecayabara juta pepaebi diwesiyo xua pexaewa yabara. Bayatha paxam payaputaneme pocotsiwa pebin tsjain jojonecatsi pexaewa pecoiboto deca, barapo pexaewa jopa abe cana exanaeyo pebin pia jüntu coyenewa. Barapo pexaewa pebin jopa antucuiruyapube exanaetsi. Barapo pexaewa jopa ponaeyo pia jüntu coyenewatha. Jame barapo pexaewa pecotsorotha pona. Bapoxonae pexaewa aichurucuae nawexacaeca, jei Jesús.

Poxonae Jesús baxua paeba jiwi yaputane xua daxita pexaewan bara wuna pexaenexa. Jopa jiwi antucuiruyapube exanaetsi. ²⁰Equeicha Jesús namchi, jeye:

—Pocotsiwa pebin pecoibototha caunuta xua peabe jume, barapo jume coyenewatha jame pebin antucuiruyapube exanatsi. ²¹⁻²²Tsipei pejüntu coyenewatha pebin nanta xeina, xua meje bapocotsiwanje: Abe penanta xeinae coyenewa, iru peita coxanae coyenewatsi coyenewa xua poxonae penayaputae jiwi naperu nacoyaba, iru ichun piawa tatsi pecaibi coyenewa, iru ichun anaya pebexotsi coyenewa, iru ichun piseuri tatsi pepichi coyenewa, iru ichun piawa tatsi peichichipae coyenewa, iru abe peexanae coyenewa, iru ichun pemuxitorobiwatsi coyenewa, iru peyuyujei coyenewa, iru peuwi coyenewa, iru ichun peyabara naerabiwatsi coyenewa, iru ichamonae peaebi coyenewatsi, iru jopa xainyeya peexanae coyenewa poxonae bequein yaputaetha xua jopa bewa exanae. ²³Daxita barapo coyenein pejüntu coyene weya jume pichapa. Barapo jume coyeneintha pebin antucuiruyapube exanatsi, jei Jesús.

**Meje yabara poxonae yabuyo powayo penanapaincha
poponaewayo Jesús jume cowuntatsi
(Mt 15:21-28)**

²⁴Bapoxonae Jesús bara weya pona. Tiro tomara beya pona. Sidón tomara beya ponano. Jesús botha joniya. Bequein Jesús aichaxaibi xua jiwi yaputane ichaxota bapon eca, ichitha Jesús jopa itacupaetsi xua nameicha eca. ²⁵Barapoxonae caena nainya petsiriwa jume tane xua Jesús botha eca. Barapowa pexantiyo tatsi cauri xeina. Daxota barapo petsiriwa patopa Jestutha. Yawa pentabocototha uncua Jesús peitabaratha tatsi xua bapowa petsita ainya cuixaetsi. ²⁶Barapowa penanapaincha poponaewayo pecueicueijeixae griegojume. Jopa judiomonae jitowayiyoy. Bapowa sirofeniciamonaewayo naexana penaexanaexae Fenicia tomaratha xua Siria nacuatha. Barapowa Jesús wucatsi jeye:

—Taxantiyo inta taitawere cauri, jei barapowa.

²⁷Ichitha Jesús jume nota barapowatha pecayabara j̄ta p̄paebi diwesiyotha, jeye:

—Jopa bewa ba auri apatsi p̄xaewa pocotsiwa p̄xui pia p̄xaewa tatsi. Baxua caunutsiya apara yabara paeban xua jopa bewa catsin tsane pomonaetha pomonae penanapaincha jinompaewi pomonae jopa judiomonae naexanaeyo xua pocotsiwa barompaya judiomonae piawa tatsi. Daxota jopa w̄naeyo xua cayawenatsi, jei Jesús.

²⁸Barapowa jume nota Jesustha pecayabara j̄ta p̄paebi diwesiyotha, jeye:

—Aa, bara barichi xuaunxuae netsipaebame ponxaem Tanecanamataxeinaem. Xainyei paebame. Jopa ba bewa auri catsibi p̄xui pia p̄xaewa tatsi. Daichitha auri ba xane pocotsiwa p̄xui sorobaba barapo p̄p̄r̄w̄ixi pocotsiwa p̄xaethopaewa p̄b̄x̄p̄ana tsica othopecica. Bara j̄tiya ichiya necana ichinde, daichitha neyawende, jei bapowa.

²⁹Barapoxonae Jesús barai barapowatha, jeye:

—Bara xaniwaicha paebame daxota cayawenatsi. Moya bara bara beya ponare. Bara bayatha nexantiyo w̄pu poinchi cauri, jei Jesús.

³⁰Poxonae barapowa patopa pia botha, p̄xantiyo taebota xua camatha j̄ntema boca. Matautano tane xua bapowayo bayatha w̄pu poinchi cauri.

Meje yabara poxonae Jesús axaibi exana pon pemuxusipanaein

³¹Bapoxonae Jesús Tiro tomara weya pona, xua caibeya pona, ichaxota Sidón tomara iya pona. Matautano ichaxota diez po tomaranbe iya pona po tomaran pewun Decápolis. Bapoxonae Galilea p̄cuatha patopa. ³²Baraxotiya Jesús pia xainya berena tacapoinchi pebin pon muxusipana, matautano xua jopa itac̄paetsi xua pecueicueijeiba. Pomonae pecarendenaexae bapon, barapomonae Jesús w̄catsi, xua Jesús penta jayabiwa tsane xua bapon axaibi peexanaenexa tsainchi. ³³Barapo pebin Jesús aisowa bebaru p̄inya pin bicheito pia xainya weya tatsi. Jesús pecobesitobetha nantiyabe muxu yauxatata. Poxonae naone sutaba peone pecobetha bapoxonae barapo cobetha ebato jayaba bapontha. ³⁴Bapoxonae Jesús peitaboco benecoicha, yawa najumei cajujuina, yawano jeino bapontha: “iEfata!” jeichichi, (xua jeichichi: “iMuxu nasabare!” jeichichi.)

³⁵Bapoxonae caena nainya bapon muxu nasaba nantiyabe. Matautano bara ebato xanepana. Matautano bara itac̄patsi xua pecueicueijeiba beta. ³⁶Bapoxonae Jesús barai barapomonae, jeye: “Jopa ichamonaetha pana neyabara paebinde pocotsiwa exanan”, jei Jesús. Bequein Jesús matowa tsipaeba baxua, daichitha barapomonae awiya baxua yabara p̄beiba ichamonaetha beyacaincha xua Jesús

jume matawenta. ³⁷Barapomonae najuntũ coyene cabenaeca, yawa jeino: “iMaisa barapon bichocono daxita coyeneya xanepana exana! Pomonae pemuxusipanaewi equeicha beta jume tane, yawa bara cueicueijej”, jei barapomonae.

Meje yabara poxonae Jesús pexaewa apata cuatro mil pebiwi
(Mt 15.32-39)

8 ¹Bapoxonae icha matacabitha pinmonae nacaetuta Jesús pia xantha tatsi. Jopa xeinaeyo pocotsiwa xua pexaewa tsane. Bapoxonae Jesús waba pijimonae, yawa jeye:

²—Barapomonae yabara najuntũ coyene xeinan tayawenaenexa, tsipei barapomonae bayatha xote nebarũ jinompa acoibi po matacabibe. Anoxuae jopa xeinaeyo xua pocotsiwa pexaewa tsane. ³Icha barapomonae jainbotha pu itorobichipan pia bon beya, piyain namtotha xuirabathopaetsipa. Metha xuirabathopaetsipa tsipei ichamonae bayatha tajũ werendena, jei Jesús.

⁴Jesús pijimonae jume notatsi, jeye:

—Paxan jopa pana itacũpaeyo xua barapomonae pexaewa pata apatsiwa, tsipei xote jiwaibi xua pata comocaenexa pexaewa, jei Jesús pijimonae tatsi.

⁵Jesús yainyaba pijimonae, jeye:

—¿Eta po panyobe paxeiname? jei.

Jesús jume notatsi pijimonae, jeye:

—Siete po panyobe paxeinan, jei.

⁶Nexata Jesús pijimonae najume caruta xua bepa pinae barapo jiwi iratha taenaetsei. Jesús pecobetha pita barapo siete panyobe. Bapoxonae Nacomtha tsipaeba jeye: “Axa, maisa jũntũ coyene weiweinan xua pexaewa pata tanecatsiwxaxaem”, jei Jesús. Bapoxonae Jesús pan epa janaquiya nacobe weta. Bapoxonae Jesús pijimonae catsibapona, xua pijimonae tatsi xuya pecatsibaponaenexa barapo bicheitotha. ⁷Barichino barapomonae be conotha xeina duweixi poxi tsiquirixi. Jesús Paxa tsipaeba jeye: “Axa, maisa jũntũ coyene weiweinan xua pata tanecatsiwxaxaem duweixi”, jei Jesús. Poxonae Jesús epa janaca, bapoxonae pijimonae cobe itoroba xua pecatsibaponaenexa barapo bicheitotha. ⁸Daxita barapomonae bara xane. Daxita bara jain cowũntarũcupatsi. Pirapae awiya equeicha wumba siete po cotebe xua nacopaba pocotsiwa xua barapomonae bayatha jopa xaeyo petonsanaexae. ⁹⁻¹⁰Pomonae nabane pexaewa, barapomonae cuatro mil pebiwi. Bapoxonae Jesús pu itoroba barapomonae, xua penawibiyaenexa pia tomaran beya. Bapoxonae caena nainya Jesús, irũ pijimonae tatsi, jeratha nonobabiya pewarapaenexa Dalmanuta nacia beya.

Meje yabara poxonae fariseomonae Jesús cui itorobatsi xua peexanaewa
tsane pexeinya petsita itutsi coyenewa
(Mt 16.1-4; Lc 12.54-56)

¹¹Bapoxonae fariseomonae pata Jesustha. Barapomonae tamropata notarũcũpa xua najume matsontsonoba exana Jesustha. Barapomonae

Jesús pejũntũ coyene jũjũtsinexatsi, daxota Jesús piraichi cui itorobatsi pia petsita itũtsi coyenewa pocotsi coyenewa xua cana exana itaboco wetsica. Barapomonae jopa bapon jume cowũntsiichi icha jopa itacũpaetsi xua exana petsita itũtsi coyenewa. ¹²Jesús najumeicauna pejũntũ coyene weya poxoru barapomonae bapon amuxucoyenefaetabi exanatsi. Bapoxonae jeye:

—¿Eta pocotsiwa metha barapomonae tapexeinya tsita itũtsi coyenewa necui itoroba jane? Bara xainyeya paca tsipaebatsi jopa bapana beexanaeinyo baxua, xua barapomonae necui itoroba, jei Jesús.

¹³Bapoxonae Jesús cuenta pona barapomonae jeratha, peponaenexa icha muxunene beya xua pucua iya.

**Meje yabara poxonae Jesús pijimonae yabara yaputane
exana pocotsiwa pan cotowa exana
(Mt 16.5-12)**

¹⁴Jesús pijimonae tatsi jũntemaina xua capona pan. Meisa cae pan capona jeratha, po nae pin naetha. ¹⁵Jesús itoroba pijimonae, jeye:

—Dota pam, jopa pajume naitaewatsinde fariseomonae pia pecuidubi coyenewa tatsi xua painya nejume cowũntsiyainwa. Mataũtano dota pam, xua Herodes pia pecuidubi coyenewa tatsi xua painya nejume cowũntsiyainwa. Barapo pecuidubi coyenewan jiwi ichawa beya ajũntũcuicoyeneyapube cana exanapoinchi icha be pocotsi coyene ichi xua levadura matawũn xua pan cocotowa exanapona beya poxonae pin pan, jei Jesús.

¹⁶Jesús pijimonae tatsi tamropata notarũcũpa xua caemonae natsipaeba, najei: “Metha apara poxoru jũntemainatsi xua caponatsi po pan xua levadura cotowa exana, daxota metha baxua Jesús jũntũ coniquiya naca muxu tsipaeba”, najei barapomonae.

¹⁷Jesús yaputane pocotsiwa pijimonae tatsi natsipaeba. Ichitha poxoru Jesús yabara paeba xua fariseomonae irũ Herodes pia pecuidubiwans tatsi daxota Jesús yainyaba piamonae:

—¿Eta xua metha pana natsipaebame xua jopa painya necaponaexae pan? Baxua papaebame apara poxoru jopa pana nejume yabara cowũntsim pocotsiwa paca cuidubatsi. Cataunxuae jopa pana necui yabara yaputaem poxoru jopa paichichipaem xua painya neyaputaewa tsane painya jũntũ coyeneintha. ¹⁸Paxam bequein pana necui taneme, ichitha jopa xaniwaicha pana necui yaputaem. Mataũtano bequein bara pana nejume taneme ichitha jopa xaniwaicha pana nejume copi yaputaem. Mataũtano pajũntemainame poxonae pexeinya petsita itũtsi coyenewa exanan jiwi nexa poxonae pan catan jiwitha. ¹⁹Poxonae janacan pan xua cinco po panbe xua cinco mil pebiwi nexa, ¿eta po cotethabe pawũnbaponame xua pocotsiwa nacopaba? jei Jesús.

Barapomonae Jesús jume notatsi, jeye:

—Doce po cotebe apara, jei Jesús pijimonae tatsi.

²⁰—Poxonae janacan pan xua siete po panbe xua cuatro mil jiwi nexa, ¿eta po cotethabe pawñbaponame xua pocotsiwa nacopaba? jei Jesús.

Barapomonae Jesús jume notatsi jeye:

—Siete po cotebe apara, jei Jesús pijimonae tatsi.

²¹Nexata Jesús pijimonae barai xua muxu jei:

—Metha matapainya payaputaename xua apara jopa yabara paca tsipaebichi pan. Apara jame paca tsipaebatsi xua jopa bewa pajume cowuntsim tsane fariseomonae iru Herodes pia pecuidubiwani tatsi, jei Jesús.

**Meje yabara poxonae Jesús itacuere wunaeta pon
peitata nacutsin Betsaida tomaratha**

²²Jesús pijimonae baru botouna jeratha Betsaida tomaratha. Barapo tomarapiwi jiwana carendena pon peitata nacutsin, Jesús pia xantha tatsi. Barapomonae Jesús wucatsi, xua bapon pemata jayabinexatsi xuano xua axaibi peexanaenexatsi. ²³Jesús cobe pita pon peitata nacutsin. Bapon cobe capoinchi aisowa beya xua tomara weya. Bapoxonae Jesús naone sutaba bapon peitamaiqueitobetha, itacuere jayabano. Jesús bapon yainyaba jeye:

—¿Bara caitacupa xua netaewa? jei Jesús.

²⁴Bapon necotaxuba, bapoxonae Jesús jume notatsi, jeye:

—Pebiwi tan, daichitha itanonojan. Jiwi saya be naewan jinompa, jei bapon.

²⁵Equeicha Jesús pecobetha itamaiquei jayaba nantiyabe. Barapo pebin daunweya naitata babatsiya tane. Bapoxonae itamaiquei xanepana. Bapon bara beta matapainya wunae tane. ²⁶Jesús itorobiya jeye bapon xua penawiyaenexa pia bo beya:

—Jopa tomaratha ponaeinde xua jopa baxua taneyabara cueicueijeinexa jiwitha, jei Jesús.

Meje yabara poxonae Pedro namchi Jesustha jeye:

“Xam apara Mesías pon Nacom caitorobica”, jei

(Mt 16.13-20; Lc 9.18-21)

²⁷Bapoxonae Jesús, iru pijimonae tatsi pata tsiqui tomaraxitha, po tomaraxi pewñ Cesarea de Filipino. Poxonae namtotha cataunxuae enapona, bapoxonae Jesús pijimonae yainyaba, jeye:

—¿Eta jiwi neyabara jei po coyene xua xan bapon aparan? jei Jesús.

²⁸Barapomonae Jesús jume notatsi, jeye:

—Ichamonae cayabara jei: ‘Apara bapon Juan, pon jiwi Pebautisabin pon equeicha petupaein asu juina’, jei. Iru ichamonae cayabara jei: ‘Apara

bapon Elías, pon equeicha petupaein asu juina', jei. Iruru ichamonaе cayabara jei: 'Apara bapon jiwana, pomonaе Nacom peitorobi jume pepaеbiwi', jei, jei Jesús pijimonaе tatsi.

²⁹Bapoxonaе Jesús pijimonaе yainyaba, jeye:

—¿Incane iru paxamdu? ¿Eta paneyabara jumichimdu xua xan eta pondun? jei Jesús.

Bapoxonaе Pedro, Jesús jume notatsi, jeye:

—Xam apara Mesías, pon Nacom caitorobica, jei Pedro.

³⁰Jesús pijimonaе muxu barai xua pijimonaе jopa peyabara paеbinexatsi ichamonaetha baxua.

**Meje yabara poxonaе Jesús nayabara diwesi
paеba po coyene xua petupaewa tsane
(Mt 16.21-28; Lc 9.22-27)**

³¹Bapoxonaе Jesús tamropata pitaba xua pijimonaе tsipaеba pocotsi coyene xua Jesús cana exanaeinchi ichamonaе, Jesús jeye: “Xan ponxaein Nacom Tananeitapetsin jiwi bichocono neperaxa jubina. Matautano pitiri jiwi, iruru sacerdotemonaе pia pentacaponaei tatsi, iruru pomonaе jiwi pecuidubiwi Moisés pia peitorobi coyene tatsi, daxita barapomonaе neitawetsina. Matautano barapomonaе nebexubina. Ichitha equeicha asu poponaеin poxonaе acoibi po matabiyobe tsuxubi tsane”, jei Jesús.

³²Baxua Jesús pijimonaе wunaeya muxu tsipaеba xua barapomonaе bara xaniwaicha peyaputaenexa. Bapoxonaе Pedro, Jesús compa aisowa bebaru poinyatsi, Pedro Jesús jume daunweya tsipaebatsi xua Jesús jopa pepaеbinexa baxua. ³³Jesús pijimonaе napatomeicha necota. Bapoxonaе jume daunweya jeye Pedrotha:

—iXam be pon caurimonaе pia pentacaponaein tatsim! Bara newepu ponare, tsipei xam jopa beta nanta xeinaem icha be jopa Nacom ichim poxonaе xua beta nanta xeina. Saya xam nanta xeiname icha jiwi ichi poxonaе nanta xeina, jei Jesús.

³⁴Bapoxonaе Jesús waba pin bicheito, matautano wabano pijimonaе, yawa jeye daxita barapomonaetha:

—Icha pebin ichichipa xua tajiwiwimonaе jiwana pin penaexanaewa tsane, bewa bapon yabara naitematsi pocotsiwa xua bapon ichichipa pia peexanaе coyenewan tatsi. Bapoxonaе jame bapon bewa eexanaponae pocotsiwa itoroban, bequein bara bapon bexotsi ichamonaе, tajiwiwimonaе jitonxae. ³⁵Pon naantobeya nata exana pocotsiwa bapon ichichipa, bapon jopa xeinaeyo peajuntuyarusawa, po peajuntuyarusawa ataya tsiteca xua Nacom pia nacia beicha. Ichitha pon neantobeya inta exana pocotsiwa ichichipan tana neantobexae xuano xua pecueicueijeixae Nacom Pejume Diwesi, bapon xeinaena peajuntuyarusawa, po peajuntuyarusawa ataya tsiteca xua Nacom pia nacia beicha. ³⁶Icha pebin bichocono

copei xeina pocotsiwa xeina po cae pin nacuathe, ichitha jopa xeinaeyo peajuntucoyenesuwa po peajuntucoyenesuwa ataya tsiteca, bapoxonae bapon jopa itacupaetsi xua penajuntu coyene capanepaewa xua peweraweracaewa tsane. ³⁷Tsipei pebin jopa itacupaetsi xua barapo copeitha Nacom pematomatsiwatsi, xua bapon pecatsinexa tsainchi peajuntucoyenesuwa xua barapoxonae pepatopaewa tsane Nacom pia nacua beicha tatsi. ³⁸Icha ichun neacaura, yawa nejume diwesi acaurano jiwi peitabaratha tatsi, pomonaetha pomonae jopa tana nejume cowantsi jiwi, pomonaethano pomonae bichocono abe peexanaewi, xan xuya barichin tsane. Xan ponxaein Nacom Tananeitapetsin, bapon xuya acauran tsane. Baxua exanaein poxonae patopaetsicaein be jiwi pia Pecanamataxeinaein tatsi yaitupanae susato patopaetsicaein. Taxa pia peitupanaewa tatsi yawa patopeicaein. Matautano Taxa pia matatsunpiwi tatsi nebaru patsicaena, jei Jesús.

9 ¹Barichino Jesús jeye:

—Bara xaniwaicha paca tsipaebatsi xua pomonae xote umene barapomonae jiwana abu copiya matha yabara yaputaena xua po coyene Nacom waba jiwi xua petanaexanaenexatsi piamonae pomonae itorobiya taewatsixae taayapusuwatha. Bapoxonae barapomonae werapaena, jei Jesús.

**Meje yabara poxonae Jesús pijimonae peitutha
pexeinya itupanae coicha tsanaya naexana
(Mt 17.1-13; Lc 9.28-36)**

²Poxonae seis po matabibibe jopa, xua Jesús paeba baxua bapoxonae pirapae Jesús baru pona Pedro, iru Santiago iru Juan. Barapoyobe Jesús compa baru pona demxuwatheicha po demxuwa bichocono taucha. Baxoteicha barapoyobe peitutha tatsi, Jesús pexeinya itupanae coicha tsanaya. ³Pocotsiwa Jesús pia penama xatatsiwa bichocono daedaena, yawa bichocono inyapana, beyacaincha poxonae jiwi bichocono paparuwa matanaca xua inyapana exana. ⁴Bapoxonae Pedro, iru Santiago iru Juan Elías taerucupatsi, iru Moisés ponbe caena bayatha naxubabe. Baponbe Jesús baru cueicueijeichibe. ⁵Bapoxonae Pedro namchi, jeye Jestutha:

—Pon jiwi Necuidubim maisa wuna xua xote pata umenaewa. Pacata acabinchi acoibi po boutiyobe, cae bouto xam nexa, icha bouto Moisés nexa, icha bouto Elías nexa, jei Pedro.

⁶Pedro baxua paeba, bequein jopa yaputaeyo pocotsiwa yabara cueicueije, tsipei poxoru saya barapomonae bichocono pijunuwi. ⁷Bapoxonae daxita barapomonae pia xainya bematawacaicha taruneicatsi tsaquinaebowa. Barapo tsaquinaebowatha pejume jume tane, xua Nacom Jesús yabara cueicueijeichi, jeye: “Bapon apara Taxanto pon bichocono

antobein pon itapetan. Bapon beta pajume taema pocotsiwa paca tsipaeba”, jei Nacom. ⁸Barapoxonae caena nainya poxonae necobarucupa barapomonae, baponbe jopa taetsi, meisa saya Jesús compa uncua. ⁹Poxonae Jesús pijimonae baru juinca demxuwa wetsica, bapoxonae Jesús tsipaeba barapo acoibi poyobe, jeye: “Ichamonaetha jopa yabara patsipaebinde pocotsiwa xuaunxuae pataneme xua tapaca catsita exanaewatsi. Jopa payabara paebinde beya abu poxonae equeicha asun poponaein tatupae coyene weya, xan ponxaein Nacom Tananeitapetsin”, jei Jesús. ¹⁰Daxota barapoyobe jopa yabara paebiyo ichamonaetha xua tane. Saya barapoyobe pia coutha namicha natsipaebabe najeibe: “¿Eta xua metha baraxuara xua Jesús paeba xua pinae petupae coyene weya asu tsane?” najeibe. ¹¹Barapoxonae barapo acoibi poyobe Jesús yainyabatsi, jeibe:

—Pomonae jiwi pecuidubiwi Moisés pia peitorobi coyene tatsi, ¿eta xua metha bapomonae paeba xua pinae bewa copiya patopaena Elías, xua pinae beya poxonae patopaena Mesías? jei barapoyobe.

¹²Jesús barapoyobe jume notatsi, jeye:

—Bara xainyei, Nacom Pejume Diwesitha paeba xua pon be Elías copiya netsiwana patopaena. Matautano paeba xua bapon cana nantu coyene weta exanaena jiwi pia juntu coyenewantha xua jiwi pejume cowuntsinexa Nacom. Matautano barapo Nacom Pejume Diwesitha paeba xua xan ponxaein Nacom Tananeitapetsin ichamona neperaxa jubina. Matautano bichocono abeya neyabara paebina. ¹³Ichitha nama xan paca tsipaebatsi xua pon be Elías bayatha apara patopa. Bapontha abeya cana exanatsi ichamona, icha be pocotsiwa barapomonae ichichipa xua bapon pecana exanaewatsi. Bayatha baxua Nacom Pejume Diwesitha peyabara tsiwuna muxu dutsixae, jei Jesús.

Meje yabara poxonae Jesús cauri taitaweta xua pewowin xeina
(Mt 17.14-21; Lc 9.37-43)

¹⁴Bapoxonae pirapaeyo barapo acoibi poyobe Jesús baru nawiya ichaxota ichamona pijimonae tatsi tajinompatsi. Bapoxonae barapomonae tane xua Jesús pijimonae tatsi pomonae baxota petajinompawixaetsi baru nacaetutatsi pin bicheito. Iru baxota naena pomonae jiwi pecuidubiwi Moisés pia peitorobi coyene tatsi. Barapo pecuidubiwi Jesús pijimonae tatsi jume matsontsonobatsi. ¹⁵Barapo pin bicheito najuntu coyene nabenaeca poxonae Jesús taerucupatsi. Bapoxonae barapo pin bicheito caena nainya Jesús pexainya betacuinaeyiyatsi xua Jesús pejacobinexatsi. ¹⁶Bapoxonae Jesús yainyaba barapo pin bicheito, jeye:

—¿Eta pocotsiwa metha tajiwimonae pajume matsontsonobame? jei Jesús.

¹⁷Caenin pon uncuca baxota, bapon Jesús jume notatsi, jeye:

—Pon jiwi Pecuidubim, xote nexantha cata caponatsi taxanto. Bapon taxanto cauri xeina, xua daxota inta muxusipana exanatsi. ¹⁸Poxonae taxanto taibatsi cauri, inta iratha bebai tsaibichi. Bapoxonae inta coibo thamthamei exaneibatsi. Matautano inta nawano xane exanatsi. Daxota inta cuenecuenona. Bequein wucan jinyamonae, janje: ‘Painta taxanto taitawere cauri’, jan, daichitha jopa itacupaetsi xua inta taxanto petaitawetsinexatsi cauri, jei bapon.

¹⁹Bapoxonae Jesús anaya barai pijimonae, jeye:

—iPaxam barapomonae pam, pomonae jopa xapain cataunxuae pana nejume cowuntsim! ¿Eta po weibe nantawenonan xua bewa tapaca baru ecaewatsi tsainchi xua beya poxonae tapana nejume cowuntsiwam tsane? Matautano ¿eta po weibe equeicha nantawenonan xua tapaca cayawenaewatsi tsainchi? Pon cauri xeina painta baru awena, jei Jesús.

²⁰Bapoxonae Jesús pexantha tacapoinchi barapo pewowin. Poxonae Jesús tainchi cauri, bapoxonae pewowin naichababa exanatsi. Barapo pewowin bapoxonae iratha xotsi. Yawa iratha natorenababa exanatsi. Yawa coibo thamthamei exanatsi. ²¹Pexuyo paxa tatsi, Jesús yainyaba, jeye:

—¿Eta po weiyobe barapo pewowin xeina baxua xua cauri xeina? jei. Barapon Jesús jume notatsi, jeye:

—Caena bayatha baxua xeina poxonae pexuyo tsecae. ²²Matowa cauri inta taxanto isototha bebai tsaibichi. Matautano inta mentha bebai tsaibichi pebexubinexatsi. Icha caitacupa xua neexanaewa tsane baxua, pana yabara najuntu coyene xeinare jinya tapana neyawenaenexam tsane, jei pexuyo paxa tatsi.

²³Jesús jume nota bapon, jeye:

—¿Eta pocotsiwa metha barapo jumetha netsipaebame xua tana neitacupaewa yabara? Tsipei ponba jume cowunta bara Nacom yawena xua peitacupaewatsi xua daxitantha beta cana exana, jei Jesús.

²⁴Bapoxonae pexuyo paxa tatsi jume daunweya wawaya jeye:

—Bara cajume cowuntatsi. Neyawende xua equeicha bichocono matowa tacajume cowuntsinexa tsainchi, jei pexuyo paxa tatsi.

²⁵Poxonae Jesús tane xua pin bicheito imoxoyo nacaetutapona, bapoxonae Jesús itaweta cauri, jeye:

—Xam caurim pom muxusipana exaname jiwi, bara caitawetatsi. Bara xubiriware barapo pewowin. Equeicha bapana jopa caewa patopaeinde bapontha, jei Jesús.

²⁶Bapoxonae cauri pewowin papai exanatsi. Yawano naichababa exanatsi. Barapo cauri pewowin cuenta poinchi, barapoxonae barapo pewowin be petupaeyo boca iratha. Daxota daxita barapo pin bicheito paeba xua pinae barapo pewowin apara tupa. ²⁷Barapo pewowin

Jesús cobe pita, yawano asiya cuaranota. Bapoxonae barapo pewowin nantacotuncuataba.

²⁸Bapoxonae Jesús joniya botha. Jesús pijimonae compa seicaya tsipaebatsi, jeichichi:

—¿Eta pocotsiwa metha jopa pana neitacupaeyo xua pata taitawetsiwa cauri? jei barapomonae.

²⁹Jesús pijimonae jume nota, jeye:

—Barapocotsimonae caurimonae paca itacupa xua painya neitawetsiwa saya meisa poxonae memecabiya matowa pawucame Nacomtha, jei Jesús.

Meje yabara poxonae equeicha Jesús nayabara paeba xua poxonae tupaena
(*Mt 17.22-23; Lc 9.43-45*)

³⁰Poxonae Jesús, iru pijimonae tatsi bara weya pona, bapoxonae Galilea nacua iya pona. Bapon jopa beyaputaetsi xua ichaxota ponaena, xua ichamonae yaputaena. ³¹Baxua Jesús exana, tsipei pijimonae cuiduba. Jesús barai pijimonae xua nayabara paeba, jeye:

—Xan ponxaein Nacom Tananeitapetsin jiwi necaenaetsina ichamonaetha. Yawano nebexubina. Ichitha poxonae acoibi po matabibibe yapucaewina, bapoxonae equeicha asu poponaein, jei Jesús.

³²Ichitha barapomonae pomonae Jesús pijimonae jopa jume yaputaetsi xua Jesús yabara paeba. Matautano barapomonae junuwa xua Jesús peyabara yainyabiwa tsainchi barapo jume.

Meje yabara poxonae Jesús yabara yainyabatsi
pijimonae xua pon peainya cui peexanaeinchi
(*Mt 18.1-5; Lc 9.46-48*)

³³Jesús pijimonae baru patopa Capernaum tomaratha. Poxonae Jesús pijimonae botha baru patopa, bapoxonae pijimonae yainyaba, jeye:

—¿Eta xua namtotha pana najume matsontsonobaponame? jei Jesús.

³⁴Barapomonae saya moya umena peuraxae, tsipei namtotha najume matsontsonobapona xua po coyene metha jintam ainya cui peexanaewatsi tsainchi pon barapomonae jiwanaxae. ³⁵Nexata poxonae Jesús eca, bapoxonae pijimonae waba, pomonae doce poyobe, yawa jeye:

—Pon ichichipa xua ichamonae ainya cui petsita naexanaewatsi, bapon bewa pia coutha pecui pawi jiton naexanae petanacuichinexa ichamonae, jei Jesús.

³⁶Bapoxonae Jesús pita pexuyo, yawa pijimonae tatsi peitabarayo deca tatsi tacuaranoreca. Jesús isaeca barapo pexuyo, jeye:

³⁷—Pon matenta weyataeya waba peyawenaenexa pontha pon tana nejume cowuntsixae xua pocotsin icha be barapocotsi pexuyo ichi, barapon apara bara nententa weyataeya waba. Xan jopa meisa nententa weyataeya wabiyo, apara bara iru matenta weyataeya wabatsi pon tana neitorobixae xua pon bara Nacom, jei Jesús.

Meje yabara poxonae Jesús barai pijimonae:

“Pon jopa nacata abe exanaeyo, bapon ba apara naca yawena”, jei
(*Mt 10.42; Lc 9.49-50*)

³⁸Nexata Juan namchi Jesustha, jeye:

—Ja Tanecuidubim, paxan caein patan pon cawun taiba poxonae itaweta caurimonae, xua caurimonae itawetatsi. Paxan baxua pacui itawetan, tsipei jopa naca puna poponaeyo, jei Juan.

³⁹Ichitha Jesús Juan jume notatsi, jeye:

—Bapon baxua jopa pacui itawetsinde, tsipei dapon aibi pon pexeinya petsita itutsi coyenewan exana poxonae newun taiba xua bapoxonae cotacaya abeya neyabara paeba. ⁴⁰Tsipei pon abe jopa nacata exanaeyo, bapon apara naca yawena. ⁴¹Pon paca yawena xua mera paca cata xua bequein tsica corotiyotha xua iru pejume cowuntsixae, xua xan Criston tajiwimonae pamxaem, baxua peexanaexae, Nacom catsina bapontha pematomatsiwa baxua nexa, jei Jesús.

Meje yabara poxonae Jesús paeba xua jiton jopa bewa
cana exanae ichuntha xua iru abe peexanaewa tsane
(*Mt 18.6-9; Lc 17.1-2*)

⁴²Equeicha Jesús namchi, jeye: “Nacom tsitatsi xua pebin bichocono abe exana poxonae natsicuenta ichun cana exanatsi xua abe peexanae cuiru coyene exana, po barapo ichun pon cataunxuae aena tana nejume cowuntsixae. Metha jame wuna tsipae xua barapo pebin pon abeya cana exanaeya taexana ichuntha, barapon pin iboto wisi cutsipatsi yawa xua tuwutha xua pin mar menetha barapo ibototha cayawa cabutabachipatsino. ⁴³⁻⁴⁴Icha painya cobe paca exana xua abe painya neexanaewa tsane, maisa panacobe ucubobare. Tsipei baxua xanepana xua cae cobexi pabebam tsane, xua saya cae cobexi painya neyawa patsiwa tsane Nacom pia nacua beicha tatsi. Baxua jame yatsicaya xanepana beyacaincha xua ainya cobebe painya necayawa bebaiwa tsane ichaxota po nacuatha isoto jopa itacounayiyo, xua ataya tsiteca. ⁴⁵⁻⁴⁶Matautano icha painya taxu paca exana xua abe painya neexanaewa tsane, maisa panataxu ucubobare. Tsipei baxua xanepana xua cae taxuxi pabebam tsane, xua cae taxuxi painya neyawa patsinexa Nacom pia nacua beicha tatsi. Baxua jame yatsicaewa xanepana beyacaincha xua ainya taxube painya necayawa bebaiwa tsane ichaxota po nacuatha isoto jopa itacounayiyo xua ataya tsiteca. ⁴⁷Matautano icha pocotsiwa pataneme painya itamaiqueitha xua icha baxua paca exana xua abe painya neexanaewa tsane, painya netaexae painya itamaiqueitha, maisa pana naitacuere jucuare. Tsipei baxua xanepana xua cae itamaiqueitoxi pabebam tsane, xua cae itamaiqueitoxi painya neyawa

patsiwa tsane Nacom pia peitorobi nacua beicha tatsi. Baxua jame yatsicaewa xanepana, beyacaincha xua poxonae ainya itamaiqueitobe painya necayawa bebaiwa tsane ichaxota isoto jopa itacounayiyo.

⁴⁸Barapo nacuatha isoto jopa itacounayiyo xua ataya tsiteca yawa oro jopa tupaeyo.

⁴⁹“Tsipei daxita jiwi pia pejuntũ coyenein tatsi nacui wũnaetsina Nacom nexa pocotsi coyenewantha xua jiwi taayapubetsi bichocono xua jiwi atene exanatsi pocotsiwa icha be isoto ichi. Mataũtano daxita pocotsiwan jiwi tauta xua petuxusi exanaewa Nacomtha, barapocotsiwa copiya yawa muxuna nacui xaxainchina sare beno. ⁵⁰Sare beno, bara bena wũnae. Ichitha icha barapo sare beno jopa abenataeyo bapoxonae jopa peitacũpaewatsi xua equeicha peabenataewa. Bara paichinde poxonae icha be sare beno ichi. Paxeinare pocotsi coyene pexeinya jũntũ coyene xua jopa po jũntũ coyene abeyo. Mataũtano jũntema nantiya pana nabarũ jinompare”, jei Jesús.

**Meje yabara poxonae Jesús cuiduba xua
jiwi piseurixi pepunapenteibiyainwa
(Mt 19.1-12; Lc 16.18)**

10 ¹Jesús ponataba Capernaum tomara weya. Bapoxonae Judea nacuatha patopa. Yawa patopa Jordán mene iya icha muxunenetha, po muxunene xua Judea nacua weya. Baxotiya equeicha jiwi pin bicheitomonae nacaetuta ichaxota Jesús uncua. Equeicha Jesús cuiduba barapomonaetha, tsipei pia cui xua cuidubeiba. ²Bapoxonae ichamonae fariseomonae, barapomonae piraichi Jesús imoxoyo caquita umenarũcũpatsi xua Jesús pejuntũ cui coyene jũjatsinexatsi, daxota jeye: —¿Metha bara Moisés copata jampa xua pebin pepunaxubiwa piowa icha saya metha ichichipa jampa? jei.

³Jesús jume epa pita barapomonae, jeye:

—¿Eta xua bapon Moisés paca itoroba? jei.

⁴Barapomonae Jesús jume notatsi, jeye:

—Moisés copata xua jiton itacũpatsi xua pecatsiwa papera piseuri, po paperatha tina xua pexubiwa tsane piseuri. Bara bapoxonae bapon xubina piseuri, jei barapomonae.

⁵Bapoxonae Jesús jume nota barapomonaetha, jeye:

—Moisés paca cata barapo peitorobi coyenewa, tsipei paxam jopa bepajume cowũntsim painya jũntũ coyenewatha. ⁶Tsipei poxonae Nacom aena forota daxita, pejume diwesitha jeye: ‘Nacom exana pebin, mataũtano exana yabũyo’, jei. ⁷Equeicha Nacom jeye: ‘Daxota pebin paxa wepu natsata, yawa pena wepu natsata xua piowabe imoxoyo penaperũ nacoyobinexabe. ⁸Baraponbe be cae jiwimonae naexanabe’, jei. Bapoxonae baponbe xua ainya jiwibe aibi, bara be caein naexanabe.

⁹Daxota pebin bapana jopa bewa punaxubi piowa. Tsipei apara bayatha Nacom cana exana xua bara be caein naexanabe, jei Jesús.

¹⁰Poxonae Jesús, iru pijimonae tatsi botha jinompa, bapoxonae Jesús pijimonae yabara yainyabatsi baxua. ¹¹Bapoxonae Jesús jume epa pita, jeye:

—Pon punaxuba piowa, yawa ichowa pita, bapon abe exana piseuritha yawa Nacom peitutha tatsi, tsipei Nacom tsitatsi xua powa copiya baru popona, apara bara piowa tatsi. ¹²Barichi icha petsiriwa punaxuba pia pebin, yawa pita icha pebin, bapoxonae bapowa abe exana pia pebintha, yawa Nacom peitutha tatsi, tsipei Nacom tsitatsi xua pon copiya xeina, apara bara pia pebin tatsi, jei Jesús.

**Meje yabara poxonae Jesús jeye pexuitha:
“Barabu Nacom beta paca yawenaena”, jei
(Mt 19.13-15; Lc 18.15-17)**

¹³Nexata jiwi Jesús pexui tacaponatsi xua Jesús pejayabinexa pecobetha, yawa xua Nacomtha pewucaenexa barapo pexui nexa xua pejeinexa: “Barabu Nacom beta paca yawenaena”, pejeinexa. Ichitha Jesús pijimonae tatsi poxonae baxua tane, tamropata notarucupa xua barapomonae cui matawentatsi pomonae pexui carendena tsaibi. ¹⁴Poxonae Jesús baxua jume tane, jopa ichipaeyo pocotsiwa pijimonae tatsi paeba, daxota anaya jeye:

—Bara pacopabare pexui xua tana itata patsinexa. Jopa pexui paitawetsinde, tsipei Nacom pia peitorobi nacua tatsi saya meisa barapomonae nexa pomonae pejuntu coyene xanepanaewi icha pexui ichi. Pexui pia cui xua tayapu xanepanatsi xua pia juntu coyeneintha jume cowunta Nacom. ¹⁵Bara xainyeya paca tsipaebatsi. Pon jopa yabara jume cowuntsiyo xua icha be jopa pexui ichiyo xua ba pexui tayapu xanepanatsi xua jume cowunta, bapon bapana jopa naexanae tsane Nacom pijimonae tatsi pomonae Nacom itorobiya ewata, jei Jesús.

¹⁶Bapoxonae Jesús tsana tamropata nonotapona pexui, yawa pecobetha pexui jayabiya tawucatsi Nacom. Jeye: “Barabu Nacom beta yawenaena barapo pexui”, jei.

**Meje yabara poxonae pewowin pon copei pexeinaein Jesús tsipaebatsi
(Mt 19.16-30; Lc 18.18-30)**

¹⁷Poxonae Jesús aena warapa, bapoxonae pebin Jesús pia xainya betacuinaerenatsi. Bapon pentabocototha uncua Jesús peitabaratha tatsi, xua pebaru cui itura jinaenexatsi Jesús, tsipei Jesús pon peainya cuin. Bapon jeye Jesththa:

—Ja Tanecuidubim, maisa nejuntu coyene xanepanaem. ¿Eta xua copiya matha exanocuaein xua ajuntuyapusuya tapoponaewa tsane xua ataya tsane? jei bapon.

¹⁸Bapoxonae Jesús jume nota, jeye:

—¿Eta xua nebaram: ‘Nejüntü coyene xanepanaem’, jam? Apará ichün dapon aibi pon pejüntü coyene xanepanaein. Jame meisa apara bapon Nacom compa pejüntü coyene xanepanaein. ¹⁹Xam bara yaputaneme po coyene Moisés pia peitorobi coyenewatha itoroba, xua jeye: ‘Jopa ichün bexubinde. Jopa ichowa pichinde ichün piowa tatsi. Jopa caibinde ichün piawan tatsi. Jopa naerabiya cayabara paebinde pocotsiwa ichamonae exana. Jopa ichamonae yabara muxujainyabinde xua caibame. Axatha baru jume cui itura jinare. Matautano enatha baru jume cui itura jinare’, jei Moisés, jei Jesús.

²⁰Pewowin Jesús jume baraichi, jeye:

—Pon jiwi Necuidubim, daxita caena bayatha barapo coyenein exaneiban. Poxonae pexuyothan tamropata pitaban, beya anoxuae yacuiya pinyon, jei bapon.

²¹Jesús antobeya necota bapontha, jeye:

—Cataunxae icha cui coyene cata seica xua pocotsiwa neexanaewam tsane. Icha ichichipame xua jopa necata acoibiyo nexa tsane xua pocotsiwa xanepanaeya neexanaewa, matha daxita caenaere pocotsiwa xeiname, yawa catsibare pomonaetha pomonae peacopeibi jiwi. Bapoxonae jame moya anetha, nepuna ponde. Bequein bara bapoxonae acopeibim tsane, daichitha Nacom cacatsina peitaboco beicha pocotsiwa Nacom necajüntana botsiwa pocotsiwa bichocono wñnae, jei Jesús.

²²Poxonae barapo pewowin baxua jume taeba, bichocono nantanuweya pontaba, tsipei bichocono copei pexeinaein.

²³Bapoxonae Jesús necota jiwi, yawa jeye pijimonaetha:

—iMáis bichocono ayapubecai xua copei pexeinaewi naexana Nacom pijimonaetha tatsi jiwana pomonae itorobiya canamataxeina! Tsipei barapomonae bichocono antasiwayatane barapo pia copei, beyacaincha xua Nacom antobetsi, jei Jesús.

²⁴Jesús pijimonaetha tatsi yabara najüntü coyene cabenaeca pocotsiwa xua Jesús paeba. Ichitha Jesús pijimonaetha equeicha tsipaeba, jeye:

—Pomonae tamonae pamxaem, imaisa bichocono ayapubecai xua pomonae copei pexeinaewi jume cowuntsina Nacom! Barapomonae nanta xeina xua pia copeitha nayawena xua daxota jopa canantawenonaeyo xua Nacom pejume cowuntsiwatsi. ²⁵Bichocono acuiruyapube xua duwein, pon pewün camello xua bapon pejoniyaewa acuicheto peetabü wan iya. Ichitha nama yatsicaewa pon bichocono copei pexeinaein taacuiruyapubetsi xua naexana Nacom pijimonaetha tatsi jiwana pomonae itorobiya canamataxeina beyacaincha xua poxonae acuiruyapube xua poxonae camello acuicheto peetabü wan iya pejoniyaewa, jei Jesús.

²⁶Poxonae Jesús pijimonaetha jume taerucupatsi xua paeba bapoxonae najüntü coyene cabenaeca bichocono. Barapomonae caemonae nayainyaba, najei:

—Bapoxonae ÷jintam metha nexata itacupatsi xua pecapanepaewa pia coutha? jei barapomonae.

²⁷Jesús tane barapomonae, yawa jeye:

—Pebiwi ba jopa itacupaetsi xua baxua exana, saya jame meisa Nacom compa itacupatsi xua jiwi napaeba cana exanatsi. Tsipei daxua ajibi pocotsiwa Nacom taacuiruyapubetsi, jei Jesús.

²⁸Nexata Pedro Jesús jume notatsi, jeye:

—Paxan daxita pacuenta ponan pocotsiwa paxeinan pata paca puna ponaewatsi tsainchi, jei Pedro.

²⁹Jesús Pedro jume notatsi, jeye:

—Bara xainyeya paca tsipaebatsi. Nacom beta cana exanaena daxita pomonae pecueicueijeixae Nacom pia pecapanenebiyae diwesi yawa taneantobexae beyacaincha xua ichamonae antobetsi. Nacom beta cana exanaena barapomonae pia bon pecuenta ponaexae inta peexanaexae. Matautano beta cana exanaena pomonae peweichowi pecuenta ponaexae. Matautano beta cana exanaena pomonae pamchowi pecuenta ponaexae. Matautano beta cana exanaena pomonae paxeiwi pecuenta ponaexae, matautano peniwi pecuenta ponaexae. Matautano beta cana exanaena pomonae pia pexui yawa pia iran pecuenta ponaexae.

³⁰Nacom barapomonaetha catsina po irathe pentoma xua cien po cuiyobe tsane. Barapomonae xeinaena bon, matautano nantauntsina peweichowi, iru pamchowi tatsi, iru peniwi tatsi, iru pia pexui tatsi, yawa iranno. Daxita barapomonaetha tsicotane be barompaya piamonae tatsi. Barapo cae pin nacuathe barapomonae peraxa jubinchi taneantobexae, daichitha barapomonae xeinaena Nacom pia peitorobi nacuatheicha peajuntuyapuswa po peajuntuyapuswa ataya tsiteca. ³¹Pomonae xua anoxuae, pomonae jiwi petsita ainya cui jiwichi po cae pin nacuathe, barapomonae bexa Nacom pia peitorobi nacuatheicha jopa peainya cui jiwi tsane. Pomonae xua anoxuae pepawi naexana pomonae jiwi jopa petsita ainya cui jiwichi, po cae pin nacuathe, barapomonae Nacom pia peitorobi nacuatheicha peainya cui jiwi tsane, jei Jesús.

**Meje yabara poxonae Jesús nayabara paeba
acoibi po coyenebetha xua poxonae tupaena
(Mt 20.17-19; Lc 18.31-34)**

³²Poxonae Jesús pijimonae cataunxuae namtotha baru ecapona xua Jerusalén tomara beya, Jesús pijimonae tsiwana nantacapona. Bapoxonae Jesús pijimonae tatsi najuntu coyene cabenaeca, tsipei Jesús nainya nantacapona. Iru pomonae Jesús puna poinchi yabara junuwa, tsipei yaputane xua Jesús abe cana exanaeinchi barapo tomarapiwi. Bapoxonae Jesús pijimonae compa waba aisowa beya xua pomonae doce poyobe tatsi. Jesús tamropata pitaba xua tsipaeba pijimonae xua pocotsiwa

imoxoyo ichamonae Jesús cana exanaeinchi. ³³Jesús jeye pijimonaetha: “Anoxuae ponaeinchi Jerusalén tomara beya. Baxotiya xan ponxaein Nacom Tananeitapetsin, necaenaetsina ichamonae sacerdotemonae pia pentacaponae witha tatsi, yawa pomonaetha pomonae jiwi pecuidubiwi Moisés pia peitorobi coyene tatsi. Barapomonae itorobina xua nebexubina. Matautano necana cobenatsina pomonaetha pomonae penanapaincha jinompaewi xua pomonae icha nacua werena peponaewi. ³⁴Barapomonae necui caponaena, yawa necueinchinano. Matautano yawa necana one subabina. Bapoxonae nebexubina. Daichitha poxonae acoibi po matakabibe weraweracaena equeicha asu poponaein petupaey coyene weya”, jei Jesús.

Meje yabara poxonae Santiago iru Juan Jesús yainyabatsibe
(Mt 20.20-28)

³⁵Bapoxonae Santiago iru Juan ponbe Zebedeo pexantobe tatsi, baponbe Jesús imoxoyo caquita uncuatabatsibe, jeibe Jestustha:

—Pon jiwi Necuidubim, paichichipan xua painta exanaename pocotsiwa paca wucaeinchi, jei.

³⁶Nexata Jesús yainyaba baponbetha, jeye:

—¿Eta pocotsiwa paichichipamebe xua pacata exanaeinhibe? jei.

³⁷Baponbe Jesús jume notatsi, jeye:

—Matacabi jopaena, po mataqueitha itorobiya ewatsiname jiwi poxonae ecaename jinyawa xua pexeinya itupanae ecaethopaewatha. Barapo mataqueitha copare xua paxambe nantiyabe paecaeinbe patawantha xua pexeinya itupanae ecaethopaewatha. Ichun pocotsiwa necoxa weya ecaena. Ichun pocotsiwa netsocona weya ecaena, jeibe baponbe.

³⁸Bapoxonae Jesús baraiibe baponbetha, jeye:

—Paxambe jopa payaputaembe pocotsiwa pana newucamebe. Poxonae ichamonae abe inta exanaena, xan bara saya copatsin xua barapomonae bara neperaxa jubina. Barichi poxoru paxambe tapana neantobexaembe, ¿bara iru paca itacupabe xua bara pacopatsinamebe xua bara ichamonae paca peraxa jubinabe? Barichin bara saya copatsin xua ichamonae bara tupa neexanaena. Barichi, ¿bara iru paca itacupabe xua pacopatsinamebe xua bara ichamonae tupa paca exanaenabe? jei Jesús.

³⁹Barapoyobe jume notabe Jestustha, jeye:

—Aa, bara baxua pana neitacupabe, jeibe.

Jesús jume notabe baponbetha, jeye:

—Bara bara xainyei, barapocotsi coyene ichamonae paca cana exanaenabe. Ichamonae paca peraxa jubinabe. Matautano ichamonae bara tupa paca exanaenabe, icha xan necana ichi tsane. ⁴⁰Nama xua xantha nantiya paecamebe xua ichun pocotsiwa tacoxa weya eca, yawa xua ichun tatsococona weya eca, baxua jopa tacoya yabara itorobinyo. Saya

jame Taxa Nacom meisa baxua taexanaena pomonaetha pomonae caena bayatha tsiwunaeta xua peenaenexa tsane, jei Jesús.

⁴¹Jesús pijimonaе tatsi pomonae umena, pomonae diez poyobe, barapomonae jume tane xua Santiago iru Juan Jesús wucatsibe. Bapoxonae barapo diez poyobe, Santiago iru Juan yabara anaepanarucupatsibe. ⁴²Ichitha Jesús pia xainya berena pijimonaе waba yawa namchiya jeye barapomonaetha:

—Paxam bayatha pataneme po coyenewa ba exana pomonae jopa judiomonaе naexanaeyo. Barapomonae ba nantauta pomonae pia nacua tatsi pia petaewatsiwichi tatsi. Daichitha barapo nacua peewatsiwi aebiya itoroba piamonae xua daxota bichocono jivi taayapubetsi. ⁴³Ichitha nama paxam barapocotsi coyeneya jopa bara paichinde. Seicaya nama icha juntu coyeneyatha paca itorobatsi. Icha pon paxam jiwana, icha bapon ichichipa naexana be pocotsin canamataxeina ichamonae, bapon matha bewa copiya daxita paxam beta amanaya pacata nacuichina. ⁴⁴Matautano pon xua paxam jiwana, icha bapon ichichipa naexana be pocotsin bichocono ainya cui penaexanaein xua beyacaincha ichamonae, bapon matha bewa copiya daxita paxam beta amanaya pacata nacuichina icha pon pebusi cui taetaeinchi ichi. ⁴⁵Icha be pocotsi coyeneya ichin bara paichinde. Xan ponxaein Nacom Tananeitapetsin patopeican xua tanacuichinexa tsane ichamonae nexa. Apara jopa baxua tsipatopaeinyo xua ichamonae inta penacuichiwanexa tsane. Saya patopeican tsipei ichichipan xua daxita carepaya jivi tayawenaewa tsane. Matautano patopeican xua tatsitupaenexa tsane be pentoma xua daxita jivi pepanenebiyaenexa abe pia peexanae cuiru coyenein weya tatsi, jei Jesús.

**Meje yabara poxonae Jesús axaibi exana pon peitata nacutsin,
pon pewun Bartimeo
(Mt 20.29-34; Lc 18.35-43)**

⁴⁶Bapoxonae Jesús iru pijimonaе tatsi pata Jericó tomaratha. Jesús iru pijimonaе tatsi tomara we-iyiya xua iruru pin bicheitomonae napona. Iruru bapoxonae pebin pon pewun Bartimeo, pon Timeo pexanto tatsi, bapon namtotha eca. ⁴⁷Poxonae Bartimeo jume tane xua juinya Jesús imoxoyo pona, pon Nazaret tomarapin, bapoxonae bapon Bartimeo tamropata pitaba xua wawaya jeye:

—iJesús, David pia pemomoxi susato jiwanae, ponxae Nacom necaitapetsim neyabara najuntu coyene xeinare jinya tana neyawenaenexam! jei.

⁴⁸Pinmonae jume matawenta bapontha xua moya peecaenexa. Ichitha bapon equeicha bichocono jume daunweya wawai, jeye:

—iJesús, David pia pemomoxi susato jiwanae, ponxae Nacom Necaitapetsim neyabara najuntu coyene xeinare jinya tana neyawenaenexam tsane! jei bapon.

⁴⁹Bapoxonae Jesús naruntaba yawa namchi pijimonaetha, jeye:

—Maisa painta wabare, jei Jesús.

Bapoxonae pon peitata nacutsin wabatsi, yawa barapomonae jeye bapontha:

—Bara najuntu tsacatabare, jopa amurande. Nontaponare, aunxuae cawaba, jei barapomonae.

⁵⁰Bapoxonae pon peitata nacutsin pia penauyapatsiwa xubiriwa, yawa jirawuna. Bapoxonae pona Jesththa. ⁵¹Jesús yainyaba bapontha, jeye:

—¿Eta xua jinya tacata exanaetsi? jei.

Bapon Jesús jume notatsi, jeye:

—Pon jiji Pecuidubim, benecotsin cuinaya, jei.

⁵²Jesús jume nota bapontha, jeye:

—Bara moya ponde. Bara bayatha caitacuere xanepana exanatsi, tana neyabara jume cowuntsixaemxae xua bara tana neitacupaewa xua tacayawenaewatsi, jei Jesús.

Bapoxonae caena nainya pon peitata nacutsin necotaxuba. Bapoxonae bapon Jesús puna poinchi namtotha.

Meje yabara poxonae Jesús Jerusalén tomaratha patopa

(Mt 21.1-11; Lc 19.28-40; Jn 12.12-19)

11 ¹Poxonae Jesús, iru pijimonaetha tatsi muxu pepatsi Jerusalén tomaratha copiya pata Betfagé tomaratha yawa Betania tomaratha, po tomara xua nacacuita ecabe. Barapo tomarabe cuariya demxuwa eca, po demxuwa pewun Olivowa, xua baxota olivo naein peumenaexae. Bapoxonae Jesús nacueyatabe poyobe itoroba ponbe pijimonaetha tatsi jiwana. ²Jesús barai baponbetha, jeye:

—Paponarebe, po tomara painya itabaraya equiya. Poxonae papatopaenamebe barapo tomaratha, bapoxonae pacaxinaenamebe burro pon penun pon pequetanotsin, po burro ichamonae jopa tsijuma enaeyo. Barapo burro paisanaxorebe. Bapoxonae payama carenandebe.

³Icha ichun paca yainyabiya jeye: ‘¿Eta xua payama isanaxubamebe burro?’ paca jei, nexata pajandebe: ‘Pon jiji Pecanamataxeinaein bepa pata yama cayiyeainjei tsipei pinae nantawenona. Bexa nainya equeicha payama carenaein’, pajandebe, jei Jesús.

⁴Barapomonae ponarucupa. Yawa caxinarucupa barapo burro pebto, pon quetanota imoxoyo bo coibototha xua aisowa beya namtotha. Bapoxonae barapoyobe yama isanaxubabe barapo burro.

⁵Pomonae baxota jinompa barapomonae baponbe yainyabatsi jeye:

—¿Eta xua paexanamebe? ¿Eta xua burro paisanaxubamebe?

jeichichibe baponbe.

⁶Bara baraponbe jume notabe barapomonaetha pocotsiwa bayatha Jesús pejume itorobixae. Bara baraponbe tacopatatsibe xua bara peyama

isanaxubinexabe. ⁷Bapoxonae baponbe tayama cayabe burro Jesús tayama cayatsibe. Bapoxonae pia paparuwan tsijuma jebicabe, yawa Jesús tsijuma equeica. ⁸Bapoxonae jiwi pinmonae namtotha yerababa jejabapoinya pia paparuwan. Ichamonae peaxu po axu be coichaxu axu ucuboba. Barapo axu namtotha jebapoinya xua Jesús ainya cui exanatsi. ⁹Pomonae Jesús tsiwana nanta cajinjincatsi, iru pomonae Jesús peputha tajinjincatsi, barapomonae Jesús yabara wawaya jeichichi:

—iPai jayana, maisa Jesús pon jiwi itorobiya pia pepa peewatsinchi maisa wunae, bapon patopa Nacom peitorobixae! ¹⁰iBara wunae jaintatsi pon patopeica xua jiwi peitorobinexatsi, icha David ichi pon wamo susatopin poxonae bapon Israel nacua itorobiya ewata! iMaisa Nacom bichocono wunae jaintatsi pon athabeicha eca! jei barapomonae.

¹¹Bara bapoxonae Jesús patopa Jerusalén tomaratha, yawa joniya Nacom pin pia botha tatsi. Jesús naita cui wetaba xua tane daxita pocotsiwa jiwi exana barapo botha. Bapoxonae equeicha Jesús pijimonae baru ponataba Betania tomara beya, poyobe xua doce poyobe, tsipei bayatha tabopiya.

Meje yabara poxonae Jesús biatane higuera nae xua jopa penacoichixae
(Mt 21.18-19)

¹²Icha matababitha baya, poxonae Jesús iru pijimonae tatsi Betania tomara weya pona, Jesús jainpaponae. ¹³Taju weya Jesús tane higuera nae xua noxu tsuncuae. Jesús higuera nae beya pona piyain petanexa pethei, ichitha saya noxu tane, tsipei cataunxuae dapo dapae aibi po dapaetha higuera nae nacoita. ¹⁴Bapoxonae Jesús barai higuera nae, jeye:

—Bapana jopa equeicha nacoichim tsane, xua jiwi jopa necathei xaenexa, jei Jesús.

Jesús pijimonae jume tainchi baxua poxonae higuera nae barai.

Meje yabara poxonae Jesús aisowa benapuna torobabiya
Nacom pin pia botha pomonae pecaenaetsiwi
(Mt 21.12-17; Lc 19.45-48; Jn 2.13-22)

¹⁵Bapoxonae pirapaeyo Jesús pijimonae baru patopa Jerusalén tomaratha. Jesús joniya Nacom pin pia botha tatsi. Bapoxonae Jesús aisowa benapuna torobabiya barapo Nacom pin pia bo weya pomonae pecaenaeta jiwi baxota. Jesús tabu tayebiya bebai iratha pocotsiwa pexaethopaewa po pexaethopaewantha nantiya nacatsiba paratixi, yawa xua iruru baxota topibo caenaeta. ¹⁶Jesús jopa copatsiyo xua jiwi piawan capona Nacom pin pia bo tatsi tutiya iya. ¹⁷Jesús cuiduba barapomonae, jeye:

—Nacom Pejume Diwesitha jeye: ‘Tabo apara po botha xua daxita nacuanpiwi tanetsipaebinxaxa tsaibi tsane barapo botha’, jei Nacom

Pejume Diwesitha. Ichitha paxam barapo bo be pecaibiwi pia mũthũ tutu pacana exaname, ichaxota pijunuwi nantiyabeibathopa. Tsipei baxota panacaetutame saya ƚ xua painya necaibinexam tsane paratixi pomonaetha pomonae xua pateiba xua Nacom petsipaebeibinexatsi, jei Jesús.

¹⁸Sacerdotemonae pia pentacaponaeawi tatsi, irurũ pomonae jiwi pecuidubiwi Moisés pia peitorobi coyene tatsi, daxita barapomonae jume tane xua Jesús paeba. Bapoxonae barapomonae tamropata notarũcũpa xua jeita po coyenewatha Jesús bexubinchi. Barapomonae bequein ichichipa Jesús bexotsi ichitha baxua jopa exanaeyo tsipei barapomonae junuwa xua jiwi anaepana xua barapo sacerdotemonae pia pentacaponaeawi tatsi pecasebiwatsi irũno xua pecasebiwatsi pomonae jiwi pecuidubiwi Moisés pia peitorobi coyene. Tsipei barapomonae jiwi cunuwatsi, xua daxita jiwi peichichipaexae nawita pocotsiwa Jesús cuiduba. ¹⁹Poxonae xometo iriya ecanaicha bapoxonae Jesús pijimonae barũ ponataba barapo tomara weya.

Meje yabara poxonae higuera nae yũnuncua

(Mt 21.20-22)

²⁰Baya poxonae pentha tsina, Jesús pijimonae baxoyo barũ ecapona yawa tane xua higuera nae yũnuncua xua daxita petabaca opina wetsina. ²¹Bapoxonae Pedro yabara nanta xeinataba xua mexuae Jesús biatane higuera nae. Bapoxonae jeye Jestutha:

—Pon jiwi Necuidubim, taema po higuera nae mexuae biataneme, bayatha yũnuncua, jei Pedro.

²²Bapoxonae Jesús jeye pijimonaetha:

—Paxam bichocono pajume cowũnde Nacom. ²³Bara xainyeya paca tsipaebatsi. Icha xanepanaeya pana neyabara jume cowũntame xua Nacom painya nepaca cayawenaewa xuano xua jopa ainya unthuton paxeinaem, bara paca itacũpaena xua painya nepaebiwa icha ichin xua cana exanan higuera nae. Matautano bara paca itacũpaena xua painya nejeiwa uruto beya, xua pajam: ‘Uruto, natsixitabare, mar mene beya jopare’, xua painya nejeiwa. Bapoxonae bara baxua jopa bayathiyo tsane. ²⁴Daxita xua xuan pocotsiwan Nacom beya pawũcame, icha bara xanepanaeya pajume cowũntsiya wũcame, bara Nacom paca catsibina baxuan. ²⁵Poxonae Nacomtha patsipaebame, icha ichũn abe pacata exana, copiya payabara jũntemainare bapon pocotsiwa pacata abe exana, xua xuya beta painya necayabara canantaxeinaenexa. Barichi Nacom pon peitabocotha eca xuya paca yabara jũntemainaena pocotsiwa abe painya neexanae cuiru coyenein paexaname. ²⁶Ichitha icha jopa payabara jũntemainaem ichũn pocotsiwa pacata abe exana, barichi Nacom pon itabocotha eca, jopa paca yabara jũntemainaena tsane pocotsiwa abe painya neexanae cuiru coyenein paexaname, jei Jesús.

Meje yabara xua Jesús pia peitorobi coyenewa xeina

(Mt 21.23-27; Lc 20.1-8)

²⁷Bapoxonae Jesús, iru pijimonae tatsi caibe nawibiya Jerusalén tomara beya. Poxonae Jesús Nacom pin pia botha joniya xua yawa tututha iya ponano, bapoxonae sacerdotemonae pia pentacaponae tatsi, iru pomonae jiwi pecuidubiwi Moisés pia peitorobi coyene tatsi iru pitiri jiwi, barapomonae Jesús imoxoyo caquita umenarucupatsi. ²⁸Barapomonae Jesús yainyabatsi, jeichichi:

—¿Eta po peayapusu itorobi coyenewatha cuidubame baxuan? ¿Jintam cacata barapo peayapusu itorobi coyenewa? jei barapomonae.

²⁹Jesús jume nota barapomonae, jeye:

—Xan iruru tha barichichi paca yainyabinchi. Icha beta pana nejume notsiname, bapoxonae xuya yabara paca tsipaebinchi xua po peayapusu itorobi coyeneyatha exanan baxuan. ³⁰¿Jintam Juan cui itorobatsi xua bautisaba? ¿Metha bara Nacom cui itoroba jampa? ¿Metha bara jiwi cui itoroba jampa? Pana nejume nore, jei Jesús.

³¹Nexata daxita barapomonae caemonae najume matsontsonoba, najei: “¿Eta xua metha jei tsainchi? Icha jeichipaetsi: ‘Juan cui itorobatsi Nacom, xua pebautisabiwa jiwi’, metha naca jeichipae: ‘¿Eta xua metha nexata jopa pajume cowuntsim Juan?’ metha naca jeichipae Jesús. ³²Jiwi cui cunuwinchi icha jei tsainchi: ‘Juan cui itorobatsi jiwi, xua bautisaba’, icha jei tsainchi. Metha bapoxonae jiwi naca casebichipa anaya”, najei barapomonae. Barapomonae jiwi cunuwatsi tsipei daxita jiwi Juan yabara jume cowuntatsi, xua apara bapon Nacom pia peitorobi jume tatsi pepaebi jiton. ³³Bapoxonae barapomonae namchi Jesús beya, jeye:

—Canta jopa payaputaeyino, jei barapomonae.

Nexata Jesús barai barapomonaetha, jeye:

—Nexata barichin tsane jopa yabara paca tsipaebi tsainchi po peayapusu itorobi coyeneyatha exanan xua daxita taexanaewan, jei Jesús.

Meje yabara poxonae Jesús paeba pecayabara juta pepaebi diwesiyo

pomonae xua abe exana, pomonae petayapucaenaewi uva pabi

(Mt 21.33-46; Lc 20.9-19)

12 ¹Bapoxonae Jesús tamropata pitaba xua cuiduba jiwitha pecayabara juta pepaebi diwesiyotha, jeye: “Matha iruru pebin pin uva pabi xeina. Bapon uba po unbo pewun uva cuei unbo. Yawa yapucurarata barapo pia uva pabi ibowantha xua jopa pejojondenaenexa ichamonae barapo pabitha. Yawano baxota ibo fetoto exana, xua barapo ibo fetotha pecubinexa uva cuei. Matautano baxota exananota bo, po bo bichocono taucha xua baxota pebin bara wenecotequeica uva pabi.

Bapoxonae bapon itoroba pomonae pia uva pabi pia petayapucaenaewichi tsainchi, xua bapoxonae barapomonae pejiwanaxaenexa pocotsiwa penawetsiwa. Bapoxonae bapon icha nacua beya pona. ²Barapo matacabi tsuxubi, po matacabitha uva cuei naweta. Bapoxonae barapo mataqueitha pomonae pabi petayapucaenaewi jiwana itapeta nota xua penawetsiwa. Bapoxonae pon uva pabi pexeinaein, bapon pomonae petanacuichiwichi jiwana itoroba, xua petawucaenexa tsainchi uva cuei pomonae beya pomonae pabi petayapucaenaewichi. ³Ichitha barapomonae pomonae uva pabi petayapucaenaewi barapomonae waetaba pon copiya patopa, pon uva pabi pexeinaein itoroba. Yawa bapon butsino. Bapoxonae bapon caibe cobesa itorobiyatsi. ⁴Pon uva pabi pexeinaein equeicha itoroba ichun pon pia petanacuichinchi. Barichiru bapon ibotontha matasipa cuinbabatsi, yawa abe jumetha biatainchi. ⁵Equeicha pon uva pabi pexeinaein itoroba ichun pon pia petanacuichinchi. Barichiru bapon bexotsiru. Equeicha ichamonae itorobatsi. Ichamonae butsi, iru ichamonae jutebatsi.

⁶“Cataunxuae awiya bapon pexanto tanacopatatsi, pon pexanto compa tatsi, po pexanto bichocono antobe. Matapainya bapon pexanto cotacaya itoroba bara beya. Bapon nanta xeinaeya jeye: ‘Metha barapomonae taxanto inta yabara baru cui itura jinaeinchi’, jei coxiyun. ⁷Dapo jumetha pomonae uva pabi petayapucaenaewi poxonae bapon tainchi, barapomonae najei: ‘Apara bapon paxa copiniwa pichina. Daxota bapon bu bexotsi xua xainya xeinatsi barapo uva pabi’, najei barapomonae. ⁸Bapoxonae barapomonae pon uva pabi pexeinaein pexanto tatsi tawaetabatsi. Poxonae bexotsi bapoxonae petupaen aisowa beya xotsi uva pabi pecuariya beya”, jei Jesús.

⁹Bapoxonae Jesús yainyaba, jeye: “Pon uva pabi pexeinaein, zeta be cana ichi tsane pomonaetha pomonae barapo uva pabi pia petayapucaenaewichi? Apara bapon patopaena xua pejutebinexa tsane pomonae uva pabi pia petayapucaenaewichi. Bapoxonae barapo uva pabi catsina ichamonaetha xua petayapucaenaenexa tsainchi barapo uva pabi”, jei Jesús.

¹⁰⁻¹¹Equeicha Jesús nayabara paeba barapomonaetha, jeye: “iPaxam bara bayatha payorobameba Nacom Pejume Diwesi! Barapo diwesitha neyabara caunuta poxonae iboto yabara paeba, jeye:

‘Pebiwu pomonae ibo bon peacabiwi, barapo pebiwi xuba po iboto tabu caboca, po iboto peainya cui iboto.

Ichitha Nacom itapeta barapo iboto xua petabu cabocaenexa peainya cui ibotoxae.

Waxainchi nanta xeinatsi jeichichi: Maisa pocotsiwa Nacom exana naca tsita xanepana, jeichichi’, jei Nacom Pejume Diwesitha”,

jei Jesús.

¹²Poxonae bapomonae jume tane xua Jesús paeba, Jesús muxu pewaetabichi. Tsipei bapomonae yaputane xua apara barapomonae yabara paebatsi poxonae Jesús cueicueijejei barapo pecayabara juta pepaebi diwesiyo. Daxota Jesús casebatsi. Tsipei barapomonae jiwi cunuwatsi, daxota Jesús jopa waetabichi. Bapoxonae bara saya ponarũcũpa.

**Meje yabara poxonae Jesús yabara cuiduba paratixi matoma
po paratixi jiwi bewa catsibina pontha pon romanomonae
itorobiya pia pepa peewatsinchi
(Mt 22.15-22; Lc 20.20-26)**

¹³Bapoxonae pirapaeyo Jesús pia xainya betaitorobiyatsi fariseomonae jiwana, irũrũ pomonae Herodes pia pepuna jinompaewichi jiwana tatsi, xua daxita barapomonae piraichi Jesús petsipaebinxatsi xua Jesús xuya abeya pejume notsinexa. ¹⁴Bara barapomonae Jesús pia xantha tatsi tapatatsi, jeye Jestustha:

—Pon jiwi Necuidubim. Bara payaputan xua bara jume xainyeya tsipaebame jiwi, xua matautano jiwi bara beta cuidubame xua pocotsiwa jiwi bewa exanaena pexeinaenexa tsane Nacomtha po jũntũ coyene pexanepanae jũntũ coyene. Matautano jopa jiwi cunuwim poxonae cuidubame poxonae bequein jiwi jopa ichichipaeyo baxua, tsipei xam daxita jiwi bara catsita najũpa. Xam jume xainyeya cuidubeibame jiwi Nacom pia peitorobi coyenewa. Incane yabara pana netsipaebare xua nanta xeiname, xuaje: ¿Metha bara Nacom pia peitorobi coyene naca itoroba xua waxainchi paratixi catsibinchi pon romanomonae itorobiya pia pepa peewatsinchi xua wanaca itorobixae bapon bequein bara bapon pon penanapaincha poponaein xua icha nacia werena pona? Icha jopa tsipae, ¿metha daxua abe tsipae? jeichichi Jesús barapomonae pomonae fariseomonae itoroba.

¹⁵Daichitha Jesús yaputane, xua barapomonae itara mexeya xanepanaeya pepaebi jiwi ichitha abeya peexanae jiwi. Jesús jeye:

—¿Eta pocotsiwa metha painya daichi pana nejũntũ coyene jũjũtame? Moya painta xawena paratiyo, tha taetsi, jei Jesús.

¹⁶Bapoxonae barapomonae barapo paratiyo Jesús tacapoinchi. Poxonae Jesús tane barapo paratiyo, bapoxonae Jesús yainyaba barapomonae, jeye:

—¿Jintam pejumopere? ¿Yawano jintam wũn ducuaere? jei Jesús.

Barapomonae Jesús jume notatsi, jeye:

—Apara romanomonae itorobiya pia pepa peewatsinchi, jei barapomonae.

¹⁷Jesús barai barapomonae, jeye:

—Bara nexata romanomona*e* itorobiya pia pepa peewatsinchi pacare pocotsiwa xua bapon piawaxae tatsi. Matautano bara Nacom pacare xua baxua iru piawaxae tatsi, jei Jesús.

Barapomona*e* yabara najuntu cui coyene cabenaeca pocotsiwa xua Jesús xanepanaeya beta jume nota.

**Meje yabara poxona*e* Jesús yabara yainyabatsi po coyene
xua equeicha asu pomona*e* pewerapeibiwi
(Mt 22.23-33; Lc 20.27-40)**

¹⁸Bapoxona*e* saduceomona*e* jiwana pata Jesús pia xantha tatsi xua Jesús piraichi petsipaebinexatsi. Saduceomona*e* barompaya pia pecuidubi coyenewa xeina xua pinae pomona*e* pewerapeibiwi equeicha jopa asu tsaibiyo. Barapo pecuidubi coyenewa jopa jupaeyo po pecuidubiwa Jesús pia pecuidubiwa tatsi xua pinae jiwi equeicha asu jinompaena poxona*e* werapa. Daxota barapomona*e* Jesús tsipaebatsi, jeye:

¹⁹—Pon jiwi Pecuidubim. Moisés nacata tina, namchi: ‘Icha pebin piowa cuenta tupa, yawa jopa xeinaeyo pexui, xuyapin bewa xuya pentapin pecoutha coseuri pichina xua bapoxona*e* pentapin pecoutha pexeinaenexa tsane pexui’, jei Moisés. ²⁰Barichi, matha iru cae peweicho caepiwi nabaru jinompa siete poyobe. Matapin jitha eca. Bapon piowa cuenta naxuba. Pexui jopa xeinaeyo. ²¹Pon cotacaya naexana xuya pentapin coseuri pita xua bapoxona*e* pentapin pecoutha pexeinaenexa pexui. Bapon iru cuenta tupa, iru jopa xeinaeyo pexui. Bapoxona*e* ichun xuyapin xuya barapowa pita xua pentapin coseuri pita. Bapon barichi iru cuenta tupa, iru pexui jopa xeinaeyo. ²²Daxita barapo siete poyobe cuenta nanapentapona barapowa poxona*e* bequein xuya pecoutha nonotaponeiba. Barapo siete poyobe, caein jiwana jopa pecoutha tapoponaetsi pexuyo. Bapoxona*e* matapainya iru bapowa tupa. ²³Xam, Jesús, ba paebame, ba jam: ‘Matacabi jopaena po matacabitha Nacom asu exanaena, xua jiwi asu exanaeinchi muthun wetsina’, ba jam. Poxona*e* barapo matacabi jopaena xua daxita jiwi asu jujuinaena, barapo matacabitha jintam metha bapowa xuya pichinchi, xua ichun pichina, xua barapo siete poyobe caein jiwana? Tsipei caena bayatha barapo siete poyobe, caepi jiwi cuenta nanapentapona barapowa, jei saduceomona*e*.

²⁴Bapoxona*e* Jesús jume nota barapomona*e*, jeye:

—Paxam apara catsawiya pana nejume notame, tsipei jopa beta payaputaem xua Nacom Pejume Diwesitha payabara yorobame baxua. Matautano jopa payaputaem Nacom pia peayapusu itorobi coyenewa tatsi. ²⁵Poxona*e* petupaewi asu jujuinaena jopa jitha eenapona*e* tsane. Yawa barapomona*e* pexantixi jopa jitha cuarebapona*e* tsane. Tsipei barapomona*e* barichi tsane icha be matatsunpiwimona*e* ichi, po matatsunpiwi Nacom pia nacuatheicha jinompa, xua po matatsunpiwi

jopa jitha enaeyo. ²⁶Paxam bequein bara bayatha payorobame pocotsiwa Nacom yabara namchi pejume diwesitha xua pomonae equeicha asu jujuina pomonae pewerapebiwi. Barapo diwesitha Nacom cueicueijeji ichaxota xua poxonae po naewa taxuncua, Nacom jeye: ‘Xan Abraham pia Nacomun tatsin, iru Isaac pia Nacomun tatsin, iru Jacob pia Nacomun tatsin’, jei Nacom. ²⁷Baxua Nacom paeba, tsipei Abraham, iru Isaac, iru Jacob pewerapaewi anoxuae equeicha caewa asu jinompa, Nacom pia nacuatheicha tatsi. Pomonae pewerapaewi, pomonae caewa equeicha asu jopa pejinompaewi, barapomonae jopa pia Nacom tatsi, pon itabocotha eca. Saya jame meisa pomonae pewerapaewi caewa equeicha asu pejinompaewi, barapomonae jame pia Nacom tatsi, pon itabocotha eca. Daxota paxam catsawa papaebame, jei Jesús.

**Meje yabara poxonae Jesús yabara cuiduba po
peitorobi cui coyene pepa peainya cui coyenewa
(Mt 22.34-40)**

²⁸Caein pon jiwana monaepin pomonae jiwi pecuidubiwi Moisés pia peitorobi coyene tatsi, bapon jume tane xua Jesús iru saduceomonae najume matsontsonobiya paeba. Matautano bapon jume tane xua Jesús xanepanaeya betiya jume nota barapomonaetha. Daxota bapon yainyaba Jesustha, jeye:

—¿Eta po peitorobi coyene pepa peainya cui coyenewara, po peitorobi coyene beyacaincha icha peitorobi coyene? jei bapon.

²⁹Jesús jume nota bapontha, jeye:

—Po peitorobi cui coyenewa pepa peainya cui coyenewa jeye: ‘Paxam Israel nacuamonaepiwi pam pajume taema xuaje meje: Pon jiwi Pecanamataxeinaein bara compa pepa Pata Nacom, icha Nacom ajibi. ³⁰Antobeinde Jinya Necanamataxeinaein bapon Nacom xua daxita nejuntu coyene wetsina, matautano xua daxita jinya nepoponae coyenewatha, matautano xua daxita nenanta xeinaewatha nentasipatha, matautano daxita nedaunwei coyenewatham’, jei barapo peitorobi coyenewatha, po peitorobi coyenewa pepa peainya cui coyenewa. ³¹Po peitorobi coyene cotacaya itoroba ichaxotaba ‘dos’ jei, barapo peitorobi coyene be jume jupa po peitorobi coyene copiya ducua. Iruru barapo peitorobi coyenewatha jeye: ‘Antobeinde jinya necatsicuarabu ecaein icha ichim xua jinya coutha naantobem’, jei barapo peitorobi coyenewatha. Icha peitorobi coyenewa aibi po peitorobi coyene peainya cui coyenewa, po peitorobi coyenewa xua beyacaincha po peitorobi coyenewe, jei Jesús.

³²Bapoxonae caein jiwana monaepin pomonae jiwi pecuidubiwi Moisés pia peitorobi coyene tatsi, bapon jeye Jesustha:

—Bara beta paebame pocotsiwa aunxuae paebame ponxaem jiwi Necuidubim. Bara xainyeya paebame xua pinae pepa Nacom bara

compa popona xua icha pepa Nacom ajibi. ³³Matautano bara xainyeya paebame xua pinae bewa Nacom antobetsi xua daxita wajuntũ coyene wetsina, matautano xua daxita wajinompae coyenewatha, matautano xua daxita wananta xeinaewatha wantasipantha, matautano daxita wadaunwei coyenewantha. Matautano bara xainyeya paebame xua wanacatsicuarabu enaewi bewa pinae antobe tsainchi icha ichichi xua wacoutha naantobetsi. Baraxua jame bichocono peainya cui coyenein pocotsiwa bewa exanaetsi, beyacaincha xua duwein ompin tautatsi yawa xua ichawan tautatsi xua watuxusi exanaenexa Nacom nexa, jei bapon. ³⁴Poxonae Jesús jume tane xua bapon beta jume nota, Jesús jeye:

—Bara saya tsiwiyo cata seica xua jinya nejume cowuntsinexa xua nenantauntsinexa Nacom pon jiwi itorobiya pia pepa Peewatsinchi, jei Jesús.

Bapoxonae nama dapon ajibi xua pon Jesús peyainyabinexa tsainchi.

**Meje yabara poxonae Jesús nayabara jei: “Mesías,
¿jintam pia pemomoxi susato jiwana pin tatsira?” jei
(Mt 22.41-46; Lc 20.41-44)**

³⁵Bapoxonae Jesús yabara cuiduba Nacom pin pia botha tatsi, xua pon Mesías baraichi xua nayabara paeba Jesús, jeye:

—¿Eta pocotsiwa metha pomonae jiwi pecuidubiwi Moisés pia peitorobi coyene tatsi paeba xua pinae Mesías bapon David pia pemomoxi susato jiwana pin tatsi? ³⁶Nacom pia Pejumope tũnaxũ tatsi David cueicueije exanatsi. David jeye:

‘Nacom pon Pecanamataxeinaein jiwi,
Tanecanamataxeinaein baraichi pon Mesías,
jeichichi: Tacoxa werena ecare, beya abu
tsane poxonae necaitafaetabi jiwi pia
pecanamataxeinaeinchi tatsi caexanaeinchi, jei
Nacom pia Pejumope tũnaxũ tatsi’, jei David.

³⁷Icha David Mesías yabara jei, ‘Bapon Mesías Tanecanamataxeinaein’, jei, ¿eta xua metha tsipae xua Mesías apara David pia pemomoxi susato jiwana pin tatsi? jei Jesús.

Barapo pin bicheito bichocono tsimumu wũnaetsi pocotsiwa Jesús cueicueije.

**Meje yabara poxonae Jesús muxuweta jiwi xua pomonae jiwi pecuidubiwi
Moisés pia peitorobi coyene tatsi barapomonae pecuiyainwa tatsi
(Mt 23.1-36; Lc 11.37-54; 20.45-47)**

³⁸Poxonae Jesús cuiduba jiwitha, jeye: “Dota pam, dota pomonae jiwi pecuidubiwi Moisés pia peitorobi coyene tatsi. Barapomonae pia pecuidubi coyenewan tatsi pecuiyainwa pande. Jopa paexanaeinde icha

bapomonae ichi xua barapomonae bichocono ichichipa xua penama xatabiwa po paparuwan apiapiya deca xua be pomonae peainya cui jiwi penaexanaewi naexana. Barapomonae bichocono ichichipa xua jiwi namtontha jacobebina barapomonaetha xua jiwi pebaru cui itura jineibinexa barapomonae. ³⁹Barapomonae bichocono ichichipa xua nanta caeneiba judiomonae pia penacaeuttsi bontha tatsi ichaxota ba enathopeiba pomonae peainya cui jiwi penaexanaewi. Matautano barapomonae bichocono ichichipa xua eneiba ichaxota ba eneiba pomonae peainya cui jiwimonae poxonae pexaewan tsinacaeuteiba penabaneibinexa tsane. ⁴⁰Matautano barapomonae powaxi pecuenta werapaewaxichi piseurixi barapowaxi cueranta enatsi pia bon. Barapomonae naemata jopa cuinaya najume copababeibiyo poxonae tsipaebeiba Nacom. Barapomonae bichocono peraxa jubebinchi poxonae po mataqueitha Nacom jiwi yabara paebina penatsicuentsiwa xua abe peexanaexae Nacomtha. Barapomonae atene tsane beyacaincha poxonae ichamonae atene exanaeinchi xua jopa pejume cowuntsixaetsi Nacom”, jei Jesús.

**Meje yabara poxonae Jesús yabara paeba xua petsiriwa
paratiyobe cata Nacomtha, powa pecuenta tupaewatsi piseuri
(Lc 21.1-4)**

⁴¹Poxonae Jesús eca Nacom pin pia botha tatsi xua peitabara weya, xua ichaxota jiwi jeyeiba paratixi Nacom nexa, bapoxonae Jesús tane xua pinmonae pomonae copei pexeinaewi paratixi nawita jeya ichaxota jiwi jeyeiba paratixi Nacom nexa. ⁴²Barapoxonaeru yabuyo patopa, powa pecuenta tupaewatsi piseuri. Barapowa bichocono peacopebiwayo. Bapowa jeca ainya pecacomocae paratiyobe Nacom nexa. Barapo paratiyobe tsiqui paratiyobe. ⁴³Bapoxonae Jesús pijimonae waba, yawa jeye barapomonaetha:

—Bara xainyeya paca tsipaebatsi. Barapo yabuyo, powa pecuenta tupaewatsi piseuri, bapowa peacopebiwayo. Daichitha barapowa jeca ainya paratiyobe Nacom nexa. Bapowa cata beyacaincha ichamonae daxita pomonae xua jeya xua Nacom nexa. ⁴⁴Daxita barapomonae jeya pocotsiwa tanacopabeibatsi. Ichitha nama bapowa bichocono peantobexae Nacom daxota omeicha jeca pocotsiwa bequein canantawenona xua pepoponaewa tsane bequein bichocono peacopebiwayo, jei Jesús pijimonaetha.

**Meje yabara poxonae Jesús yabara paeba xua ichamonae
abe cana exanaena Nacom pin pia bo tatsi
(Mt 24.1-2; Lc 21.5-6)**

13 ¹Poxonae Jesús Nacom pin pia bo wejoniya, bapoxonae caein Jesús pijimonae jiwana tatsi, Jesús tsipaebatsi jeichi:

—iPon jiwi Necuidubim, taema maisa pexeinya iboton, yawa pexeinya ibo bo! jei bapon.

²Ichitha Jesús jume nota bapontha, jeye:

—Aunxuae pataebename barapo iboton yawa xua pexeinya bon. Apará jopá cae ibotiyo nacopatuncuae tsane icha iboto peumatha. Daxita abe tsane, jei Jesús.

Meje yabara poxonae Jesús yabara paeba xua copiya matha pewunaeya exanaena petsita itutsi coyenewa poxonae daxita weraweracaenaba
(Mt 24.3-28; Lc 21.7-24; 17.22-24)

³Bapoxonae Jesús pijimonae baru pona demxuwatheicha, po demxua pewun demxu Olivowa tsipei baxota umena olivo naein. Poxonae Jesús ecopiya demxuwatheicha, po demxua Nacom pin pia bo itama tayecatsi, bapoxonae Jesús pijimonae tatsi Pedro, iru Santiago iru Juan, iru Andrés, barapoyobe Jesús namicha tsipaebatsi. ⁴Barapoyobe jeye:

—Paichichipan xua xam tapata netsipaebiwam tsane zeta poxonae metha ichamonae baxua exanaena poxonae abe cana exanaena Nacom pin pia bo tatsi? zEta pocotsiwa tsane metha xua pewunaeya tsita itapeinya xeinaena po coyene xua poxonae imoxoyo daxita weraweracaenaba? jei Jesús pijimonae tatsi.

⁵Jesús jume nota barapomonaetha, jeye: “Dota pam, bu ichamonae naerabiya paca muxu tsipaeba, xua daxota abe paexanaetsipame. ⁶Tsipei tsana patsina ayei bicheito jiwi pomonae natsicotaena icha be xan ichin. Barapomonaetha jei tsane: ‘Apara xan Mesías’, jei tsane. Poxonae barapomonaetha muxutorobiya paebina, bapoxonae pinmonae jume cowuntsina.

⁷“Pajume taename xua jiwi juinya nabenoutsina xote, yawa xua juinya iruru nabenoutsina icha ira beya. Daichitha jopá pajunuwinde, tsipei baxua pewunaeya matha copiya tsane. Daichitha cataunxuae dapo matababi aichica tsane xua poxonae daxita weraweracaenaba yatsicaewa. ⁸Cae nacuapiwi iru icha nacuapiwino, barapo ainya nacuapiwibe nabenoutsina. Matautano iru pon nacua peewatsin iru ichundu pon icha nacua peewatsin, baponbe iru nantiya nabenabe. Matautano ainya nacuantha ira jijiyatsina. Matautano ainya nacuantha jainbo nacua tsane tsipei pin mayayo tsane. Baxua copiya matha tsane xua jiwi atene toponae tsane bichocono xua beya jopá nama juniya tsane.

⁹“Ichitha dota pam, tsipei poxonae baxua pewunaeya tsane jiwi paca teiquebina painya nepaca caenaetsinexa pomonaetha pomonae tomaran pentacaponae. Matautano paca cuainchina judiomonae pia penacaetutsi bontha tatsi. Yawa paca caponaena nacua peewatsiwi peitabaratha tatsi, painya tana nejume cowuntsixaemxae. Yawa paca caponaena pentacaponae peitabaratha tatsi pomonae iru

itoroba jiwitha xua pon nacua peewatsin nexa painya tana nejume cowuntsixaemxae. Barapoxonae bara paca cui itacupaena xua barapomonaetha tapana neyabara paebiwam pocotsiwa bayatha paca tsita exanatsi. ¹⁰Barapo pecapanenebiyae diwesi, tamonae bewa paebinoutsina daxita nacuanpiwitha xua poxonae pewunaeya tsane xua daxita weraweracaenaba. ¹¹Poxonae barapomonaetha paca caponaena pomonaetha pomonaetha tomara pecanamataxeinaewi xua pia painya nepaca cayabara paebinxatane xua painya nenatsicuentisiwa xua abe painya neexanaexae bapoxonae jopa patsiwanaya junuwiya najuntũ coyene exabinde xua painya netsipaebiwa tsane barapomonaetha. Paxam jame papaebare pocotsiwa xua caena bapoxonae Nacom cueicueijeji paca exanaena. Bapoxonae po jume pacueicueijam tsane apara jopa poxorũ painya coya paichichipaem, apara jame Nacom pia Pejumope tũnaxũ tatsi baxua paca cueicueijeji exanaena. ¹²Jiwi barompaya pia peweicho jiwi caenaetsina ichamonaetha xua pejutebinexa tsainchi. Irũ coxiyeiwi ichamonaetha caenaetsina pia pexui. Irũ pexui paxa jiwi caenaetsina ichamonaetha pejutebinexa tsainchi. ¹³Daxita nacuanpiwi paca casebina painya tana nejume cowuntsixaemxae. Ichitha pomonaetha awiwa antũyapusũya nejume cowuntsiya jinompaena xua beya yacuiya werapaeya othopaena poxonae bequein abe taexanatsi ichamonaetha barapomonaetha jame Nacom napaeba cana exanaena.

¹⁴“Daniel pon Nacom peitorobi jume pepaebin, bapon caena bayatha yabara tsiwanaya muxu dutsiya tina pocotsiwa xua bichocono abe, pocotsiwa xua weraweraca cana exana. Pataename pocotsiwa xua ichũn Nacom pin pia bo tututha exananotsina, pocotsiwa jopa bewa notsi baxota, pocotsiwa Daniel bayatha yabara paeba. Bapoxonae payaputaename xua bara imoxoyo matacabi jopaenaba poxonae daxita weraweracaenaba”, jei Jesús. (Xan Marcos paca baraichi: “Pon yorobina po jume diwesi tinan moya jume naitaewatsina pia peyaputaenexa tsane”, paca jeichi.) Equeicha Jesús jeye: “Poxonae barapocotsiwa pataename bapoxonae pomonaetha Judea nacuaetha jinompa, barapomonaetha bewa demxuwan berũcupiyaena. ¹⁵Barapo matacabitha pon bo matatupatha uncua, bapon jopa bewa botha jonyae tsane xua penotsiwa tsane pocotsiwa tabobeinchi bomũxũ tututha. Saya jame bewa nainya benaetsiricuaena. ¹⁶Irũ pon pabitha popona, bapon jopa bewa caibeya ponae tsane botha xua penotsiwa tsane pia paparuwan. Saya jame bewa nainya benaetsiricuaena. ¹⁷iPai yabũxi tsobenae powaxi pexui bũpana taenatsi barapo matacabitha! iPai irũ powaxi pexui isaina barapowaxi tsobenaerũ! Tsipei acabe tsobenae tsane pexui. ¹⁸Poxonae pewunaeya tsane baxua Nacom pawũcare xua jopa painya nerũcupaewa tsane poxonae awũbo peaquexae bichocono. ¹⁹Tsipei barapo matacabintha jiwi bichocono pin peraxa exanaeinchi. Atene tsane beyacaincha poxonae

jiwi atene tsaibi poxonae Nacom aena nacua exana, xua equeicha nama bichocono pin peraxa tsane. Equeicha bexa bapoxonae bapana jopa baxua exanae tsane poxonae bichocono jiwi pin peraxa. ²⁰Icha Nacom jopa be caentacabiyobe exanaetsipae metha dapomonae ajibi tsipae pomonae panenebiya barapo peatene coyenewa weya. Daichitha Nacom be caentacabiyobe exanaena peantobexae pijimonae, pomonae pia peitapetsiwixae tatsi.

²¹“Bapoxonae icha ichun paca jei: ‘Pataema bapon apara Mesías uncue pon Nacom itorobica’, paca jei, iru icha ichun paca jei: ‘Pataema bapon Mesías xota uncuiye’, paca jei, barapo jumein jopa pajume cowuntsinde. ²²Tsipei pomonae pemuxitorobi jiwi tsana patsina. Barapomonae natsicotaena icha be xan ichin ponxaein Mesías. Matautano barapomonae natsicotaena icha be pomonae Nacom peitorobi jume pepaebiwi ichi tsane. Barapomonae pexeinya petsita itutsi coyenewan exanaena peitabocotha, po irathe tsaneno xua jiwi pemuxitorobinexa tsainchi xua jiwi pejume cowuntsinexa pocotsiwa barapomonae paeba. Barichiru pomonaetha pomonae Nacom pia peitapetsiwi tatsi pemuxitorobinexa tsainchi xua iruru icha metha barapomonae pejume cowuntsinexa tsaneru pocotsiwa barapomonae paeba. Ichitha jopa itacurpae tsainchi xua barapomonae pemuxitorobiwa tsainchi. ²³Tsaca pajinompare, tsipei baxua tsiwanaya yabara paca tsiwuna nae muxu dutatsi”, jei Jesús.

Meje yabara poxonae Jesús nayabara paeba xua poxonae equeicha patopaetsica ponxae Nacom pia Peitapetsin
(Mt 24.29-35,42,44; Lc 21.25-36)

²⁴Equeicha Jesús namchi, jeye: “Po matabintha poxonae nacui wetsina xua jiwi pin peraxa tsane, bapoxonae xometo nainya naquitabina. Jomocoichato jopa pentha tsane. ²⁵Opiteiton peitaboco weothopeicaena. Matauta napuna torobabiyaena Nacom xua xuan itabocotha dubena. Bapoxonae jopa xapain dubenanaeyo tsane. ²⁶Bapoxonae daxita jiwi taena peitabocotha xua po coyene apara tapatopeicaewa tsaneba tsaquinaebowatha peitaboco wetsica ponxaein Nacom Tananeitapetsin. Nacom pia peayapusu itorobi coyenewatha matautano bichocono pexeinya itupanae coichathano patopeicaein. ²⁷Matautano itorobin tamatatsunpiwi xua inta pecaetutsinexa pomonae taitapetsiwi. Nacaetutsina daxita nacuanpiwi jiwana, iru ichamonae pomonae ichaxota xometo weecoinapiwi jiwana, iru ichamonae pomonae ichaxota xometo bejopiyapiwi, jiwana, iru ichamonae pomonae pocotsiwa werenepiwi jiwana, iru ichamonae pomonae pocotsiwa berequepiwi jiwana.

²⁸“Payaputaema barapo pecayabara juta pepaebi diwesiyo xua higuera nae. Jeye: Poxonae ba pataneme xua pena noxu xuxuwapona, bapoxonae ba payaputaneme xua bara imoxoyo wei tsurucuae tsoponae, xua

pentono perubenaenexa. ²⁹Barapocotsi jũta coyeneya ichi tsane poxonae pataename daxita baxuan pocotsiwa aunxuae paca tsipaebatsi pocotsiwa bexa exanaena, bapoxonae payaputaename, xua bara imoxoyo tsane xua tapatopae wũnae tsane. ³⁰Bara xainyeya paca tsipaebatsi daxita judiomonae naitapataya naexanaponaena beya yacuiya othopaena poxonae Nacom exanaena daxita baxuan pocotsiwa xuaunxuae paca tsipaebatsi. Bapoxonae barapo judiomonae weraweracaena pomonae poxonaerũ barapo matabitha jinompa. ³¹Peitaboco aichurucuae tsane. Mataũtano ira aichurucuae tsane. Meisa nama tajumein ataya tsitecaena xua daxota daxita nayabara jume wetsina be pocotsi coyeneya bayatha paeban.

³²“Po matabitha baxua exanaena, mataũtano po horatha baxua exanaena jiwi jopa baxua yabara yaputaeyo. Irũ matatsunpiwi pomonae peitaboco beicha jinompa baxuan irũrũ jopa yabara yaputaeyo. Irũ xan ponxaein Nacom Pexanton baxua jopa yabara yaputaeyo. Meisa saya Nacom, pon Waxa yaputane poxonae po matabitha baxua exanaena. Mataũtano yaputane poxonae po horatha daxita exanaena baxua xuaunxuae paca tsipaebatsi.

³³“Tsaca pajinompeibare xua tapatopae wũnae tsane. Yawa Nacomtha patsipaeba dubenanaebiyama, tsipei jopa payaputaem po mataqueitha patopaein. ³⁴Barapocotsi coyeneya jũta ichi poxonae xan patopeicaein taitorobinexa tsane jiwi, icha be poxonae pebin ichi poxonae warapaena icha nacia beya. Poxonae bapon pewũnaeya tsane xua warapaena pia bo weya, copiya matha waba pia petanacuichiwichi. Bapon daxita pia petanacuichiwichi barompaya cobenata petanacuichiwantsi tatsi. Mataũtano bapon itoroba pon bo coiboto eena xua xanepanaeya bo pe-eeenaenexa. ³⁵Paxam tsaca pajinompere, tsipei jopa payaputaem poxonae patopeicaein, icha be barapomonae ichi poxonae jopa yaputaeyo poxonae pepatopaewa tsane pia pecanamataxeinaeinchi pon bo pexeinaeinxae. Barapomonae jopa yaputaeyo icha barapon patopaena poxonae quirei tsanaicha, ichacuitha icha bapon patopaena papaetha, ichacuitha icha bapon patopaena mataqueiwũnaeyo, ichacuitha icha bapon patopaena baya tsane. ³⁶Barapomonae jopa yaputaeyo xua pia pecanamataxeinaeinchi nainya patopaena xua yaichamaicha mata taenabounaeinchi poxonae maitumena. ³⁷Meje xuaje paca tsipaebatsi, xua paca jeichi: “Tsaca pajinompere, paca jeichi, baxua irũ daxita jiwitha tsipaeban”, jei Jesús.

Meje yabara poxonae fariseomonae irũ sacerdotemonae pia pentacaponae tatsi daxita barapomonae Jesús yabara nanta xeinatsi po coyeneya xua Jesús pewaetabiwa tsainchi (Mt 26.1-5; Lc 22.1-2; Jn 11.45-53)

14 ¹Acoibi po matabiyobe cataunxuae seica poxonae jiwi nacaetutsina penabanaenexa pexaewa, peyabara nanta

xeinaenexa barapo matakabi xua poxonae caena bayatha matha judiomonae Egipto nacua weya panenebiya. Barapo matakabi pewun Pascua matakabi wun. Barapo Pascua matakabi wuntha jiwi xane pan, po pan xua jopa cotowiyo. Sacerdotemonae pia pentacaponae tatsi, iru pomonae jiwi pecuidubiwi Moisés pia peitorobi coyene tatsi, daxita barapomonae nabaru muxu jei xua bepa pinae eta bichi tsane poxonae Jesús nameicha waetabinchi pebexubinexatsi. ²Ichitha barapomonae najeye:

—Abu jopa waetabi tsainchi poxonae jiwi Pascua matakabi wuntha nacaetuta penanabanaenexa pexaewa. Tsipei icha barapo mataqueitha waetabichipatsi pinmonae anaepanaya najume cayayataxubichipa, najei daxita barapomonae xua Jesús yabara paebatsi.

**Meje yabara poxonae petsiriwa Jesús mata epatabatsi penasiwa,
po penasiwa petuxueiwa
(Mt 26.6-13; Jn 12.1-8)**

³Poxonae Jesús Betania tomaratha popona, bapoxonae Jesús Simón pia bo tatsi betajoniyatsi, pon peperu sawinchi. Poxonae Jesús eca pexaethopaewatha, bapoxonae patopa petsiriwa. Bapowa capatopa alabastro ibo bosibu atsato, xua bichocono wunca penasiwa xua petuxueiwa. Barapo petuxueiwa bichocono ainya matoma. Poxonae wacataba barapo bosibu, bapoxonae Jesús mata epatabatsi barapo petuxuei nasiwatha. ⁴Pomonae iru baxota ena, barapomonae jiwana anaepana, yawa caemonae najei:

—¿Eta pocotsiwa metha saya xuba jane barapo petuxuei nasiwa?

⁵Barapo petuxuei nasiwa becaenaetsipatsi. Bapoxonae bexeinaetsipatsi trescientos po paratiximonaebe po paratiximonaebe xua namatomata xua poxonae trescientos matakabibe nexa xua poxonae nacuita. Barapo paratixitha beyawenaetsipatsi peacopeibi jiwi, najei barapomonae.

Bapoxonae barapomonae barapowa casebatsi.

⁶Ichitha Jesús jeye barapomonaetha:

—Moya pande, bara pacopare. ¿Eta pocotsiwa metha barapowa pabiataneme? Pocotsiwa barapowa inta exana apara seicayarü xua pexeinya coyene inta exana. ⁷Barapo irathe peacopeibi jiwi paca baru jinompeibina ataya tsaibi tsane. Paca itacupa xua beta pata exaname barapomonae poxonae paichichipame. Ichitha nama paxam jopa ataya paca baru poponae tsainchi barapo irathe poxonae paca itacupa xua pana neyawename. ⁸Barapowa xua nenta epataraba tapepontha xua petuxuei tuxusi nasiwatha apara xua tsiwanaya nenacui yabara nacui wunaeta xua muthu tana neboyaenexa poxonae tupaen. ⁹Bara xainyeya paca tsipaebatsi. Daxita nacuanthan poxonae jiwi cueicuei jei tsane Nacom pia pecapanenebiyae diwesi barapo jiwi yawa yabara paebina xua pocotsiwa

poxonae bapowa inta exana xua jiwi bapowa peyabara cui nanta xeinaenexatsi, jei Jesús.

Meje yabara poxonae Judas, Jesús caenaetaxotsi
(Mt 26.14-16; Lc 22.3-6)

¹⁰Barapoxonae Judas Iscariote pon doce poyobe jiwana, pomonae Jesús pijimonaexae tatsi, bapon sacerdotemonae pia pentacaponae tatsi beya pona. Bapon pona xua petsipaebinxaxua Jesús caenaetaxubinchi barapomonaetha. ¹¹Poxonae barapomonaexaxua jume taerucpa bichocono ichichiparucpa baxua. Yawa barapomonaexaxua Judas Iscariote muxu tsipaebatsi xua paratixi catsibapaebatsi. Bapoxonae Judas tamropata pitaba xua jeita, xua po coyenetha Jesús pecaenaetaxubiwa tsainchi barapomonaetha poxonae peyapu xanepanaewatha.

**Meje yabara poxonae Jesús pijimonaexaxua
nabane Pascua wun matabitha**
(Mt 26.17-29; Lc 22.7-23; Jn 13.21-30; 1 Co 11.23-26)

¹²Nexata copiya matabitha jopa po matabitha tsiwana penanta carucuae matabitha xua po matabitha poxonae jiwi tsinaetutsina, xua penabanaenexa pan, po pan jopa muxuna pentsiyo levadura matawun, pocotsiwa xua cotowa exana pan. Barapo penanta carucuae matabitha ba corderoxi pebtoxi xua oveja coxi jutebatsi xua jiwi pexaenexa. Bapoxonae barapo jiwi cayabara nanta xeina xua caena bayatha pia pamo susato jiwi tatsi corderoxi juteba yawa xane beya poxonae panenebiya Egipto nacua weya. Barapo matabitha Jesús pijimonaexaxua yainyabatsi, jeye:
—¿Exota ichichipame xua xota pexaewa paca tsiwunaetsinchi wanabanaenexa tsane xua Pascua wun matabitha nexa? jei barapomonaexaxua.

¹³Bapoxonae Jesús itoroba nacueyatabe poyobe ponbe xua doce poyobe jiwana, pomonae Jesús pijimonaexaxua tatsi. Jesús jeye:

—Tomara beya paponarebe. Barapo tomarathiya pantenta ponaenamebe pebin pon mera yantana ponaena juruwatotha. Bara bapon papuna ponbebe. ¹⁴Bo beya paponarebe ichaxota bapon joniyaena. Pon bo pexeinaein pabarande: ‘Pon jiwi Pecuidubin cabarai: ¿Incane tutura, po tututha tajiwimonaexaxua nabanaein pexaewa Pascua wun matabitha nexa?’ jei bapon, pajandebe. ¹⁵Bapoxonae bapon paca tsita itacayopichinabe po tutu pin tutu po tutu xua asiyeicha po tutu xua bayatha tutu xaneba. Barapo tututha pexaewa pana cui wunaetajebare xua wanabanaenexa pexaewa barapo Pascua wun matabitha nexa, jei Jesús.

¹⁶Bara bapoxonae baponbe ponatabe. Bara patopabe tomaratha. Bara tanebe daxita be po coyeneya bayatha Jesús paeba. Bapoxonae pexaewa nacui wunaetajebare Pascua wun matabitha nexa xua penabanaenexa.

¹⁷Poxonae quirei tsanaicha bapoxonae Jesús pijimonae baru patopa barapo tututha. ¹⁸Poxonae Jesús pijimonae cataunxuae baru xunaboca pexaethopaewatha, bapoxonae Jesús pijimonae barai, jeye:

—Bara xainyeya paca tsipaebatsi caein pon paxam jiwana pam pon nebaru xaeuncua bapon necanaetaxubina ichamonaetha, jei Jesús.

¹⁹Nexata bapoxonae Jesús pijimonae tatsi unthuthu wecoyeyi tsurucupae, nexata daxita tsana jei tsoponae Jesththa:

—¿Apara xan cacaenaetaxubinchi? jei daxita barapomonae xua Jesús tsana yainyabaponatsi.

²⁰Jesús jume nota barapomonaetha, jeye:

—Pon paxam jiwana pam xua doce poyobe jiwana xua cae paratotha pana nabaru jajauncuaponanbe pan apara bapon necaenaetaxubina ichamonaetha. ²¹Xan ponxaein Nacom Tananeitapetsin bewa tupaeyin, tsipei Nacom Pejume Diwesitha baxua neyabara paeba caena bayatha. Ichitha pebin tsocuae pon necaenaetaxubina ichamonaetha. Metha jame wunae tsipae icha bapon bayatha jopa naexanaetsipae, tsipei bexa tsane bichocono atene tsocuae tsane, bichocono abe tana necana exanaexae, jei Jesús.

²²Poxonae Jesús pijimonae baru xaeuncua, bapoxonae Jesús pecobetha pita pan. Yawa Paxatha tsipaeba, jeye: “Axa, maisa juntu coyene weiweinan xua pan pata tanecatsiwam”, jei. Bapoxonae Jesús pecobetha pan epa janaca, yawa catsiba pijimonae. Bapoxonae pijimonae barai, jeye:

—Paxaema po pan epa janacan. Barapo pan apara neyabara caunuta tapepon xua poxonae tapaca tsitupaewatsi tsainchi, jei Jesús.

²³Bapoxonae Jesús equeicha pecobetha pita corotiyo, yawa Nacomtha tsipaeba, jeye: “Axa, maisa juntu coyene weiweinan xua corotiyotha ecareca pepa uva mera xua pata tanecatsiwam”, jei. Bapoxonae Jesús pijimonae cata corotiyo xua pejiwana aapaponaenexa. Daxita barapomonae bara jiwana aapapona. ²⁴Bapoxonae Jesús jeye pijimonaetha:

—Pena petsiwunae muxu dutsi coyenewa paca tsipaebatsi. Barapo uva mera po mera xua corotiyotha tsijuntu eca yabara caunuta tajana barapo uva mera xua jana othoparenaeyin poxonae tupaeyin. Barapo jana tsita itapeinya xeinaena xua jiwi pinmonae yabara junteinaeyin abe pia peexanae cuiru coyenein tatsi. ²⁵Bara xainyeya paca tsipaebatsi, barapo uva mera jopa equeicha paca baru apae tsainchi anoxuae. Meisa abu bexa tsane pena coyenewatha paca baru apaeinchi barapo uva mera poxonae Nacom neexanaena xua itorobiya ewatsin jiwi, jei Jesús.

Meje yabara poxonae Jesús namchi xua pinae Pedro Jesús yabara jei tsainchi: “Jopa dapon yaitaeyinyo”, pinae yabara jei tsainchi Jesús (Mt 26.30-35; Lc 22.31-34; Jn 13.36-38)

²⁶Poxonae Jesús pijimonae baru najume weta xua naxuna Nacom nexa, bapoxonae Jesús pijimonae baru pona demxuwa beya. Barapo demxuwa

pewun demxu Olivowa, olivo naein peumenaexae baxota. ²⁷Nexata Jesús pijimonaē barai, jeye:

—Anoxuae barapo merawithe daxita pam pana necuentarucupaename tapaca urapentsixaetsi tsainchi. Baxua paexanaename, tsipei Nacom Pejume Diwesitha paca yabara cui tsiwunaeya jeye: ‘Poxonae ovejamonaē peewatsin bexubin, bapoxonae ovejamonaē tsanarucupaena’, jei Nacom. Penamchixae poxonae ichamonaē newaetabina tanebexubinexa pana necuentarucupaename. ²⁸Ichitha taeyarapaeyo Nacom equeicha asu neexanaena. Bapoxonae paca tsiwana patopiyaeinchi Galilea nacua beya, poxonae bara beya paponaname, jei Jesús.

²⁹Nexata Pedro Jesús jume notatsi, jeye:

—Bequein ichamonaē cacuentarucupaena jinya neuraxubixae, nama xan bapana jopa cacuenta naetsiricuae tsainchi taneuraxubixaemxae, jei Pedro.

³⁰Nexata Jesús Pedro jume baraichi, jeye:

—Bara xainyeya catsipaebatsi, po merawithe pewunaeya poxonae ainya jume cuiyobetha wacara pebto fibina, bapoxonae xam copiya acoibi po jume cuiyobetha neyabara jam tsane: ‘Jopa dapon yaitaeyno’, neyabara jam tsane, jei Jesús.

³¹Ichitha Pedro equeicha jume daunweya, jeye:

—Bara bequein capuna tupaeyinchi ichitha baxua jopa cayabara paebi tsainchi, jei Pedro.

Iruru daxita Jesús pijimonaē tatsi bara jumichi, nanta jupiya paeba.

**Meje yabara poxonae Jesús Paxa tsipaeba ichaxota
tsica iriyo, po iriyo pewun Getsemaní
(Mt 26.36-46; Lc 22.39-46)**

³²Nexata Jesús pijimonaē baru patopa ichaxota tsica iriyo po iriyo pewun Getsemaní. Baxota Jesús barai pijimonaē, jeye:

—Xote abu paenare tha matha Taxatha tsipaebichi, jei Jesús.

³³Jesús baru pona Pedro iru Santiago iru Juan. Bapoxonae Jesús bichocono unthuthu wecoyeyi, yawa bichocono unthuthu deideidei.

³⁴Nexata barapo acoibi poyobetha Jesús barai, jeye:

—Bichocono juntu coyene natsepiya wecoyan, tsipei muxu tatupaē. Xote paenare, yawa payoyocare xua painya tanebaru naitaewatsinexam, jei Jesús.

³⁵Nexata Jesús tsiwiyo dabe natsixitabiya, irabe tauncuareca, tsipei jopa juniya ajuntatanyo. Jesús yaputane xua bichocono tsiatene tsane xua daxita jiwi abe pia peexanaē coyenein tatsi. Daxota Jesús Paxa wuca xua icha itacupatsi xua jopa penantawenonaewa xua peatenewa.

³⁶Bapoxonae Jesús Paxa tsipaeba, jeye: “Axa caitacupa xua daxita exaname. Icha ichichipame xua taneyawenaewam tsane, newepire

pocotsiwa neajuntutane exana. Ichitha jopa necana exanaeinde xua pocotsiwa ichichipan. Saya jame necana exande xua pocotsiwa ichichipame”, jei.

³⁷Nexata Jesús equeicha caibe iya ichaxota pijimonae jiwana tatsi taenatsi xua acoibi poyobe. Ichitha barapomonae maita. Jesús Pedro baraichi, jeye:

—Simón, ¿maituncuame? ¿Jopa caitacupaeyo xua yoyocame xua jinya tanebaru naitawatsinexam, matautano xua bara cae horathano? ³⁸Maisa payoyocare. Nacom patsipaebare xua jopa abe painya neexanaewa tsane poxonae caurimonae pia pentacaponaein tatsi piraichi paca juntu coyene jujuta. Painya juntu coyene wetsina bichocono paichichipame xua Nacom painya netsipaebiwa, ichitha painya pepon bichocono paacyenefaetabim xua painya netsipaebiwa Nacom.

³⁹Equeicha Jesús bara nama caeto caibeya pona xua Paxa

petsipaebinexa barapo jumetha, po jumetha copiya Paxa tsipaeba.

⁴⁰Bapoxonae equeicha Jesús pijimonae beya pona xua acoibi poyobe.

Daichitha barapo acoibi poyobe came maitumena, tsipei bichocono itata tsacatsaquei xua itamaipana. Barapomonae jopa yaputaeyo xua Jesús petsipaebiwatsi poxonae yaichamaicha mata taenanaboumeinchi. ⁴¹Bara nexata equeicha Jesús saya cuenta pona pijimonae, xua Paxa equeicha petsipaebinexa. Equeicha pijimonaetha patopa acoibi po cuiyobetha. Jesús jeye pijimonaetha:

—iMoya bara painya nepu maitumenaende, aunxuae jopa Nacom patsipaebim xua painya necayawenaenexa! Bayatha tsuxubi po horatha xua xan ponxaein Nacom Tananeitapetsin, ichun necaenaetaxubina ichamonaetha, pomonaetha pomonae peantucoyenebe jiwi.

⁴²Panacosabapende, panonobapondeno. Antha bu poinchi. Dota dawerena pon necaenaetaxubina ichamonaetha, jei Jesús.

Meje yabara poxonae Jesús waetabatsi

(Mt 26.47-56; Lc 22.47-53; Jn 18.2-11)

⁴³Poxonae Jesús cataunxuae tsipaebuncua pijimonae, bapoxonae Judas patopa. Bapon Judas doce poyobe jiwana caein pomonae Jesús pepa pijimonaexae tatsi. Judas pinmonae baru patopa Jesthatha. Ichamonae cusin cajinjinca. Ichamonae iwabi cajinjinca. Daxota daxita barapomonae pata tsipei sacerdotemonae pia pentacaponaei tatsi, iru pomonae jiwi pecuidubiwi Moisés pia peitorobi coyene tatsi, iru pomonae pitiri jiwiru daxita barapo pentacaponaei itoroba barapomonaetha. ⁴⁴Judas pon Jesús caenaetaxubinchi beya poxonae bapon patopa cou tsiwanaya paeba barapo pin bicheitho cou Jesús yabara paebatsi, cou jeye: “Pon tsutsubin bapon apara barapo pebin Jesús. Nexata moya bara pawaetabare. Pacaponde xua soldadomonae xainwaicha pecutsinexa tsane”, jei Judas.

⁴⁵Nexata Judas Jesús imoxoyo caquita poinchi. Bapoxonae nainya Jesús jeichichi:

—Pon jiwi Necuidubim, ¿xamda? jei Judas.

Bapoxonae nainya Judas Jesús tsutsubatsi. ⁴⁶Nexata barapomonae pomonae Judas pebaru patopaexae, Jesús imoxoyo caquita umenarucupatsi. Bapoxonae Jesús waetabatsi.

⁴⁷Caecin pon Jesús pijimonae tatsi jiwana, bapon nainya cusi namara wejonta. Bapoxonae bapon muxuyoro catsoniba, pon sacerdotemonae pia pepa pentacaponaein tatsi tanacuitatsi bapon muxuyoro catsonibatsi.

⁴⁸Bapoxonae Jesús jeye jiwitha:

—Pacapatame cusin, yawa iwabi ichi be poxonae pacana ichim pontha pon jiwi pecaibin. ⁴⁹Daxita matababin Nacom pin pia botha tatsi paca baru poponeibatsi. Paca cuidubeibatsino. Daichitha bapoxonae jame jopa pana newaetabim. Ichitha daxita baxuan neyabara canacui jume weta exana, bayatha Nacom Pejume Diwesitha tana necui yabara wuna tsiwanaya paebixae pomonae Nacom peitorobi jume pepaebiwi.

⁵⁰Bapoxonae Jesús daxita pijimonae cuentarucupatsi.

⁵¹Bapoxonae pewowin Jesús puna poinchi pon saya meisa paparuwatha naepa yaraba. Barapo pewowin waetabatsi pomonae Judas baru patopa.

⁵²Ichitha barapo pewowin nama xuetacuta pia paparuwa epato. Tamasa naetsiricua.

Meje yabara poxonae Jesús capoinchi judiomonae pia pecanamata caitorobi jiwi bicheito tatsi pia peitabaratha tatsi
(Mt 26.57-68; Lc 22.54-55, 63-71; Jn 18.12-14, 19-24)

⁵³Pomonae Jesús teicatsi, barapomonae Jesús capoinchi pon sacerdotemonae pia pepa pentacaponaein tatsi pia bo tatsi beya, pon yatsicaya peainya cuin. Baxota iru sacerdotemonae pia pentacaponaei tatsi nanacaetuta. Iru pitiri jiwino nanacaetuta. Baxota iru nanacaetuta pomonae jiwi pecuidubiwi Moisés pia peitorobi coyene tatsi. Daxita barapo penacaetutsi jiwi, barapomonaetha jiwi wun duta “Pecanamata caitorobi jiwi bicheito”, jei. ⁵⁴Iru Pedro Jesús tsiwiyo taju pu taetae tsiyatsi beya poxonae patopa panatha, po panatha ichaxota sacerdotemonae pia pepa pentacaponaein tatsi tauncuatsi bo. Poxonae Pedro pana tututha joniya bapoxonae naeca imoxoyo policiamonaetha pomonae Nacom pin pia bo tatsi pe-eenaewi. Pedro cui tane po coyeneya xua Jesús cana exantsi pomonae nacaetuta. Pedro nonopeca isototha.

⁵⁵Sacerdotemonae pia pentacaponaei tatsi, iru ichamonaeno pomonae pecanamata caitorobi jiwi bicheito, daxita barapomonae jeita ichamonaeno pomonae xua Jesús naerabiya peyabara paebinxatsi pocotsiwa xua Jesús paeba, xuano xua exana, pia barapo jumetha paebichi xua bara Jesús tupa peexanaewa tsainchi. Bara bequein pin bicheito pata xua

Jesús abeya peyabara paebinxatsi, ichitha cataunxuae barapomonae pomonae pecanamata caitorobi jiwi bicheito came jopa xeinaeyo po diwesi xua daxota Jesús pebexubinxatsi. ⁵⁶Pinmonae bequein Jesús yabara naerabiya paebatsi, ichitha tsanaya barompaya pia diwesi paeba. ⁵⁷Ichamonae asiya umena, yawa naerabiya Jesús yabara paebatsi.

⁵⁸Barapomonae jeye:

—Paxan pajume tan xua bapon Jesús paeba, jeye: ‘Xan abe exanaein barapo Nacom pin pia bo, po bo jiwi pia coutha acaba. Acoibi po matacabibe icha bo equeicha exanaein po bo jiwi jopa exanaeyo’, jei Jesús, jei barapomonae.

⁵⁹Daichitha barapomonae awiya came cataunxuae tsanaya barompaya ichawan paeba. Barapomonae pia pepaebiwán xua Jesús peyabara paebiwatsi jopa pebrũya nanta jũpaya nanta xeinaeyo.

⁶⁰Bapoxonae sacerdotemonae pia pepa pentacaponaein tatsi asiya uncuataba xua daxita peitabaratha tatsi. Bapoxonae bapon Jesús yainyabatsi, jeichichi:

—¿Jopa jume notsim barapomonae? ¿Bara xainyei xua po jumein barapomonae cayabara paeba? jei bapon.

⁶¹Daichitha Jesús saya moya uncua. Jopa jume notsiyo bapontha. Daxota equeicha sacerdotemonae pia pepa pentacaponaein tatsi jeye Jesustha:

—¿Bara yatsicaya xam Mesías pon Nacom necaitorobin, pon Nacom Pexantom, po Nacom w̃nae pajainteiban? jei bapon.

⁶²Bapoxonae Jesús jume nota bapontha jeye:

—Aa, bara xan tsocuaein apara, Nacom Pexanton apara. Paxam pana netaename xua xan ponxaein Nacom Tananeitapetsin ecaein Nacom pecoxa weya tatsi, pon peayapusũ itorobi coyenewa pexeinaein. Matautano pana netaename poxonae equeicha patopeicaein tsaquinaebowantha xua peitaboco wetsica, jei Jesús.

⁶³Nexata bapoxonae sacerdotemonae pia pepa pentacaponaein tatsi, pin anaetha anaya pia paparuwa nata tsitsinaxuba, peyabara anaepanaexaetsi Jesús, jeye:

—iNama equeicha jopa wanantawenonaewa ichamonae xua wanaca tsipaebiwa tsane xua bapon peyabara paebiwatsi! Bapon natsiaenae exana abe pepaebixae barapo jume poxonae Nacom pexanto najainta.

⁶⁴Bara paxam pajume taneme pocotsiwa bapon paeba pocotsiwa Nacom jopa ichipaeyo. ¿Eta xua pacayabara nanta xeiname xua paexanaename bapontha abe pepaebixae? jei.

Daxita barapo pecanamata caitorobi jiwi bicheito jeye:

—Bara xainyeya paebame. Jesús abe pia pepaebixae, Nacom tsitatsi xua bapon Nacom tsita natsicuentatsi. Daxota bapon bewa tũpaena, jei barapo pecanamata caitorobi jiwi bicheito.

⁶⁵Bapoxonae barapomonae jiwana, peonetha Jesús anaya itabara subabatsi. Poxonae Jesús itacuere cutatsi, bapoxonae Jesús itabara tsaquibacotatsi pecobetha. Barapomonae jeye Jesththa:

—Incane pana netsipaebare: ¿Jintam caitabara tsaquibobara xua bequein paca itabara cutatsi? jei barapomonae.

Bapoxonae iru policiamonae pomonae Nacom pin pia bo tatsi peenaewi Jesús itabara cuaintatsi.

Meje yabara poxonae Pedro Jesús yabara paebatsi xua jeye:

“Jopa dapon yaitaeinyo”, xua yabara jeichichi Jesús

(Mt 26.69-75; Lc 22.56-62; Jn 18.15-18, 25-29)

⁶⁶Poxonae cataunxuae Jesús cana exanompatsi bapoxonae iruru Pedro eca panatha tsica xua bo peuma werena. Bapoxonae yabuyo patopa powa sacerdotemonae pia pepa pentacaponaein tatsi tanacuitatsi. ⁶⁷Poxonae barapowa Pedro tainchi xua nonopeca, Pedro came taeuncuatsi. Pedro jeichichi:

—Apara xam bayatha iruru napuna poneibame Jesús, pon Nazaret tomarapin, jei yabuyo.

⁶⁸Ichitha Pedro jume matawenta bapowa, jeye:

—Jopa dapon yaitaeinyo, matautano jopa yaputaeyno pocotsiwa xua yabara paebame, jei Pedro.

Bapoxonae Pedro pona bomuxu coiboto beya. Bapoxonae wacara pebto fiba. ⁶⁹Equeicha bapowa Pedro tainchi. Bapoxonae bapowa tamropata pitaba xua tsipaeba pomonaetha pomonae baxota iru umena. Bapowa Pedro yabara paebatsi, jeye:

—Apara bapon pomonae Jesús pijimonae tatsi jiwana, jei.

⁷⁰Equeicha Pedro jume matawenta bapowa, jeye:

—Jopa dapon yaitaeinyo, jei Pedro.

Pirapaeyo pomonae umena baxota equeicha Pedro tsipaebatsi jeichichi:

—Bara xaniwaicha barapomonae jiwana. Apara xam Galilea nacuapim, jei pomonae umena.

⁷¹Nexata Pedro jume daunweya, jeye:

—Bara Nacom peitabaratha xainyeya paca tsipaebatsi pocotsiwa bara xainyeya tapaebiwa. Icha jopa xainyeya paca tsipaebichipaetsi metha barabu Nacom abe necana exanaetsipa. Equeicha paca tsipaebatsi: ‘Jopa dapon yaitaeinyo’, xuaunxuae pon payabara paebame, jei Pedro.

⁷²Bapoxonae iruru caena nainya wacara pebto equeicha fiba. Nexata Pedro nanta xeinataba xua bayatha Jesús Pedro tsipaebatsi poxonae jeye: ‘Xam barapo merawithe pewunaeya poxonae ainya jume cuiyobetha wacara pebto fibina xam copiya acoibi po jume cuiyobetha neyabara jam tsane: Jopa dapon yaitaeinyo neyabara jam tsane. Bapoxonae nainya iru wacara pebto fibina’, jeichichi Pedro xua Jesús paeba. Nexata bapoxonae

Pedro bichocono wecoyei peanthuthutanexae xua Jesús peyabara paebiwatsi.

Meje yabara poxonae Jesús uncua Pilato peitabaratha tatsi
(*Mt 27.1-2, 11-14; Lc 23.1-5; Jn 18.28-38*)

15 ¹Poxonae pentha tsina sacerdotemonae pia pentacaponae wi tatsi, iruru judiomonae pia pitiri jiwi tatsi, iru pomonae jiwi pecuidubiwi Moisés pia peitorobi coyenein tatsi, iruru ichamonae pomonae pecanamata caitorobi bicheito jiwi jiwana, daxita barapomonae yabara nacaetuta xua nanta jupaya peburaya penanta xeinaenexa po coyeneya xua Jesús pebexubiwa tsainchi. Bapoxonae barapomonae Jesús maxu cutatsi. Bapoxonae capoinchi Pilato beya. ²Pilato Jesús yainyabatsi, jeye:

—¿Bara xam yatsicaya judiomonae itorobiya pia pepa neewatsin? jei. Jesús jume nota, jeye:

—Xuaunxuae paebame bara baxua apara, jei Jesús.

³Sacerdotemonae pia pentacaponae wi tatsi namchi Pilatotha, jeye:

—Bapon Jesús bichocono exana pocotsiwa xua abe, jei barapomonae.

⁴Equeicha Pilato yainyaba Jesustha, jeye:

—¿Jopa jume notsim pocotsiwa barapomonae abe cayabara paeba?

Maisa barapomonae bichocono abe cayabara paeba, jei Pilato.

⁵Ichitha Jesús jopa equeicha jume notsiyo, Pilato jopa jume notichi.

Daxota Pilato najuntu coyene cabenaeca poxoru Jesús jopa nayabara paebiyu xua pia coya penayawenaenexa.

Meje yabara poxonae Pilato jume baru jejei xua
Jesús bara pebexubiwa tsainchi ichamonae
(*Mt 27.15-31; Lc 23.13-25; Jn 18.38-19.16*)

⁶Bara nama matabi jopa poxonae ba Pilato pia cui xeina poxonae ba jiwi tsinacaetuta pexaewa penanabanaenexa. Barapo matabitha Pilato ba pu sotaba pon ba jiwi itapeta cowai xua Pilato peisanaxubinexa pomonae jiwi pecubi botha peenaewi jiwanaepin. ⁷Barapo jiwi pecubi botha iruru eca pon pewun Barrabás. Bapon bichocono abe peexanaein tsipei caena bayatha matabi ichamonae xua barapomonae najume tsacaba cana exanatsi xuano xua jiwi jutebatsi. ⁸Bapoxonae pin bicheito jiwi pata Pilatotha, xua Pilato pewucaenexa tsainchi xua bapon exanaena pia cui coyeneya poxonae xua isanaxubina caein pomonae jiwi pecubi botha peenaewi jiwanaepin. ⁹Bapoxonae Pilato yainyaba barapomonae Jesús yabara, jeye:

—¿Paichichipame xua tapu sotabiwa tsane pon judiomonae itorobiya pia pepa peewatsinchi? jei. ¹⁰Baxua Pilato paeba, tsipei bapon yaputane xua sacerdotemonae pia pentacaponae wi tatsi Jesús uwatsi. Daxota barapomonae

Jesús caenaetaxubatsi Pilatotha. ¹¹Ichitha barapo sacerdotemonae pia pentacaponae wi tatsi jiwi jume cui tsacabatsi xua anaepana cana exanatsi, xua Pilato pecui itorobinexatsi xua Barrabás pepu sotabinexatsi, xua Jesús jopa pepu sotabinexatsi. ¹²Equeicha Pilato yainyaba barapo jiwi, jeye:

—¿Eta xua cana exanocuaein pon pawun dutame, xua pajam: ‘Judiomonae itorobiya pia pepa peewatsinchi?’ pajam, jei.

¹³Barapomonae Pilato daunweya jume notatsi, jeye:

—iBewa maisa naetotha tɔparucua exanaem! jei.

¹⁴Bapoxonae Pilato jeye barapomonaetha:

—¿Eta pocotsiwa xua metha jane, xua abe exana? jei.

Ichitha equeicha daumetha jume daunweya, jeye:

—iBewa maisa naetotha tɔparucua exanaem! jei.

¹⁵Pilato ichichipa xua bapon jopa peita aenae-aeneiwatsi jiwi. Daxota Pilato Barrabás nama pu sotabatsi. Bapoxonae Pilato itoroba xua soldadomonae bara Jesús moya pecuainchinexatsi pocotsiwatha eewa xua bichocono amɔpiya xua xota jiwi cuainteibatsi poxonae abe exaneiba. Matautano itorobano xua moya bara Jesús tɔparucua exanaeinchi naetotha.

¹⁶Bapoxonae soldadomonae Jesús capoinchi Pilato pia bo tatsi beya po soldadomonae yapu eena Pilato pia bo tatsi. Bapoxonae barapo soldadomonae waba icha soldadomonae xua daxita barapo soldadomonae Jesús pematawacaicha umenaenexa tsainchi. ¹⁷Bapoxonae Jesús pia paparuwa juma xuenatsi. Yawa juma xatatatsi icha paparuwa po paparuwa tsobia xua Jesús be pecana exanaenexatsi pon jiwi itorobiya pia pepa peewatsinchi. Yawa poxonae nacobe weta xua fata pee bapoxonae Jesús muxuna mata xatatatsi barapo pee tepa. ¹⁸Bapoxonae barapomonae tamropata notarucɔpa xua Jesús cui caponaeya jeichichi:

—¿Xamda? iApara xam barapom pon judiomonae itorobiya pepa Neewatsin! jei.

¹⁹Po naewa xua Jesús cobenatsi bayatha, barapo naewa Jesús cobe wepitatsi. Bapoxonae barapo naewatha Jesús mata cuaintatsi. Matautano Jesús yabara naone subabatsi. Bapoxonae barapomonae Jesús peitabaratha tatsi pentabocototha taumeinchi, xua Jesús naerabiya wuna pejainchinexa tsainchi. ²⁰Poxonae Jesús cana cui wetatsi xua cui caponatsi equeicha bapoxonae Jesús caewa juma wejontatsi xua po paparuwa tsobia. Bapoxonae equeicha caewa juma xatatatsi po paparuwa pia paparuwaxae tatsi. Bapoxonae Jesús capoinchi xua pecobe matabobinexatsi naetotha pebexubinexatsi.

Meje yabara poxonae Jesús tɔparucua exanatsi naetotha

(Mt 27.32-44; Lc 23.26-43; Jn 19.17-27)

²¹Poxonae Jesús namtotha caenapoinchi soldadomonae, bapoxonae barapo soldadomonae taeba pebin, pon Cirene tomarapin pon pewun

Simón. Bapon wexua werena pona. Bapon Alejandro paxa tatsi, iru xua Rufo paxa tatsi. Bapoxonae barapo soldadomonae Simón itorobatsi xua pecaponaenexa Jesús pia naeto tatsi, po naetotha t̃parucua peexanaenexatsi Jesús.

²²Bapoxonae Jesús capoinchi uruto beya, po uruto be jiton matasipa piwa, daxota barapo uruto jiwi w̃n unuta “Gólgota”, jei. ²³Baraxotiya Jesús apatatsi vino mera, po vino mera equeicha muxuna epareca mirra mera mataw̃n po mera bichocono atsu. Ichitha Jesús jopa apaeyo.

²⁴Matautano bapoxonae Jesús t̃parucua exanatsi. Bapoxonae barapo soldadomonae nata tsaba Jesús pia paparuwan tatsi. Barapomonae bebeya ibotixi penacueranta notsinexa Jesús pia paparuwan tatsi.

²⁵Poxonae baya a las nueve tsuxubi, bapoxonae Jesús t̃parucua exanatsi naetotha. ²⁶Jesús pentutu wetsica tadutatsi napaewa xua barapo napaewatha tina. Barapo petinae dutsiwa Jesús yabara jeichichi: “Baponje apara judiomonae itorobiya pia pepa peewatsinchi”, jei barapo petinae dutsiwa. ²⁷Ir̃r̃r̃ ponbe jiwi pecaibinbe t̃parucua exanatsi naetotha imoxoyo ichaxota Jesús ducua. Ich̃n Jesús petsocona wetarucuiyatsi, ich̃n pecoxa wetarucueinatsi. ²⁸Poxonae barapomonae baxua exana, bara barapomonae yabara jume cui weta pocotsiwa xua bayatha Nacom Pejume Diwesitha Mesías yabara paebatsi xua jiwi paeba, xua jeye: “Bapon pomonae abe peexanaewi jiwana”, jei.

²⁹Pomonae Jesús xenta poinchi barapomonae Jesús cui capoinchi. Yawa Jesús yabara itata naichaquebatsi. Barapomonae jeye Jestutha:

—iXam bayatha jam: ‘Nacom pin pia bo abe exanaein, bapoxonae equeicha acoibi po matabibibe xanebin’, jam! ³⁰iMoya bara jinya coutha nacapanepare naeto wetsica icha bara metha Nacom Pexantom tsipaem! jei barapomonae.

³¹Ir̃r̃r̃ sacerdotemonae pia pentacaponae tatsi, ir̃r̃r̃ pomonae jiwi pecuidubiwi Moisés pia peitorobi coyene tatsi, barapomonae Jesús cui capoinchi, yawa najei Jesús yabara:

—Bapon cain capanepeibabei ichamonae, came jopa nacapanepaeyo. ³²iIcha bara bapon Mesías, pon israelmonae itorobiya pia pepa peewatsinchi, b̃ bapon bara pia coutha naeto wetsica ecoinca! iXainya bapoxonae jume cow̃ntatsi xua wataexae tsane! najei barapomonae.

Barichir̃r̃r̃ baxua paebabe ponbe jiwi pecaibinbe, ponbe xua ir̃r̃r̃r̃ cobe matatabadutatsibe naetotha. Baponbe ir̃r̃r̃r̃ Jesús cui caponatsi.

Meje yabara poxonae Jesús t̃pa
(Mt 27.45-56; Lc 23.44-49; Jn 19.28-30)

³³Poxonae Jesús cataunxuae ducua naetotha, bapoxonae daxita nacuantha bichocono aitaquiri xua poxonae mateinyaxae weya, beya yatabopiya. Tres po horabe quirei tsuncuae. ³⁴Bapoxonae Jesús jume

daunweya wawai jeye: “Eloi, Eloi, ¿lema sabactani?” jei, (barapo jumetha xua jei: “Tanacom, Tanacom, ¿eta pocotsiwa metha nepunaxubame?” jei Jesús.)

³⁵Ichamonae pomonae baxota Jesús jume taeumeinchi, barapomonae jeye:

—Pajume taema, bapon waba, Elías wabatsi, pon Elías Nacom peitorobi jume pepaebin pon caena bayatha tupa, jei.

³⁶Bapoxonae caein bapomonae jiwana nainya cuinaepoinya yawa pitaba esponja xua baxota pemene capichinexa vino mera xua po mera mene atsu. Poxonae bapon baxota mene capita, naewatha duta xua Jesús petayoichaenexatsi xua petsutsubinexa. Bapon jeye:

—Abu, abu jopa apatsinde. Waxainchi abu matha taeinchi icha Elías patopeicaena xua bapon pepichinexatsi naeto wetsica, jei.

³⁷Bapoxonae Jesús jume daunweya wawai. Bapoxonae nama tupanaicha Jesús. ³⁸Bapoxonae paparuwa, po paparuwa Nacom pin pia botha tatsi ducua, barapo paparuwa nainya bopiya epa matonta tsitsiqueica ainya epatobe naexanabe. ³⁹Soldadomonae pia pentacaponaein tatsi, pon romanomonaepin pon Jesús peitabaratha tauncuatsi, poxonae bapon tane xua Jesús tuparucua, bapon jeye:

—Apara bara yatsicaya bapon Nacom pepa Pexanto tatsi, jei.

⁴⁰Barichi iru ainyawaxi yabuxi barapowaxi Jesús tsiwiyo taju wetaumeinyatsi. Barapowaxi jiwana, ichowayo pewun María Magdalena, powa Magdala tomarapiwayo. Ichowayo iru pewun María, Santiago pon xuyapin, iru José matapin, baponbe penabe tatsi. Ichowayo iru pewun Salomé. ⁴¹Barapowaxi Jesús bayatha matha puna jinompatsi xua Jesús peyawenaenexatsi xua poxonae Galilea nacuatha popona. Iru ichowaxi yabuxi pinmonae powaxi Jesús baru patopa Jerusalén tomaratha.

Meje yabara poxonae Jesús petupaein ibo muthutha yauxatatabotatsi
(Mt 27.57-61; Lc 23.50-56; Jn 19.38-42)

⁴²Po mataqueitha pewun penacui xaxainchi matakabi poxonae judiomonae ba weta daxita xua penacuichiwa pewunaeya poxonae jopaena pentaquei seicae matakabi, poxonae quirei tsanaicha barapo penacui xaxainchi matakabitha bapoxonae patopa pebin Pilatotha. ⁴³Bapon pon pepatopaexae bapon pewun José, pon Arimatea tomarapin. Bapon pomonae pecanamata caitorobi jiwi bicheito jiwapanin. Bapon baru cui itura jineibatsi jiwi. Bapon yabara jume cowuntsiya wuna ewateiba po coyenewa xua poxonae Mesías patopaetsica pon jiwi itorobiya peewetsinexatsi. José ajuntucoyenetsaquiya patopa Pilato pia xantha tatsi pewucaenexa Jesús petupaein. ⁴⁴Bapoxonae Pilato yabara najuntu coyene cabenaecatoba xua bayatha Jesús tupa. Daxota bapon itoroba soldadomonae pia pentacaponaein tatsi pia yaputaetsi po

coyene xua eta poxonae bayatha tupa. ⁴⁵Poxonae barapo soldadomonaē pia pentacaponaein tatsi paeba xua pinae bayatha Jesús tupa, bapoxonae Pilato copata xua José bara pichina Jesús petupaēin. ⁴⁶Bapoxonae José pexeinya paparuwa comota. José naeto wepichica Jesús petupaēin. Yawa mata qiyontabareca barapo pexeinya paparuwatha. Bapoxonae José ibo muthu iya boya Jesús petupaēin. Yawa torenabapoinya pin ibo panawa. Yawa barapo ibo panawatha yauxatatabanota. ⁴⁷María Magdalena, powa Magdala tomarapiwayo iru icha María powa José pena tatsi, barapowabe tanebe ichaxota Jesús petupaēin boyatsi.

**Meje yabara poxonae Jesús equeicha asu juina
exanatsi petupaē cuiru coyene weya
(Mt 28.1-10; Lc 24.1-12; Jn 20.1-10)**

16 ¹Nexata barapo judiomonaē pia pentaquei seicaē matakabi tatsi yapucaewaba poxonae quirei tsanaicha xua icha matakabi jopa. Bapoxonae María Magdalena, powa Magdala tomarapiwayo, iru icha María powa Santiago pena tatsi, iru ichowayoru powa pewun Salomé, daxita barapowaxi comoca petuxueiwan peponaenexa xua Jesús peperu epababinexatsi petupaēin. ²Bapoxonae baya caemumbotha, po matakabitha xua nanta carucua cae semanatha, barapowaxi capata petuxueiwan ichaxota Jesús ibo muthu iya boyatsi. Bapoxonae xometo pichatabina. ³Barapowaxi caewaxi natsipaebenapona, najei:

—¿Jintam metha nacata pataxubina barapo ibo panawa xua yauxatatabobotatsi? najei.

⁴Daichitha poxonae barapowaxi taerucpa xua po pin ibo panawatha yauxatatababota barapo ibo muthu bayatha cou yaupataxubanota.

⁵Barapowaxi joniya barapo ibo muthu iya. Barapo ibo muthu tutu iya pewowin eca po muxunene pecoxa weya. Bapon nama xatata paparuwa, po paparuwa bichocono apiya yawa bichocono inyapana. Barapo yabuxi bichocono junuwa, pewowin cunuwatsi. ⁶Ichitha barapo pewowin jeye barapo yabuxitha:

—Jopa pajunuwinde. Paxam pajeitame Jesús Nazaret tomarapin, pon bayatha naetotha tupa. Ichitha bapon anoxuae xote jopa bocaeyo. Bayatha asu petupaē cuiru coyene weya. Pataema ichaxota Jesús bayatha botatsi petupaēin. ⁷Bara paponare, yawano patsipaebare Pedro iru ichamonaē pomonaē Jesús pijimonaē tatsiru. Nexata pajande: ‘Bepa Jesús paca tsiwana patopiyaei Galilea nacua beya poxonae bara bepaiyiyaename. Bapoxonae baxotiya pataename bapon icha be pocotsi coyeneya paca tsipaeba bayatha’, pajande, jei pewowin barapo yabuxitha.

⁸Barapo yabuxi ibo muthu wejojondena. Yawa bara weya ducpa tsipei bichocono pijunuwi jijiyei. Barapo yabuxi jopa paebiyo ichamonaetha poxoru bichocono junuwa.

**Meje yabara poxonae Jesús María tsita naitutatsi
powayo Magdala tomarapiwayo
(Jn 20.11-18)**

⁹Poxonae Jesús asu exanatsiba petupaewa weya po mataqueitha opi carucua xua cae semanatha poxonae aena pentha, bapoxonae Jesús tsita naituta María Magdalena, powa Magdala tomarapiwayo. Barapowa caena bayatha Jesús taitaweta cauri siete poyobe xua bapowa xeina barapo cauri, xua equeicha bapowa jopa pexeinaenexa. ¹⁰Poxonae Jesús tainchi bapowa pona pemuxu tsipaebinexa pomonaetha pomonae anoxuae anthuthutane yawa wecoyei xua Jesús petupaexae. Barapomonae bayatha Jesús pepuna jinompaewichi. ¹¹Poxonae barapomonae jume tane xua juinya Jesús asu popona, yawa xua bapowa bayatha Jesús tainchi, barapomonae baxua jopa yabara jume cowuntsiyo.

**Meje yabara poxonae Jesús pebinbe tsita naituta
namtotha poxonae Emaús tomara beya ponabe
(Lc 24.13-35)**

¹²Pirapae bapoxonae equeicha Jesús tsita naituta pijimonae tatsi jiwanabetha icha cui coyeneyatha xua poxonae jopa xapain yaitaetsi poxonae namtotha pipatotha ecaponabe aisawatha. ¹³Bapoxonae baponbe caibe nawiya. Yawa tsipaebabe ichamonaetha xua Jesús pijimonaetha tatsi xua po coyene bayatha Jesús baponbe tsita naitutatsibe. Ichitha barapomonae barichiru iru jopa jume cowuntsiyoru barapo diwesi pocotsiwa baponbe paebabe.

**Meje yabara poxonae Jesús cui itoroba pijimonae xua
pia diwesi tatsi daxita nacuantha petapaebiwa tsainchi
(Mt 28.16-20; Lc 24.36-49; Jn 20.19-23)**

¹⁴Pirapae Jesús tsita naituta pijimonae pomonae once poyobe poxonae barapomonae pexaethopaewatha iratha ena. Jesús pin jumetha muxutaenaquiya exana xua jopa pejume cowuntsixaetsi matautano peyabara muxusipanaexaetsi matauta xua jopa peyabara jume cowuntsixaetsi pocotsiwa paeba pomonae tane xua Jesús equeicha bayatha asu popona petupae cuiru coyene weya. ¹⁵Jesús jeye pijimonaetha: “Paponare, daxita nacuantha beya. Patsipaebare daxita jiwitha barapo pecapanenebiyae diwesi jume. ¹⁶Pomonae neyabara jume cowuntsina xua xan apara Nacom Pexanton tatsi, matautano xua bautisabatsi, barapomonae capanenebiyaeinchi xua jopa peweraweracaenexa. Ichitha pomonae jopa neyabara jume cowuntsiyo xua xan Nacom Pexanton tatsi, barapomonae peraxa jubebinchi xua Nacom peyabara paebixae xua pinae barapomonae jopa jume cowuntsiyo.

¹⁷⁻¹⁸Pomonae neyabara jume cowuntsina xua xan Nacom Pexanton tatsin muxuna exanaein xuaje pocotsiwe: Barapomonae taitawetsina ichamonae cauri poxonae tawuntha waqueibina; matautano barapomonae pena jumeintha cueicueijejei tsane; icha barapomonae jomon notsina pecobetha, jopa barapomonae tupa exanae tsainchi jomon; matautano icha barapomonae apaena po mera jiwi tupa exanatsi barapo mera jopa abe exanae tsainchi barapomonae; matautano barapomonae itacupaeinchi xua jayabina pecobetha pomonae peatenewi, xua bapoxonae barapo peatenewi peaxaibinexa tsaibi tsane”, jei Jesús.

**Meje yabara poxonae Jesús athabe juinya Nacom
pia peitorobi nacua beicha tatsi
(Lc 24.50-53)**

¹⁹Jesús pon jiwi Pecanamataxeinaeinchi, poxonae bapon najume weta xua cueicueijejei pijimonaetha, bapoxonae Jesús asiya peitaboco beicha juinya exanatsi, xua Nacom exana. Bara xoteicha Jesús Paxa cuaretatsi pecoxa weya ainya cui peexanaenexatsi. ²⁰Bara barapomonae Jesús pijimonaetha tatsi ponarucupa. Yawano barapomonae cueicueijejei tsurubenaebiya jiwitha barapo pecapanenebiyae diwesi jumein daxita nacuantha. Bapon Jesús pon jiwi pepa Pecanamataxeinaeinchi yawena barapomonaetha. Matautano Jesús cana exana barapomonaetha xua barapomonae muxuna exana pexeinya petsita itatsi coyenewan xua daxota pocotsiwa barapomonae cueicueijejei jiwitha bara pexainyei jumein. Je, bara ichi tsane.

Baja Marcos.